

سرى للغاية

محضر اجتماع مجلس الوزراء برئاسة الرئيس جمال عبد الناصر

القاهرة - قصر القبة فى ٢٥ فبراير ١٩٦٨

الحاضرون

الرئيس جمال عبد الناصر، زكريا محى الدين.. نائب
الرئيس، حسين الشافعى.. نائب الرئيس ووزير الأوقاف
والشئون الاجتماعية وشئون الأزهر، على صبرى.. نائب
الرئيس ووزير مقيم لمنطقة القناة، صدقى سليمان..
نائب الرئيس، الدكتور محمود فوزى.. مساعد رئيس
الجمهورية للشئون الخارجية، كمال رفعت.. وزير العمل،
عبد المنعم القيسونى.. وزير التخطيط، عبد المحسن أبو
النور.. للإدارة المحلية، محمود يونس.. للنقل والبترو
لوالثروة المعدنية، ثروت عكاشة.. للثقافة، سيد مرعى..
للزراعة والإصلاح الزراعى واستصلاح الأراضى، حسن
عباس زكى.. للاقتصاد والتجارة الخارجية، عبد العزيز

السيد.. للتربية والتعليم، محمد النبوى المهندس..
للصحة، عبد الوهاب البشرى.. للحربية والانتاج الحربى،
محمد طلعت خيرى.. للشباب، لبيب شقير.. للتعليم
العالى، محمود رياض.. للخارجية، نزيه ضيف..
للخزانة، شعراوى جمعة.. للداخلية، عصام حسونة..
للعدل، عبد الخالق الشناوى.. للرى، نور الدين قره..
للتأمين والتجارة الداخلية، أمين هويدى.. للدولة، توفيق
البرى.. للدولة، محمد فائق.. للإرشاد القومى، هنرى
أبادير.. للمواصلات، أمين شاكى.. للسياحة، عزيز
أحمد يس.. للإسكان والمرافق، عزيز صدقى..
للصناعة، الفريق أول محمد فوزى.. للحربية.

المحتويات

الصفحة

الموضوع

- ١ - الفريق محمد فوزى.. تفاصيل قضية الطيران
- ٥ - عبد الوهاب البشرى.. أحداث المظاهرات فى مصانع حلوان بعد أحكام الطيران
- ٣ - لبيب شقير.. تطورت الأحداث باعتصام طلاب من جامعة القاهرة تضامنا مع العمال، ثم خروج مظاهرات متجهة الى مجلس الأمة، ثم الى ميدان التحرير، ثم تشعبوا الى شوارع أخرى وانضم اليهم آخريين، وتجمهروا حول مبنى جريدة الأهرام
- ٧ - الاحتجاجات تمتد من كلية الهندسة جامعة القاهرة الى جامعة عين شمس والإسكندرية
- ١٣ - عبد الناصر.. تعليمات الى شعراوى جمعة ألا يتعرض للمتظاهرين إلا بأمر منه شخصيا
- ١٩ - استمرار استعراض أحداث المظاهرات.. عبد الناصر، النبوى المهندس، ثروت عكاشة
- ١٩ - عكاشة
- ٢٦ - عبد الناصر.. التقيد بحكم القانون، وعدم التدخل فى قضية الطيران

- ٧- عصام حسونة.. لا يجوز أن يتحكم رجل الشارع فى القضاء. البوليس وقف موقفا طيبا جدا من المظاهرات، وي طرح تساؤلات حول المظاهرات وطلبات القائمين بها ٢٨
- ٨- عبد الناصر.. يشرح الوضع والحالة النفسية السيئة مع احتلال اليهود لجزء من أراضينا ٣٤
- الناس تريد التغيير ونقطة البداية، القضاء على الخلل فى التنظيم السياسى والقضاء على التناقضات فى الحكم ٤١
- ٩- عبد الناصر يفتح المناقشة، ما هو التغيير المطلوب؟ عصام حسونة، عزيز صدقى، أمين شاکر ٤٢
- ١٠- ف. محمد فوزى.. اقترح تحويل قضية الطيران تجاوبا مع الاتجاهات الشعبية، ٥٦ - ٦١ ونقلها الى محكمة عسكرية أخرى
- ١١- عصام حسونة.. إعادة المحاكمة بناء على ضغط شعبى ستكون سابقة سيئة جدا!
- فتحت المناقشة بين معارض للفريق فوزى.. كمال رفعت وعبد المحسن أبو النور، ومؤيد.. صدقى سليمان وحسين الشافعى ٥٨
- ١٢- عبد الناصر يعرض منشورا من الطلبة المعتصمين فى كلية الهندسة يدعو لاستمرار الاعتصام حتى تجاب مطالبهم ٦٣
- ١٣- على صبرى.. الجميع اتفقوا على ضعف المحاكمة؛ وهذا وجه الخطورة، ويؤيد إعادة المحاكمة ٦٤-٧٠
- ١٤- عبد الناصر.. يرجع الى تصرف صدقى محمود عندما اجتمع بالقيادة فى ٢ يونيه ١٩٦٧، ثم يوم ٥ يونيه كان ممنوع ضرب المدافع لأن القادة العسكريين فى الجو متجهين الى سيناء! وعند هجوم طيران اليهود لم يكن هناك أحدا فى غرفة العمليات! ٦٦
- ١٥- عصام حسونة.. أقصى عقوبة على صدقى محمود هى السجن المؤبد أى ٢٠ سنة، والحكم صدر بـ ١٥ سنة! الناس تريد دم! ٦٨
- ١٦- عبد الخالق الشناوى.. لا يوافق على إعادة المحاكمة ٧٠
- ١٧- شعراوى جمعة.. مزيد من المعلومات عن الأحداث، ويؤيد إعادة المحاكمة، فهذا يمتص غضب كثير
- نظام الاتحاد الاشتراكى ومنظمة الشباب لا يمثل الالتزام، ويطالب بتكوين حزب يرتبط به الشباب، ويحل مجلس الأمة ويحدد ميعاد يتناسب مع ظروف العدوان ٧١

سرى للغاية

الصفحة	الموضوع
٧٣	١٨- لبيب شقير.. القضية سياسية، ويؤيد إعادة المحاكمة سياسيا.
٧٥	١٩- كمال رفعت.. يقترح إصدار بيان يا من الرئيس أو مجلس الوزراء
٧٥	٢٠- أمين هويدى.. لا يوافق على إعادة المحاكمة
٧٧	٢١- محمد فائق.. يوافق على إعادة المحاكمة، مع محاسبة من استغلوا الأحكام
٧٧	٢٢- عبد المحسن أبو النور.. الناس تطالب بتحويل حكم الطيران، ويتفق مع الفريق فوزى
٧٧	٢٣- عبد الناصر.. يجب تعطيل الجامعات والمعاهد العليا فى اليوم التالى بدون ذكر السبب.
	بالنسبة لموضوع الحرية، لابد أن تمسك البلد بشدة.
	بالنسبة للحكم، الفريق فوزى يعطى تصريح أنه قرر إلغاء المحاكمة وإعادتها. بعد ذلك لو المدارس الثانوية تظاهرت تضرب، ويقبض على المتظاهرين ويحولوا الى النيابة
٨٠	عصام حسونة.. الكلام عن الحرية ليس الآن؛ قانون الطوارئ قائم فنحن فى حالة حرب.. مناقشة
٨٠ - ٨٦	

سرى للغاية

قرارات مجلس الوزراء

فى ١٩٦٨/٢/٢٥

- بحث التطورات الأخيرة، وبينها المظاهرات التى وقعت فى بعض الجامعات بسبب الأحكام التى أصدرتها المحكمة العسكرية العليا ضد قادة السلاح الجوى السابقين.
- صرح الفريق أول محمد فوزى وزير الحربية بصفته الضابط الأمر بالتشكيل، وبعد الإطلاع على الأحكام ودراستها لم يصدق على الحكم، وأمر بإلغاء المحاكمة وإحالة القضية من جديد الى محكمة عسكرية عليا أخرى.
- تقرر وقف الدراسة فى الجامعات والمعاهد العليا بناء على طلب مديرها.

سرى للغاية

محضر اجتماع مجلس الوزراء برئاسة الرئيس جمال عبد الناصر

القاهرة - قصر القبة فى ٢٥ فبراير ١٩٦٨

عبد الناصر: بالنسبة للمشاكل اللى احنا فيها من يوم الأربعاء؛ الحقيقة من يوم صدور الحكم وأنا كنت متتبع محاكمة الطيران.. يعنى مختصر الجلسات كان بييجى لى باستمرار فكنت بقراه. هم دخلوا المحاكمة وفقا لقانون الأحكام العسكرية، سيبوا فوزى يتكلم يمكن أنا النهارده مدووش طول النهار.. شعراوى داوشنى طول النهار! (ضحك)

ف. فوزى: أقدر أقول توضيح بسيط عن المفهوم اللى تمت فيه هذه القضية:

قدمت النيابة العسكرية المتهمين فى القضية التى عرفت باسم قضية الطيران الى المحاكمة، بتهمة الإهمال الواردة فى المادة ١٣١ من قانون الأحكام العسكرية. هذه المادة لها مثيل فى قانون العقوبات، وهى المادة ١٤ من القانون ١٢٠ الصادر سنة ٦٢، الخاصة بجريمة الإهمال الجسيم فيما يقع من الموظف أثناء قيامه بعمله، والتى تصل أقصى عقوبة لها الى الحبس ٧ سنوات. وعليه فالمادة ١٣١ من قانون الأحكام العسكرية تندرج من الغرامة حتى الأشغال الشاقة المؤبدة.

لم يتبين للنيابة العسكرية قبل إجراء المحاكمة، كما لم يتبين للمحكمة أثناء المحاكمة أن هناك أى دليل على وجود خيانة أو تواطؤ أو تعمد فيما وقع من المتهمين من إهمال أدى الى الضرر الجسيم الذى وقع يوم ٥ يونيه. رأيت المحكمة أن نتائج إهمال قائد القوات الجوية السابق قد انعكست صورتها على المعركة وبالتالي على الأمة العربية جمعاء.

وأن هذا الإهمال يعتبر من صور الإهمال الجسيم التى عنها المشرع، ورأت لذلك أن تحكم عليه بأقصى عقوبة السجن ١٥ سنة، والتى تدخل فى نطاق العقوبة المنصوص عليها فى المادة ١٣١ من قانون الأحكام العسكرية.

إن جماهير الشعب تطالب بسيادة القانون، وأن هذا الحكم هو صورة حية من صور تطبيق أحكام القانون وسيادته. أما سبب عدم رضاء هذه الجماهير عن أحكام هذه القضية بالذات؛ فيرجع الى ما سبق أن أشاعه الاستعمار وأذنابه من رجعيين ومغرضين وانتهازيين، فى أن الأمر خيانة وتواطؤ ورشوة بلغت ملايين الجنيهات! وهو ما لم يحدث.

سرى للغاية

إن قانون الأحكام العسكرية الحالى، لا يتضمن الإدانة على الأخطاء التى يرتكبها القادة فى تقديراتهم وقراراتهم. هذه أول قضية من نوعها من الناحية الموضوعية تقابلها القوات المسلحة؛ لم يصدر فى تاريخ القوات المسلحة وقوف قائد واتهامه على قرار خاطئ أو تقدير خاطئ، بل اقتصر على الإدانة بالنسبة للأعمال الفردية التى تعود نتائجها على الفرد نفسه دون تأثير على جموع كبيرة.

كل قانون الأحكام العسكرية مكتوب فيه: تركه سلاحه أو تركه موقعه أو هروبه من خدمة الميدان أو التعامل مع العدو، وكلها أمور واضحة فى هذا القانون. التحقيق فيها أو المحاكمة لا تأخذ وقتا كثيرا من المحكمة، ويكون الاتهام ظاهر أن التقديرات والقرارات والآراء بالنسبة للموضوع الواحد تختلف من شخص الى آخر، ولا يمكن محاسبة الفرد إلا على أساس المفهوم السائد وقتئذ، كما لا يمكن مطالبته بأن تكون تقديراته دائما سليمة ١٠٠٪ وأن تنطبق على ما سيجئ به المستقبل.

جبت ناحية تاريخية: بالنسبة لدول العالم جميعا، لا تحاكم قادتها العسكريين على أخطائهم المتعلقة بأعمالهم فى مناصبهم، بل كل ما تفعله هو عزلهم كم تم فى عزل القائد الذى خسر معركة بيرل هاربر. ولذا لم تر المحكمة صواب الحكم بالأشغال الشاقة على قائد كبير على أخطائه ولو أنها جسيمة، إلا أنها لا ترقى الى درجة الخيانة أو الفرار أمام العدو أو ارتكاب العار.

تقديم مثل هذه القضية أمام محكمة الثورة تخرجها عن دائرة الأحكام العسكرية، وهنا يجئ الاختصاص وربما يكون ليس فى وضعها الحقيقى بالنسبة لمحكمة الثورة. قضية الطيران، قضية فنية تتناول أعمال ذات طابع فنى بحت، فكان لابد عند مناقشة ادعاءاتها من الخوض فى تفاصيل يقتضى الأمر عدم إذاعتها صونا لأمن وسلامة القوات المسلحة. ولذلك فقد التزمت المحكمة بالسرية أثناء عقد جلساتها، وحتى لو كان صُرف النظر عن السرية وجعلت الجلسات علنية لاستشكل الأمر على الجمهور، بل ولما اقتنع بثبوت الادعاءات على المتهمين.

أول قضية تيجى فى تاريخنا، أن شهود النفى تعتبرهم المحكمة شهود إثبات! وشهود الإثبات تعتبرهم المحكمة شهود نفى!

ومن ضمن النقاط الرئيسية التى جاءت فى صف المتهمين للدفاع عن أنفسهم ووضعت المحكمة أمام الأمر الواقع ما يلى:

سرى للغاية

خلل نظام القيادة والسيطرة على القوات المسلحة.
وعدم إتباع الأسلوب الصحيح لاتخاذ وعرض القرارات بواسطة قادة الأفرع
الرئيسية للقوات المسلحة على نائب القائد الأعلى.

وكذا فى وضع الخطط بالاشتراك مع أجهزة القوات المسلحة.
وقف الفريق أول صدقى وعرض على المحكمة وقال: أنا إديت القرار بتاعى
للقائد والقائد صدق، والقرار دا كان عبارة عن ورقة بسيطة فيها ٤ فقرات لا يمكن أن
تكون خطة وتكون قرار فى يوم من الأيام فى تاريخ العسكرية، إنما من الناحية الشكلية
واخذ إمضاء بتصديق من القائد بتاعه، إدى له الحماية الشكلية من ناحية الموضوع.
المحكمة وتاريخ القوات المسلحة، كان يعلم بقصور وسائل الدفاع الجوى وعلى
ذلك كانت التقديرات والقرارات. الفريق أول متقاعد المتهم، أعطى تبريرا لأخطائه وذريعة
للتنصل منها وحجة للتخفيف من مسؤوليته!

العقبات التى كانت تقف فى سبيل الحصول على وسائل الدفاع الجوى وخاصة
أجهزة الإنذار والرشاشات من الخارج؛ سواء لأسباب مالية أو لأسباب سياسية، جو
التواكل واللامبالاة الذى كان سائدا فى القوات المسلحة قبل النكسة وعدم التفرد والنزوع
الى الاهتمامات الخاصة والمصالح الذاتية، أعطى جو ضد المتهمين.
روعيث مشاعر أفراد القوات الجوية الذين كانوا يعلمون بتفاصيل القضية؛ بسبب
تحميلهم مسئولية النكسة من وجهة نظر الدولة بصفة عامة ومن وجهة نظر القوات
المسلحة بصفة خاصة.

ولو جاءت أحكام هذه القضية أكثر شدة، لرسخت فى أذهان أفراد القوات الجوية
عقدة الشعور بالذنب وهذا ضد الصالح العام. فلو أن هذا الشعور لو استمر لأحدث
انفصاما بين القوات الجوية وباقى القوات المسلحة؛ مما يؤثر تأثيرا بالغ السوء فى
تطوير ودفع القوات الجوية واندماجها الكامل فى القوات المسلحة فى هذه الحالة.

والملاحظ أن رد الفعل فى القوات الجوية جاء مقبولا، وأن الأحكام فى نظر
أفرادها كانت عادلة فهدأت نفوسهم وأخذت عقدة الشعور بالذنب تزول؛ وهذا أمر حيوى
جدا فى الإعداد للمعركة المقبلة التى لا مناص منها لإزالة آثار العدوان.

إن قضية الطيران قضية كبيرة فى معانيها وأبعادها ونتائجها، غير أنه ليس فى
قانون الأحكام العسكرية مادة واحدة يمكن أن تعبر عن المضمون الحقيقى لادعاءاتها؛
فلم يكن هناك بد فى ظل نصوص ذلك القانون وأحكامه الواجبة السيادة والاحترام من
صياغة الادعاءات التى تعكس تماما جسامة ما ارتكبه المتهم من أخطاء، وكان على

سرى للغاية

المحكمة أن تنقيد بهذه الادعاءات. ومن هنا جاءت الأحكام أقل مما كانت تتوقعه الجماهير التي صدمتها النكسة، والتي كانت تنتظر حكما يتناسب مع جريمة الخيانة التي شاع أمرها بينهم!

أما المسألة التي كان يجب توجيهها للمتهمين، والتي كان سيترتب عليها إقامة ادعاءات أخرى تتفق مع جسامة ما ارتكبه فهي:

ماذا فعلت - بوصفك قائدا للقوات الجوية والدفاع الجوى - طوال خمسة عشر عاما للنهوض بهذه القوات ورفع كفاءتها وزيادة إمكانياتها ودرجة استعدادها القتالى، رغم أنك عاصرت عدوان سنة ٥٦ وشهدت بنفسك تدمير قواتك، ورغم أن الدولة أسبغت عليك من رتبها العسكرية أعلاها ومن مرتباتها أقصاها ومن سلطاتها أكبرها ومن ثقتهما أعظمها!؟

ولكن الحقيقة أنك لم تفعل شيئا من ذلك، بل تركت شئون القوات الجوية لسيطرة مديرى المكاتب والشلل وجعلت طبيعتها عدم الجدية واللامبالاة، وكانت سياستك إحالة الطيارين الأكفاء الى المعاش واستبقاء وترقية المحاسيب، والإسراف والتبذير فى المظاهر والكماليات والشح والتقطير فى الضروريات والحتميات!

وللأسف هذه الادعاءات من الناحية المضمونية، ليست واردة فى قانون الأحكام العسكرية، ولا حتى فى قانون الجنايات؛ ومن هنا جاءت النتيجة كما ظهرت فى المحكمة.

وبالرغم من ذلك، فإن حيثيات الحكم لم تظهر بعد، والقانون يلزم المحكمة بأن حيثيات تقدم فى أقل من ٣٠ يوم بعد النطق بالحكم، ثم يتلو ذلك التصديق على الحكم.

عبد الناصر: هو أنا من لاحظت فى قضية صدقى محمود: أن تقريرا ضباط الطيران كلهم شهدوا مع صدقى محمود حتى مدكور.. مش كده!؟

ف. فوزى: أيوه يافندم.

عبد الناصر: ودا يعنى أنا بقيت مستغرب! هو صدقى كان فارد فى المحكمة وعمال يسأل وياخد ويدى، كل الناس كل اللى رايعين حتى اللى هم شهود الإثبات وقفت بجانب صدقى محمود بالنسبة لعمليات فنية.. إيه كذا طلبنا إيه وعلنا واعتمدنا إيه.. الى آخر الكلام!

سرى للغاية

الحقيقة يعنى النهارده، يعنى أنا صدقى بالذات كنت عايز أشيله من سنة ٥٦ ورأى إنه مسئول عن العملية. مقدرش يعنى أنا شفت المحكمة مقدرش أرجع الحكم المحكمة تانى، مقدرش أحوله لمحكمة ثورة وإلا لو وديته محكمة الثورة يعنى لازم هيحكموا عليه بالإعدام! وأنا عرفت الحكم قبل ما يتقال وقلت لفوزى: إن هيحصل رد فعل سىء وقال لى هو على النقط.

أنا متابع القضية ومتابع الادعاءات، وبعدين عندى برضه موضوع الجيش موضوع أيضا حساس بصرف النظر عن صدقى محمود ومش فاهم إيه، ولكن برضه القضاء العسكرى وإن كفاية اللى اتعمل فينا برضه التعليقات بتخلى الواحد يوازن.. فدا الوضع.

طلعت مظاهرة حلوان يوم الأربعاء وحصل فيها أخطاء! وأنا فى رأى إن الأخطاء اللى حصلت من الاتحاد الاشتراكى ومن البوليس محصلش تنسيق! برضه البشرى يقول لنا إيه اللى حصل فى حلوان؟

البشرى: هو الساعة ٧,٢٠ تقريبا كده اتصل بى مدير الهيئة وهو فى مدينة نصر، وقال لى: إن مدير المصنع فى حلوان كلمه وقال له: إن عمال المصنع متجمعين عشان الخروج فى مظاهرة.

الحقيقة أنا حبيت أستوفى الصورة من موقعها نفسه، فطلبت مدير المصنع الموجود هناك كان حوالى الساعة ٧ ونص إلا خمسة، فقال لى: إن هو الساعة ٧ وعشرة المصنع دا فيه ٣ أماكن.. مكان بيبدا الساعة ٧ إلا ربع اللى هو بيقوم بناحية الإنتاج المدنى، مجموعة زى ١٠٠٠ عامل دخلوا مفيش حاجة. المجموعة الثانية اللى هى بيشتغلوا فى الطيارات القسم حوالى ٢٠٠٠ دا المصنع.

فى ورشة من الورش الساعة ٧,١٠ سمع همهمة داخل هذه الورشة، إنما كان فيه مهندسين موجودين بيرغوا إلا أن فيه واحد - اللى هو قائد منظمة الشباب اسمه صفوت الليثى - كان بيجمع العمال بيستثير حماسهم ضد الحكم، بيقول: لازم نخرج مظاهرة! فالمهندسين قالوا له: يعنى يجبش إن احنا نعمل مثل هذا العمل لأن عواقبه برضه مش هتكون طيبة، فقال لهم: المصانع كلها هتخرج. فبعدين جم المهندسين ذاتهم حبوا يعنى يحولوا دون خروج باقى العمال، فهو بإرشاد منه والمساعد بتاعه بتاع منظمة الشباب برضه فى المصنع وخرجوا من الأبواب الجانبية.

سرى للغاية

فى هذه الفترة كان مدير المصنع وصل لهم عند الشارع اللى فيه الورشة، فرجاهم وقال لهم: إحنا نعبر عن الشعور جماعة داخل المصنع، إنما لا يجوز لنا أن نتصرف بأننا نخرج خارج الأبواب! ولاحظ الى أن الأخ صفوت هو اللى بيثير العملية فقصده - هو يعرفه كمهندس بيشتغل معاه - فقصده، وقال له: تعالى يا صفوت أنا يعنى العملية متكونش كده! إنما هو فى الظاهر برضه فى الحماس القائم، فدفعه صفوت بعض الشئ ومجموعة ٢ أو ٣ لم يمكنوه من إنه يعنى يقدر يؤثر على الأخ صفوت واستمروا فى طريقهم.

هو فى الواقع فى اللحظة دى أنا كنت بطلبه هو كان قفل، لأن فيه سور وبعدين أرض فضاء وبعدين سور تانى على الشارع بتاع حلوان، فهو كان طلب للمكالمة فجانى جرى وبعدين حكى لى هذه العملية. قلت له: أنت تروح وتقف هناك ويجب إنك تسيطر على الموقف، ويجب إنك تقنعهم بأن العملية عملية إبداء الشعور والبلد فيها ديمقراطية قوية، وبأى وسيلة هنعبر عن شعورهم وهنوصل شعورهم الى الجهات المسئولة.

وطبعا فى هذه الأثناء اتصلت بالأخ شعراوى وفهمت منه برضه إنه يشاركنى هذا الرأى.

على ما اتصلت تانى كانت الصورة خرجت شوية؛ لأنهم تكاثروا على البوابة وفعلا البوابة لم تتحمل الضغط بتاع الناس! برضه حاولت إن أخلى الناس بتوع الأمن يلفوا يجيبوا لنا أخبار عن العملية.. جنسها إيه؟ فجت الأخبار بقى: إنهم مشيوا؛ لأن هو الشارع كده يافندم وبعدين بيمشوا ناحية الكابيرتاج وبعدين بيمشوا فى الشارع ناحية.. يعنى هى مسافة بسيطة ٤ أو ٥ دقائق لحد الكابيرتاج، وبعدين من الكابيرتاج لغاية المحطة - فى طريقهم للمحطة - فيه قسم، فحصلت العملية بتاعة القسم دى - يعنى كما قيل لى - خراطيم مياه فى الأول أظن منعهم وبعدين ضربوا بطوب وبعدين حصل بعض الرش.

دى تقريبا الصورة فيما يختص بحلوان.

الأقسام التانية فى مصنع تانى - اللى هو ١٣٥ - بيدخل نص ساعة بعد دا. كان تقريبا عدد الناس اللى فيه حوالى ٥٠٪، والمصنع دا بعد الهيصه دى ابتدت عمال كثيرة ترجع وينتظموا فى العمل.

سرى للغاية

النسبة كانت بعد الحكاية حوالى الساعة ١١، كان حوالى ٤٠٪ يبيعوا فى هذه العملية، طبعاً الهتافات بتاعتهم كانت أساساً على الأحكام.. إن الحكم خفيف وإن يجب إن الحكم يشتد زيادة عن هذا العمل.
دى كانت الناحية الأولى اللي موجودة فى حلوان، أنا بعت كل التقارير للأخ شعراوى.

عبد الناصر: الجامعة؟

شقيير: يافندم يوم الثلاثاء ساعة ماصدر الحكم، أنا برضه كنت مجتمع بيعض الأساتذة عشان كان تانى يوم بالنسبة ليوم الأربعاء فيه الاحتفال بيوم الطالب العالمى - دا يوم بيرجع لذكرى الاعتداء بتاع صدقى على الطلبة ودا عالمياً أصبح يوم طلاب بتحتفل به جميع الدول - فى هذا الاحتفال قررنا إن ميقاش فيه تجمع. فعلنا العملية فى الكليات أو صممناها على أساس إن كل كلية بتحتفل باليوم عندها وكجزء ضمن المحاضرات، وبعدين المحاضرات بتمشى.

لكن من يوم الثلاثاء بالليل بعد الحكم ماصدر، اتصل بى بعض أعضاء هيئة التدريس وقالوا لى: إنهم بيخشوا بالنسبة لبركه - اللي هو يوم الأربعاء - إن يكون فيه ردود فعل فى الجامعة بالنسبة للحكم؛ لأن بعض الطلبة فى الدراسات المسائية بيقولوا لهم: الحكم خفيف!

على أى حال إحنا رتبنا العملية بتاعة يوم الطالب العالمى ويوم الأربعاء، بالصدفة الدكتور نبوى وأنا كنا فى الجامعة مجتمعين مع لجنة الدراسات الطبية ولحد الساعة ٣. فات الاحتفال بيوم الطالب فى جميع الكليات وخلص، ونزلنا الساعة ٣ كانت الجامعة فى غاية الهدوء.. مفيش حاجة.

الساعة ٥ اتصلت بى الجامعة وقالت لى: إن فى الدراسة بتاعة بعد الظهر من ٢٠ لـ ٣٠ طالب من كلية الهندسة خرجوا من الكلية متجهين الى الجامعة، وبيقولوا: إن الطلبة لازم يعملوا حاجة زى العمال بالنسبة لعملية الحكم.

دخلوا هؤلاء الطلبة لفوا فى الجامعة - الـ ٢٠ أو ٣٠ طالب - محدش طلع معاهم، إنما جم فى كلية الآداب دخلوا لقوا مدرج فيه حوالى من ١٠٠ الى ١٥٠ طالب، دخلوا والطلبة مستنيين الفترة بتاعة المحاضرة التالية، دخلوا ووقفوا معاهم ابتدوا يتكلموا بالنسبة للقضية والحكم وللتضامن مع عمال حلوان، وإزاي عمال حلوان أصيبوا وهم

سرى للغاية

بيعبروا عن رأيهم فى القضية؟! وبعد شوية عملوا مجموعة منهم ممثلة لهم عددها ١٤ واحد واتجهوا الى الجامعة، وبيقولوا: إن هنعتمص لأن لنا مقترحات ولنا مطالب بالنسبة للقضية ولغيرها من الموضوعات.

اتصلت بالمدير والوكيل بتاع الجامعة، وقلت: ناخدمهم يعنى بالراحة وبسياسة ونتكلم معاهم ونشوف الوضع كله إيه، وقالوا لى: منهم مجموعة من الطلبة معينة، منهم طالب من كلية الهندسة - اسمه فريد حسنين - معروف إنه عامل زعامة فى داخل الكلية، وإنه باستمرار يحاول يدفع الطلبة. قلت لهم: نتكلم معاه ونشوف، فضلوا لحد الساعة ١١ بالليل مدير الجامعة ووكيل الجامعة بيتكلموا معاهم. كانوا فى البداية طالبين عدة مطالب:

النقطة الأولى: إنهم يقابلوا سيادتكم يعرضوا هذه المطالب، المدير طبعا قال لهم: هذا غير معقول يعنى السيد الرئيس بتبعتموا له وكل شئ بيصل اليه والسيد الرئيس بيشفه وأى واحد من الشعب بيبدى رأيه، إنما غير معقول إن بنقول الطلبة لازم يروحوا يقابلوا الرئيس والكلام دا كله دا مش مضبوط.

بالنسبة للمحاكمة إبدوا رأيكم فيها. بالنسبة لعملية اعتصام، أنا لا أسمح بعملية الاعتصام مطلقا. قالوا له: وإحنا مش هنعتمص أيضا، وإحنا فى الواقع كنا غلطانين فى طلبنا إننا نقابل مباشرة السيد الرئيس منتصورش إن وقته أو مجهوده يسمح بذلك.

وانصرفوا على أساس إن هيرجعوا تانى يوم الساعة ١٢ فى الجامعة، ومحددين إيه اللي هم عايزينه.. تبقى الصورة اتضحت.

فى نفس الوقت دا، أنا اتصلت بالأخ شعراوى والأخ أمين واديتهم صورة كاملة عن العملية الموجودة، وقلنا: إن من الممكن إنهم إذا حبوا يقابلوا السيد سامى شرف ويبسبوا له ورقة؛ ككل شخص من المواطنين بيضفون ورقة بيدي فيها رأيه سواء بيرية أو بتسليم ورقة.

تانى يوم راحوا الساعة ١٢ كان الموضوع اندرس، وبعدين فى اجتماع السيد أمين هويدى والأخ شعراوى ومديرى الجامعات وفى مكتب السيد على صبرى، وتقرر إنى أروح اجتمع مع الطلبة وأشوف الوضع إيه بالنسبة لهم؛ لأن كانوا مصرين إنهم نازلين عايزين يجوا يقابلوا سيادتكم. نزلت قعدت معاهم من ٢ حتى الساعة ٥، لقيتهم كاتبين ورقة فيها مجموعة من الآراء:

سرى للغاية

بتبدأ بالحاكمة والقضية والحكم الذى صدر فيها، وهو لا يعبر عن المسؤولية اللى وقعت من قادة الطيران. والصياغة اللى هم حاطينها، فنرجو التوضيح لأن الصيغة فقرة حاطين إن الحكم لا يتناسب مع المسؤولية فنرجو التوضيح.

بند ٢: إن بالنسبة لعملية حلوان يجرى التحقيق فيها، قلت لهم: التحقيق جارى فى العملية دى.

بعد ذلك طالبين طلبات:

تقوية البناء السياسى.

مجلس الأمة يحل لأنه لا يعبر عن شىء.

الصحافة.. وحرية الصحافة الى آخره! إنما المدخل لكل العملية هى عملية

القضية، فتناقشت معاهم لمدة ٣ ساعات وطبعا انتهينا.

هم سابوا زملائهم يوم الأربعاء قبل - ودى نقطة نسيت أقولها - قبل مايسيبوا زملائهم قالوا لهم: إحنا هنعمل مؤتمر يوم السبت هنا، ويوم السبت تدوروا علينا لأننا من هنا ليوم السبت جايز نكون اعتقلنا! فيوم السبت فى المؤتمر هتشوفوا إحنا اعتقلنا أو معتقلناش فلانم تسألوا علينا يوم السبت! ودى فى الحقيقة كانت من العوامل اللى بالشكل دا أنا شعرت من أول لحظة فى العملية إن فيه دفع لنا إن احنا نعتقل الأولاد دول أو نتحفظ عليهم؛ لإحداث نوع من الهياج فى الرأى العام داخل الجامعة.

اجتمعت معاهم وتناقشت معاهم.. الى آخره وانتهى الكلام بحضور المدير وحضور وكيل الجامعة وانتهى الكلام. على أى حال فيه أجهزة بتمثل الطلبة بشكل عام، وإن دول إذا أرادوا يعبروا عن أى رأى فيبعبعروا عن الرأى من خلال أجهزة تمثيل الطلبة اللى فى اتحادات الكليات بشكل عام أو وحدات الاتحاد الاشتراكى الموجودة فى الجامعة. الأولاد نزلوا.

اللى أنا لاحظته فى الواقع على التركيب بتاعهم، إن المجموعة مشحونة جدا.. الحكم يجيبوه ويسلسلوا منه كل المسائل اللى هم عايزين يقولوها؛ لا يفتنوا بيتدوا به ويرجعوا له، يلفوا ويربطوا حواليه مسائل مختلفة. أفنعناهم بإن فكرتكم عن الحكم بتوصل للسيد الرئيس ببرقية، وطلعوا.

والشعور اللى قام، إن الولاد إحنا مش واثقين إن كانوا فعلا هينصرفوا نهائيا ولا يوم السبت هيحاولوا إنهم برضه يعملوا المؤتمر ويستثيروا الطلبة، إنما إحنا عارفين إن الطلبة دول من التشكيل بتاعهم فيهم واحد إخوان.

سرى للغاية

عبد الناصر: اللى أنا فهمته إنهم وعدوكم!

شقىر: قالوا: خلاص، إنما أنا مكانش يعنى فىه شعور قوى لدى بهذا الوضع؛ لأن الأولاد مشحونين، ثم من ساعة مسيبناهم لحد تانى يوم أنا لدى شعور إن ممكن تانى حد يآثر عليهم.

بعد ذلك فى اليوم التالى الكلام دا كان يوم الخميس.

عبد الناصر: التركيبية بتاعة الولاد؟

شقىر: التركيبية بتاعتهم يافندم، فىهم واحد اسمه أسامة غيث.. دا عبارة عن طالب أسرته زى ماهو معروف من إخوان مسلمين. لكن أهم من هذا إن الطالب دا وهو بيتكلم معايا، كل أسلوبه وتحليله وكله يكاد يكون فقرات بأسرها منقولة من مسائل إسلامية مترتبة بأحاديث.. الى آخره. بيستعين بحاجات من دى كتير وينفذ منها أو يفسرها تفسير كده ملتوى بطريقة خاطئة، ويحاول ينفذ منها الى إنه يبين خطأ الحكم وخطأ سياستنا وكل هذا!

الطالب التانى اسمه فريد حسنين، دا كان من الطلاب اللى موجودين بيدرسوا فى النمسا وقعد مدة طويلة ولم يوفق هناك. وبعدين بعد ٦٥، بعد سيادتك ماتفضلت وأذنت للطلبة اللى قاعدين بره وعايزين يرجعوا يدرسوا فرجع. الشخصية بتاعته فى الحقيقة شخصية غريبة جدا؛ لأن الولد داخل فى ذهنه عملية إنه زعيم بتاع الطلبة وبيتصرف على هذا الأساس! معاه عربية شيفروليه ضخمة خالص بياخذها رايح جاي، وقاعد باين إنه متميز فى وسط زملائه.

بقية الأولاد التانيين ألوان، ما بين اللونين دا ودا.. يعنى ألوان، بعضهم باين قوى إنه منتمى للعملية الدينية خالص، والبعض التانى باين إنه مرتبط بفريد حسنين ومن نفس المجموعة بتاعته. فى الوسط، فىه مجموعة من الطلبة فى الحقيقة بانة إنها مجموعة ربما كانت مندفعة وأرادت إنها تتسحب من العملية.

إحنا قلنا: على أساس إن يوم السبت بتبقى خطتنا إن ميبقاش فىه المؤتمر دا؛ لأنه هيبقى بداية لعملية تهبيج كبير، إن إذا حدث ودخلوا عملوا مؤتمر مش هنتصدى لهم لا بعملية قمع ولا بعملية ضرب ولا شئ وإنما بنتركهم يعملوا المؤتمرات بتاعتهم، وإنما نحاول بقدر المستطاع أن تكون المؤتمرات فى حدود المعقول. وبحث مع السيد

سرى للغاية

وزير الداخلية، وإذا طلعوا حتى يبطلوا يعبروا عن أنفسهم طول ما هم ماشيين بطريقة سلمية.

فى يوم الجمعة دوت عمليات مختلفة بقت إشاعات بترن، أول إشاعة طلعت الساعة ٩. إحنا جمعنا اتحاد الطلبة، يوم الجمعة اجتمع اتحاد الطلبة برياسة وكيل الجمعة، وقالوا: إحنا يعنى الطلبة دول بنستكر موقفهم.. الى آخره. وإحنا الاتحاد اللي بيمثل الطلبة، وإحنا احتفلنا بيوم الطالب العالمى، موقفنا من القضية بنعبر عنه ببرقية كبقية الشعب مابيعبر، وإن دول لا يمثلوا قيادة.. الى آخره. وبرغم هذا أنا قلت: هذا الكلام لا يعلن، وإنما اتحاد الطلبة بيدخل ويحاول يقنع الطلبة إنه ميحاولش يصطدم اصطدام مكشوف بالجامعة.

فى يوم الجمعة بقى قبل الاتحاد بتاع الطلبة ما يجتمع، جه واحد لف حوالين مكان الاجتماع، وقالوا: دا اعتقل عدد من الطلبة اللي كانوا مجتمعين إمبارح مع وزير التعليم العالى! فطلبة الاتحاد - أو رئيس الاتحاد - طالب كويس موجود هناك، فقال لهم: هاتوا التليفون بتاعهم وطلب أعداد منهم ردوا عليه! فقال لهم: أهو مش معتقلين أهو! فحسينا إن فيه عملية إما لاستثارة الرأى العام بإن الطلبة دول تم حدوث أذى لهم، أو عملية إشعار بخطورة ضخمة بحيث الحكومة فى اليوم دا تتخذ موقف ما. فانت هذه الناحية عليهم.

فى آخر النهار، كانوا برضه يبطلقوا أنواع معينة من الشائعات إن بكره فيه مؤتمر رهيب فى الجامعة و.. و.. الى آخره! لكن كل هذا فى الحقيقة فات فى يوم الجمعة، واستعدينا له على أساس بنجتمع وبنشوف إيه الوضع.

بشكل عام فى نفس الوقت أيضا بالليل، أنا باتكلم مع الأخ شعراوى قال لى: إنه واحد خطاط بلغ الداخلية إن فيه مجموعة من الطلبة وأحد المعيدين فى كلية الهندسة وموظف أو عامل فى جهة من الجهات، راحوا للخطاط يكتب يفظ.. واليفظ بشعارات معينة لكى يسيروا بها فى المظاهرة بتاعة تانى يوم، وإن هم استطاعوا إنهم يضعوا أيديهم على هذه المجموعة.

عبد الناصر: كانت إيه الشعارات دى؟

جمعة: هو يمكن أهم شعار فيهم: الله غايتنا والقرآن دستورنا.

سرى للغاية

عبد الناصر: واقفلوا دور الفساد، أنا سمعت حاجة زى كده.

جمعة: هم كانوا ٣ شعارات. وهو واحد منهم معيد فى كلية الهندسة كان له تاريخ إخوانى؛ لأن وهو طالب صغير اتمسك مع طلبة من الإخوان، فهو سُلم لأهله لأنه كان سنه صغير أيامها. والتانى طالب فى كلية الهندسة، والتالت موظف فى مؤسسة بتزول. التلاتة دول لهم ارتباط ببعض أفراد الجمعية الشرعية، وكانوا بيجتمعوا باستمرار فى جامع الملك. فيه راجل مشهور - خطيب اسمه الشيخ كشك - فكانوا بيجتمعوا عنده باستمرار فى خطبه، وهم قالوا: إنهم يعرفوا بعض من فترة سنة وكانوا يلتقوا دايمًا فى الجوامع.

شقيير: فى يوم السبت يافندم المدير والأساتذة والعمداء وكلهم، كانوا فى الجامعة ابتداء من حوالى ٧ أو ٧ وشوية بالليل. كان أشيع إن لجنة المدينة الجامعية اللى هى لجنة من الطلاب بتدير المدينة بتجتمع وبتحتج على اعتقالات الطلبة. نزلت لهم أحد الأساتذة واتكلم معاهم، وإن مفيش أى طالب اعتقل، وقلت له: هم وهم بيناقشونى بيقولوا الطلبة اعتقلت هذا العام! أنا وأنا بناقشهم قلت لهم: مفيش ولا طالب اعتقل هذا العام غير عدد طالبيين أو ٣ مشتركين فى مؤامرة شيوعية، كانت اكتشفت فى كلية الطب البيطرى كجزء من عملية معينة واحد محامى مدبرها، وإن دول مقدمين للنياية العامة للتحقيق. وإن كنتم تعرفوا أى طالب اعتقل هذا العام بدون ما يكون له أى تهمة غير دول قولوا لنا عليه؛ فلم يستطيعوا مطلقًا إن يدوا ولا مثال، والسيد مدير الجامعة وهو قاعد قال لهم: طيب يعنى إذا الكلام على اعتقالات طلبة وغيره.. مفيش!

بدأ يوم السبت، فى الحقيقة كان فيه احتمال إنهم ميجوش الكذا طالب دول؛ حتى يظهرهم كأنهم اعتقلوا وبالتالي يهيجوا الطلبة. فى الواقع العدد الأكبر منهم حضر، والباقيين كان معروف فى الحقيقة إنهم لم يعتقلوا فى وسط الطلبة برضه.. وبدأت الدراسة ماشية لحد حوالى ٩,٣٠ أو ٩,٤٠، مجموعة منهم تحركت من كلية الآداب وشدت عدد بسيط معاهم، والنقوا مع طلبة فى كلية الحقوق ومنها طلوعوا يلقوا كليات كثيرة. لم يخرج طلبة فى الدراسة معاهم مطلقًا، لكن بمجرد ما ابتدوا يمشوا فيه عدد من الطلبة بقى يمشى معاهم، زى كرة الثلج بتتركب حواليتها على طول الناس اللى يمكن مهماش عايزين فى البداية يعملوا مظاهرة لكن آهى عملية ماشية بيمشوا وراها؛ بهذه الصورة تجمع فى الجامعة ما يقرب من ٢٥٠ طالب.

سرى للغاية

كنت على اتصال دائم بالجامعة بهذا الشكل، بجامعة القاهرة ابتدوا طلوعوا ٢٥٠ طالب دول راحوا كلية الهندسة.. كلية الهندسة مطلعتش معاهم، طلوعوا من كلية الهندسة على كلية الفنون التطبيقية، عدد من كلية الفنون التطبيقية طلع معاهم.. العدد ساعة ماوصل كوبرى الجامعة كان حوالى ٥٠٠ طالب فى هذه الحدود.

مشيوا خط كوبرى الجامعة، والواقع البوليس حرسهم ومشى بيحميهم من الناحيتين. وابتدت العملية، ابتدوا يمشوا على كوبرى الجامعة والأعداد عمالة تتزايد بعد القصر العينى معاهم ثم لوحظ إن المظاهرة اتجهت بعد هذا - بعد ما سابت القصر العينى - الى مجلس الأمة!

فى مجلس الأمة، راحوا هناك وهتقوا طلع لهم السيد أنور السادات وحدث مناقشة بينهم وبين السيد أنور السادات، دخل على إثرها مجموعة منهم يتناقشوا معاه، من هذه المجموعة ظهر فريد حسنين تانى فى المجموعة دى بينما إنه فى الكلية مكانش فى الحقيقة له وجود واضح يوم السبت الصبح اللى هو إمبراح.

وخذوا نقاش طويل مع السيد أنور السادات - معنديش التفصيل بتاعه - ثم فى أثناء النقاش مع السيد أنور السادات، انقسمت مجموعة منهم تانى ونزلت فى شارع القصر العينى متجهة الى ميدان التحرير.

فى ميدان التحرير ابتدوا برضه يتشعبوا؛ شُعب نحو باب اللوق ثم مجموعة اتجهت فى شارع رمسيس.. الى آخره. وابتدى التركيب بتاعهم يتغير، من طلاب فقط الى طلاب بينضم لهم ناس من الشارع.. الى آخره، ويحاولوا يتجهوا الى محطة باب اللوق لكى يستتوا العمال اللى جايبين من حلوان!

الهتافات، برضه هتافات فيها أشياء كثيرة لكن اللون بتاع الهتاف نفسه واضح برضه فيه تأثير الإخوان المسلمين بشكل واضح بالإضافة الى هتافات أخرى.. القضية بتبتدى كمدخل ثم ينفذوا منها لأشياء عديدة كثيرة.

راحوا جريدة الأهرام، وتجمهروا حواليتها وحاولوا ينزلوا فى شارع شريف، يعنى تفصيل السيد وزير الداخلية عارفه أكثر تفصيلا من اللى أنا عرضته.

بعد هذا إمبراح برضه اجتمعت، وكان فيه معلومات من جميع الجهات إن تانى يوم هيبندوا يعملوا مؤتمرات مرة أخرى. هسيب دول دلوقتى وأرجع لعين شمس.

عين شمس، حدث فيها برضه فى كلية الهندسة أول النهار اجتماع، بدأ بأن زملاء لهم اعتقلوا، فأنا اتصلت بمدير جامعة عين شمس ونزل مدير جامعة عين شمس

سرى للغاية

راح وفضل فى الحقيقة معاهم طول اليوم حتى الساعة ٥ موجود وياهم، وكان دا أكبر مركز متجمعة فيه عين شمس الباقي كله مكانش فيه حاجة.

عبد الناصر: مكانش فيه حاجة.

شقيير: هندسة عين شمس بالذات كان فيها التركيز، لوحظ فى هندسة عين شمس عدة ملاحظات لأن أنا حتى يعنى من المدير ومصادر كثيرة من الأساتذة..

الملاحظة الأولى: كل الخطب اللي بتقال والكلام اللي بيقال فيه تركيز على القضية، ثم ينفذ منها الى بقية الأشياء؛ يعنى الجميع مجمعين بيبتدوا من دى ويسرحوا فى حاجات تانية.

عبد الناصر: قل لنا إيه الحاجات التانية برضه.

شقيير: الحاجات التانية يافندم، بيتكلموا بالنسبة لحرية الصحافة، لعدم الاعتقالات، عملية المخابرات ودولة المخابرات، بيتنقلوا منها الى مجلس الأمة وإن مجلس الأمة لا يمثل شئ.. الى آخره، وهذا المجلس لا بد من حله. بيتكلموا منها على تقوية التنظيم السياسى، البعض طالب منهم قام نادى بحل الاتحاد الاشتراكى فقعدوه.. يعنى تصدوا له هم نفسهم منهم وقعدوه، وقالوا له يعنى: إن الاتحاد الاشتراكى دا العملية السياسية بتاع البلد نطالب بتقويته إنما ميمكنش نقول حله.. دا بشكل عام اللي كان بيدرس هناك.

لوحظت عدة أشياء تثير الانتباه فى اجتماع هندسة عين شمس، وأنا بطرحها بالذات لأنها شئ معين:

الطلبة اللي موجودين هناك كان واضح إنهم اتفقوا على هذا الاجتماع فى صلاة الجمعة عند الشيخ كشك دا.. ودى عملية كانت معروفة بشكل عام. النقطة التانية: جالى النهارده بيانات من بعض الموجودين، أنه كان يوجد هناك مش طلبة بس وإنما بعض موظفين من الخارج.. منهم موظف من شركة الشرق للتأمين، وأن هذا الموظف كان بيوقف مع الطلبة ويقول لهم: إحنا سبب النكسة فى الحقيقة لأننا متمسكناش بديننا.. الى آخره.

سرى للغاية

لما كانوا يجتمعوا ويناقشوا - بعد ما يقرب من ٣ ساعات - نقاش مدير الجامعة، يعنى قال لهم: أرجو عدد منكم بنجتمع عشان نبلور ونقدر نتكلم وحددوا الأفكار اللى أنتم عايزين تعملوها وتبعتوا بها برقية نصيغها، فاختاروا خمسة ودخلوا معاه الخمسة. كان يلاحظ إن منهم عدد لم يكونوا يتفقوا على شئ مع المدير إلا لو خرجوا ورجعوا تانى.. يعنى بيخرجوا بره ويرجعوا تانى للمدير! فكان واضح بهذه الصورة إن ميقدروش يدوا كلمة إلا بالرجوع لشخص آخر!

الطلبة الموجودين كلهم، لما سألت برضه وزير الداخلية عن اتجاهات لهم، طبقت الصورة اللى قامت لى إخوانا بتوع الجامعة اللى كانوا موجودين هناك، وإنهم طلبة فيهم نوع من ترديد لشعارات إحدى الجمعيات الدينية يقال إنها الجمعية الشرعية أو جمعية على صلة بالجمعية الشرعية.

وبعدين فى الآخر، اتفقوا إن الخمسة دول حددوا أشياء معينة كتبوها فى ورقة

منها:

١- المحاكمة، إعادة النظر فى المحاكمة.

٢- مسألة حلوان.

٣- مسألة الطلبة واعتقال الطلبة.. الى آخره، ولحد هذه اللحظة اللى هم كانوا

بيكتبوا فيها هذا مفيش طلبة كانوا اتمسكوا أو اعتقلوا.

٤- بعدين حرية الصحافة.

٥- بعدين أيضا نقطة مجلس الأمة.

ويلاحظ هنا تشابه تام ما بين كل النقط اللى ابتدت فى جميع هذه الاجتماعات،

ودا الظاهرة الغريبة إن كل العناصر دى متشابهة، يتناقشوا وفى الآخر مصرين على

هذه النقط! وبعدين نزلوا وصلوا لمكتب الأخ سامى شرف وصلوا له ورقة بهذه المطالب.

ده بالنسبة لجامعة عين شمس.

جامعة إسكندرية، برضه إحنا من يوم الخميس ابتدأنا نشوف الوضع فيها هى

الأخرى احتمال يقوم فيها شئ، وبالفعل أخذت ترتيبات برضه إن الدراسة تبدأ.. الى

آخره. لكن فى البداية طلعت كلية الزراعة تجمعت، وقالوا: إن الطلبة عايزين يطلعوا

يعبروا عن رأيهم فى الحكم. فاتصلت بالسيد مدير جامعة إسكندرية، ونزل راح لهم

ووصل لحد الاتحاد الاشتراكى، وهم مشيوا فى مسيرة أو فى مظاهرة وصلت حتى

الاتحاد الاشتراكى. وهناك خطبوا واتكلموا فيهم وسلموا برضه مقترحاتهم خاصة بالذات

سرى للغاية

للقضية. والمجموعة دى، أكدت تأكيد الثقة فى القيادة، والحرص على إن القيادة تعيد النظر فى القضية لأن دى مطلب شعبى.. الى آخره.

إمبارح كان واضح من كل العمليات اللي عندنا، إن الوضع مكانش هيمكن إن هو هيفضل مستقر، وإن بكره هتكون فيه عمليات مظاهرات واجتماعات فى كليات.. الى آخره.

ففى اجتماع إمبارح، تقرر إن فى أضيق الحدود المجموعة اللي كانت قائدة للمظاهرات - بالنسبة لإمبارح - يتحفظ عليها. وإن بعد كده بيصدر بيان بتاع وزير الداخلية، وإن البوليس هيبقى بعيد عن الجامعة وإن كان هيراقب.

وبدأنا النهارده.. فى بداية النهارده، الواقع البوليس أخذ موقف كويس جدا؛ كان بعيد عن الجامعة لدرجة كبيرة، فيما عدا لحظة لما الطلبة جم وبقى فيه الغازات يمكن بقى فيه قرب، لكن على طول بعد الطلبة مادخلوا الجامعة لما ألقى الغازات عليهم رجع البوليس تانى بعيد؛ ولذلك فى الحقيقة مكانش فيه عملية استفزاز من البوليس للطلبة الموجودين فى داخل جامعة القاهرة.

بعدين لوحظ النهارده إن بدأت العملية بطلبة سوريين! ودى نقطة أيضا بضيفها لمجموعة النقاط المتصلة بتركيبة الطلبة اللي بدأوا، متصلة بنوع الهتافات، متصلة بالظواهر اللي حدثت فى اجتماع جامعة عين شمس. فبدأت العملية النهارده بطلبة سوريين خرجوا من كلية التجارة جامعة القاهرة - عدد بسيط - وابتدوا يلقوا فى داخل الحرم الجامعى. محدش فى البداية استجاب لكن شوية شوية مع معرفة إن فيه بعض الطلبة تحفظ عليهم، بقوا يستخدموا هذه النقطة كنقطة جوهرية فى إثارة زملائهم!

لكن بشكل عام ابتدت العملية العدد يزيد، وابتدوا جم طالعين كانوا عندما طلغوا حوالى ٣٥٠ واحد، لما جم طالعين اتسابوا خالص لحد ما وصلوا كوبرى الجامعة، فلما البوليس حاول يفرقهم راحوا راجعين تانى جرى على الحرم الجامعى! واستمرت العملية بدرجة فيها غليان كبير! منهم دخلوا للمدير وقالوا: يعنى إخوانا اللي متحفظ عليهم.. والى آخره لازم نعرف إيه جرى لهم؟ وبعدين بمجهود ضخم جدا وبإن جعلنا البوليس حتى يبقى فى شارع الجيزة مبيقاش حتى عند تمثال النهضة، ابتدوا يطلعوا ويمشوا ومشوا. وبعدين نزلت المظاهرة بتاعتهم شوية شوية لحد ماوصلت القصر العينى، واللى بعد كده شنتت بواسطة البوليس.

إسكندرية النهارده مفيش فيها أى شئ.

سرى للغاية

طلبة الهندسة موجودين الآن معتصمين فى قلب الكلية حاليا، وإحنا لم نتعرض لهم طول النهار وبالذات طلبة الهندسة.

عبد الناصر: هندسة إيه؟

شقيير: هندسة القاهرة معتصمين وموجودين هناك. العميد موجود فى الكويت حاليا والأساتذة والوكيل جميعا موجودين بيهدوا حاليا فيهم، ويعنى سايبينهم لحد منشوف بالليل هنعمل إيه؟

جمعة: طبعوا قرارات ووزعوها فى الأتوبيسات.

شقيير: دول بتوع هندسة، القرارات دى برضه بالصورة بتاعتها مبتدية بالقضية، ومرتجة من القضية الى المسائل الأخرى اللي ذكرناها.
بالنسبة النهارده لعين شمس، العملية أساسا برضه كانت مركزة فى الهندسة فى نفس المجموعة.

عبد الناصر: كل الطلبة معتصمين ولآ؟

شقيير: لا.. فيه يافندم فى الهندسة اللي معتصم حوالى ألف طالب معتصم حاليا، والواقع بالذات يعنى إحنا بنعاملهم معاملة طيبة مع الحزم يعنى. الأساتذة مبيينين لهم إن دا خروج على النظام.. الى آخره، لكن بيعاملوا هناك معاملة مافيهاش أى شئ من الإثارة.
طلبة عين شمس برضه هى كلية الهندسة، وكلية الهندسة طلع منها الصبح مجموعة وشتت ومجموعة تانية.. وشتت. وكانت فاضلة مجموعة ضئيلة حضرت الدراسة، وبعدين فضلت فى قلب الحوش مستتية، ولحد ما جيت مكانش فيه عندى علم عن هذه المجموعة تم بالنسبة لها إيه.
بقية الطلبة فى جامعة عين شمس، مفيش حاجة غير تجمع جوة الحرم وبعدين طلغوا انصرفوا ومشيووا.
جامعة إسكندرية النهارده، مافيهاش أى شئ، وجامعة أسيوط أيضا مافيهاش أى شئ.

سرى للغاية

بالنسبة يافندم لنقطة برضه بحب أضيفها للنقط دى كلها، إن الطلبة قيل: إن فى يوم الأربعاء فى المظاهرة بتاعة العمال كان من المجموعة اللى بتقود الناس يقولوا: الاتجاه لمجلس الأمة! كان حتى من حلوان ربما العملية على إنهم يروحوا مجلس الأمة. طلبتنا لما نزلوا إمبارح، الاتجاه واضح إنه رايح مجلس الأمة، بعدين هل هم بيحبوا مجلس الأمة؟! دا بيطالبوا بحله فى كل القرارات بتاعتهم! اللى أنا بشعر به من وراء هذا، إن فيه عملية دفع معينة يراد بها إحداث ضغط على مجلس الأمة؛ لكى يكون اجتماعه يوم الثلاثاء الجاى نتيجة للاستفزاز اللى بيعملوه له إن دول مش بيمثلوا الأمة و.. و.. إن مجلس الأمة يضطر معاهم إن يتحرك لكى يتخذ موقف يبقى فيه بيناصر نفس الاتجاه اللى هم ماشيين فيه!

يعنى بعبارة أخرى، وسيلة أخرى.. مظاهرة أخرى بيحركوها بواسطة مجلس الأمة ضد البلد وضد النظام دا بشكل عام. يافندم الصورة بعد الظهر النهارده، المحاضرات شغالة فيها يعنى..

عبد الناصر: لكن الصبح نزلوا مع الطب.. تجارة نزلوا.

شقير: عدد من التجارة نزل، ماهى التجارة دى اللى هم السوريين بتوع الصبح اللى اتجمعوا، دول اللى طلوعوا ومشيو للقصر العينى وخدوا طلبة الطب. فيه ظاهرة أخرى يافندم برضه، بتطلع فى أثناء المظاهرة إشاعة إن الطلبة انضربوا بالرصاص! والواقع اتصل بى أساتذة الطب وعميد كلية طب، وقال لى: إحنا جالنا طالب الآن بيقال إنه مضروب برصاص. قلت له: هل واضح فى دماغه ضرب رصاص؟ بتقدروا تشوفوها؟ قال: لا.. دى تبان بالأشعة وأنا حولته على طول للأشعة، أنا عارف إن فيه أمر من الأخ شعراوى إن مفيش جندى معاه رصاص النهارده.

عبد الناصر: مفيش بنادق!

شقير: فيه نقطة هنجيبها توضح يافندم، اتخذ وكشف عليه وقلت: يتعمل له صور لكل الجرح والكلام دا. وفعلا قسم الأشعة صور بالكامل الإصابة من أولها وآخرها والصور موجودة عندنا؛ هى عبارة عن خبطة طوية يحتمل إنها تكون طوية جاية من بره جاية من الخارج أو طوية من الطلبة أنفسهم.. يعنى يا طوية مرتدة - زى ما يقولوا - من الطلبة وهم

سرى للغاية

بيضربوا يا طوية من اللى بره سواء كان تصورنا إن البوليس بيضرب بالطوب ودا معتقدش أو طوية جاية..

عبد الناصر: لما مش بيبقى معاه بنادق، هيضرب بالطوب هيعمل إيه؟! هى أبعد مدى من العصاية!
(ضحك)

شقير: هو النهارده يعنى العدد اللى عندنا من حيث الطلبة والبوليس، يمكن لأول مرة إن عدد المصابين من البوليس ثلاثة أضعاف المصابين من الطلبة! مصابين بمعنى جروح. فيه ٢١ طالب اللى فى جميع مستشفيات القاهرة كلها، وفيه ٦٧ رجل بوليس موجودين، وفيه ١٥ عامل وموظف من اللى كانوا موجودين فى وسط الهيصة.
المظاهرة لوحظ برضه إنها بتضم - بتاعة القصر العينى النهارده - بتضم برضه ناس لابسين جلابيب وستات.. الى آخره دخلوا فى العملية!
دا بشكل عام الكلام دا يمكن أنا عرضت فيه بشكل عام.. عرضت جوانب يمكن متصلة بالداخلية إنما هى المدخل بتاع الطلاب يعنى.

عبد الناصر: هو الحقيقة إمبراح أنا فى كلامى مع شعراوى، قلت له: بيسيب الناس قلت له: إنه قد يكون الهدف إنك تموت حد، وإن لا تتعرض للمظاهرات مهما عملوا إن شاء الله خربوا إلا بأمر منى أنا شخصيا. لغاية ما نزلوا فى وسط البلد بقى فى شارع شريف وراحوا عمارة الإيموبيليا وطلعوا على الأهرام، وابتدى الوضع الحقيقة بيبان إنه هيفلت فأنا قلت لشعراوى: إدى إنذار.. نبه عليهم إن المظاهرات انتهت ويتفرقوا، وبعد نص ساعة إذا متفرقوش استخدم القوة.. القوة هنا كانت برضه هى العصى والقنابل المسيلة للدموع.

وابتدت الهتافات بقى تخرج عن الهتافات اللى كانت ماشية الصبح؛ يعنى الهتافات اللى كانت ماشية الصبح كانت كلها هتافات مضبوطة يعنى ولو باين إنها مترتبة لأن فيها سجع. وأنا كنت حريص قوى أعرف طول الوقت ما هى الهتافات؛ لأن الهتافات بتدل على سير العملية. وقلت له: المتظاهرين بعد التنبيه عليهم بيتمسكوا، وأظن دا اللى حصل إمبراح وانتهت العملية.

اتمسك عدد من القادة بالليل، وطلع البيان بأن النهارده لا يسمح بأى تظاهر بعد البيان مهما كان، ولكن أيضا مع عدم ضرب نار. والحقيقة دا كان عبء كبير قوى على البوليس؛ لأن هو ضرب النار ولو رش صوته لوحده بيخلى الناس تجرى وهو

سرى للغاية

البوليس اتزنق وهو عند الكوبرى والولاد يمكن تغلبوا عليهم فى عملية الكوبرى؛ لأن مش معاهم بنادق، والعملية فضلت تتصاعد فى الحقيقة من الصبح لغاية العصر، وحرقوا لورى للبوليس فيه واحد مات.. فين؟

جمعة: فى العباسية، طلع ترزى.

عبد الناصر: مات إزاي؟

جمعة: هم قالوا لى: انضرب بطوية ولأ حاجة، فوقع وبعدين الناس عدت عليه.

عبد الناصر: اللى لوحظ أيضا بعد الظهر إن الناس انضمت للمظاهرات، ودى ملاحظة ثانية بالذات فى حى المنيرة، كان العدد كبير فى شارع القصر العينى، وبعدين لما نزلوا على جاردن سیتی.. الى آخر العملية.

القيسونى: وفى غمرة دلوقتى يافندم عدد من الدهماء بجاليب ماشيين موقفين المرور، بيكسروا فى الزهريات اللى موجودة فى شارع رمسيس.. الزهريات اللى فى وسط الطريق!

عبد الناصر: الساعة كام؟

القيسونى: دلوقتى، وأنا جاى حالا الساعة ٧.

عبد الناصر: الملاحظ إن بعد الظهر طلعت - يعنى أنا لما كنت برضه بسأل شعراوى - المظاهرة طالعة من القصر العينى نازلة الى ميدان التحرير، وبعدين طلوعوا على جاردن سیتی وبعدين نزلوا ميدان التحرير، وبعدين بقى فيه حاجة عند ميدان رمسيس، وبعدين فيه حاجة عند شارع عبده باشا، وبعدين كان فيه حاجة فى شارع أحمد سعيد، وبعدين كان فيه حاجة فى غمرة!

وأنا الحقيقة كنت بنتبع يمكن مش من شعراوى من الإشارات بتاعة بوليس النجدة؛ بيدى الصورة عندى فى المكتب فبعرف إيه الحاصل. وبعدين بيطلعوا من هنا

سرى للغاية

بيخنفوا وفى ناس بتطلع من هنا، وميقاش الموضوع الحقيقة موضوع طلبة وكان فيه فى القصر العينى أيضا عدد بهذا الشكل، مفيش حد عنده معلومات تانى؟

المهندس: هو فيه ملاحظة الدكتور لبيب نسيها، فيه طالب من بتوع القصر العينى جه برصاص وطبعا البوليس ماضربش رصاص إطلاقا ودى حالة فردية واحدة. فدا بيورى دلالة إن فيه حد من الناس اللي كانوا موجودين عاوزين يستثيروا وضربوا رصاص! هى جت فى الدراع كده.. جت فى الجلد من فوق كسرت العظمة دى. الحالة مش بتاعة رأسه اللي طلعت طوبة دى هى الحالة الوحيدة اللي كانت رصاصه. دا بيورى والبوليس عنده تعليمات لأنه لو كان البوليس أو غيره كان هيبقى أكثر من حالة حصلت، إنما دى الحالة الوحيدة اللي حصلت.

عبد الناصر: اللي أنا فاهمه البوليس مش معاه بنادق.

المهندس: ما أنا بقول - والأخ شعراوى عرف الحكاية دى - فدا دليل على إن فيه حد من المخربين لما لقي إن البوليس بالكامل معملش أى حاجة ضرب هذه العملية، والأخ الدكتور لبيب كان عاوز يقولها بس نسيها فى الموضوع.

الملاحظة الثانية: اللي برضه من عدد الإصابات اللي قالها الدكتور لبيب، دليل يؤكد إن البوليس كان هو المعتدى عليه؛ يعنى فيه ٦٧ منهم مساعد الحكمدار اتعور دول حالات الإسعاف لحد الساعة ٥، والطلبة كان كلهم مجموعهم ٢١ كلهم إصاباتهم خفيفة، وكان فيه ١٥ من العمال!

وكانت التجمعات - زى ما سيادتك شفت - التجمع بتاع عبده باشا دا طلع مشى فى شارع أحمد سعيد، وبعدين نزل على الظاهر، وبعدين نزل تانى شارع رمسيس واتلمت عليه الدهماء، فى الوقت اللي طلبة كلية الهندسة موجودين كانوا فى كلية الهندسة. مدير جامعة عين شمس اتصل برضه بالسيد وزير التعليم العالى، قال له: إن فيه ناس من الناس دخلوا حوش كلية الهندسة كناس من غير الطلبة.. العملية مش طلبة بس!

سرى للغاية

عكاشة: أيوه يافندم.. اتصل بى مكتبى بعد الظهر الساعة ٥، وأخبرونى إن رئيس مجلس إدارة الشرق القومية للتوزيع - الأستاذ سعد وهبه - أصيب بطلق نارى وهو يطل على مظاهرة من مكتبه فى شارع فؤاد الأول. فانتقلت الى المستشفى وعقبال ما انتقلت له كان أجريت له عملية، ودخلت رصاصة فى صدره بس تحت الجلد ولم تصل داخل جسمه واستخرجت الرصاصة. وقابلت الطبيب وسألته.. هل دا رش ولا رصاص؟ قال لى: لا.. دى رصاصة طبنجة! فى مستشفى الهلال.

وبعد كده خرجت من عنده وجدت عنبر فيه عدد من الطلبة المصابين، فدخلت وقلت: إن أنا هتكلم معاهم وأشوف هم عايزين إيه؟ وجدت إن أغلبهم من كلية الطب وواحد من معهد التربية. وباختصار التحليل اللى قاله الدكتور لبيب شقير، هو فى واقع تحليل سليم لكافة الاتجاهات اللى سمعتها فى حديثى مع الطلبة ولكن بإيجاز. أستطيع أن أقول: إنهم فيهم ٣ مصابين بالرصاص - والأطباء كانوا موجودين - أحدهم فى ساقه، والثانى فى أردافه، والثالث فى ساقه برضه وأخذ رصاصة فى ساقه، واثنين واخدين شومة فى بطنهم! وزى ما قلت لسيادتك: عدد ٤ من الطب وواحد من معهد التربية.

قعدت أتكلم مع كل واحد فيهم، قلت لهم: أنتم خرجتوا ليه.. إيه السبب؟! إنتم أعلنتم عن رأيكم إمبراح، وبعدين الصحافة تانى يوم - اللى أنتم بتقولوا مهياش حرة - قالت إنتم خرجتم ليه؟! وهو أنكم غير راضين عن الحكم بتاع قضية صدقى محمود، فدا بلغ رئاسة الدولة، وطبعا هتاخذ إجراء وعلم الرأى بتاعكم ومنع المظاهرات لأسباب تتعلق بالأمن؛ فكان يجب إن إنتم تستجيبوا للبيان اللى نزل بمنع المظاهرات، إنتم أخطأتم وخرقتم القانون. فقالوا: لا.. دى مش مظاهرة دى مسيرة؛ فدخلنا فى نقاش طويل بين الفرق بين المظاهرة والفرق بين المسيرة. الكلام طبعا أولاد صغيرين بتوع ١٨ سنة ١٩ سنة، مش قادرين يميزوا بالضبط إيه الفرق بين الاتنين أو يحاولوا إن هم يتحايلوا يعنى على الكلام دا!

وبعدين قلت لهم: طب خرجتوا ليه النهارده؟ قالوا: لأن محدش رد علينا، إحنا كنا منتظرين السيد رئيس الجمهورية يعمل عمل أو يرد علينا أو يتكلم فى التلفزيون أو يتكلم فى الراديو يطمئن كل الشعب عشان نعرف إن هو مدرك تماما الرغبة بتاعتنا؛ لأن فيه عدم توازن فى الصحافة، بينما بتفرد صفحات طويلة لقضية الغرض منها كان إعادة شخص الى مكان ما وهو المشير عامر.. بينما تفرد صفحات والتعليقات الطويلة فى

سرى للغاية

الصحافة لهذا الموضوع، لا يفرد فى الصحف أى شئ أو ينقل أى شئ عن قضية مات فيها حوالى ١٠ آلاف نفس بالإضافة الى الخسائر والهزيمة اللى حصلت! وإحنا بنعتبر إن صدقى محمود هو المسئول عن النكسة؛ لأن السيد الرئيس فى أكثر من إعلان للشعب قال فيه: إن المسئول عن هذه النكسة هو سلاح الطيران لأنه لم يقم بالواجب بتاعه، وإن سلاح الطيران دمر فى الساعات الأولى من الحرب ولذلك تقريبا المعركة كانت مفقودة قبل أن تبدأ.

عبد الناصر: أنا مقلتش المسئول عن هذه النكسة!

عكاشة: دا الكلام اللى قالوه يافندم.. أنا بحكى لسيادتك إيه اللى حصل بأمانة. وبعدين كلهم مجمعين على أن سبب خروجهم هو عدم اطمئنانهم للمحكمة اللى قضت فى الحكم بتاع صدقى محمود! وإن الضباط بتساعد بعضها وإن كان يجب إن دا يسند الى محكمة مدنية، قلت لهم: مفيش جيش فى العالم بيسند المحكمة العسكرية الى قضاة مدنيين! وإلا نبقى إحنا بنضرب مثل مهواش سليم!

هو جرت العادة إن المحكمة العسكرية لابد أن تشكل من عسكريين ولا بد أن تتقوا إن هذا الحكم حكم سليم، وإحنا منعرفش الحثيات والقاضى اللى حكم فى هذا الحكم له أسبابه لا شك، وإحنا لسه منعرفهاش لغاية دلوقتى. ولكن هتعلن لكم فى الوقت المناسب. فقالوا: ١٥ سنة؟! وذكروا إن اللى بيحشش بياخد ١٥ سنة، وإن غير معقول إن قضية فيها إهمال بهذا الشكل إن هذا الإهمال يساوى إهمال عادى، بل إن هذا الإهمال يرقى الى مرتبة الخيانة، وإن بعد ١٥ سنة بعد ما يقعد أسبوعين أو ثلاثة هذا الضابط لو صدقى محمود هيرجع الى المستشفى ثم الى بيته ثم الى أوروبا عشان يمضى الفترة بتاعته فى الخارج.

دا الكلام واشترك فيه الممرضات وهم واقفين، يعنى كانوا مبسوطين جدا والناس اللى حوالينا مبسوطين قوى من الكلام اللى بيقولوه الطلبة عن هذا الموضوع.

وبعدين الكل مجمع على إن محتاجين - لأن فيه فراغ دلوقتى - عايزين يعرفوا رأى سيادتك - بيطالبوا إن سيادتك تطمئن الناس - ولكن الكل اللى كان موجود بيقول إحنا محتاجين لعبد الناصر ولا نستطيع أن نستغنى عن عبد الناصر وقيادته هى القيادة السليمة - أنا بكرر بالضبط الكلام اللى قالوه - ولكن إحنا لا نثق فى حد غير عبد الناصر شخصيا لا نثق أبدا ولذلك إحنا عايزينه هو يقول لنا، لما هو يقول لنا إيه

سرى للغاية

الحقيقة إحنا هنسمع كلامه. إنما إحنا لا يمكن نقبل هذا الحكم وإحنا عارفين أهالينا فى بيوتنا مازالت تبكى على ضحاياها، ومازالت تبكى على الهزيمة اللى احنا منينا بها.. الى آخره.

وبعدين اتكلموا على موضوعات استطردوا منها - زى ما قال السيد لبيب شقير - عن موضوع اعتقالات، وذكروا واحد اسمه رشيق وفريد حسنين، وبيقولوا: إحنا إذا خرجنا من هنا برضه هنطلع مظاهرة تانية الى أن إخوانا يعودوا. الحماس دا أنا أفهمه يعنى من شباب فى سن ١٩ و ٢٠ حماس محمود بالعكس يجب إن هو..

عبد الناصر: دول لازم بيقوا هندسة لأن رشيق دا فى الهندسة وفريد فى الهندسة.

عكاشة: ولا واحد هندسة فى اللى كلمونى!

عبد الناصر: لا.. الاتنين دول فى الهندسة.

عكاشة: إنما كل اللى موجودين طب اللى موجودين فى مستشفى الهلال، وإن اللى بلغ عنهم أنور السادات.. الأستاذ أنور السادات؛ دا الكلام بتاعهم يعنى لأنه هو الوحيد اللى يعرفهم بالاسم.. دا الكلام اللى قاله أحد الطلبة الموجودين يعنى.

وبعدين استغربوا قالوا: إحنا جيل الثورة مكناش نتصور إن العسكرى المصرى يضرب المواطن المصرى، ودا شئ إحنا يعنى بيخلينا نتذكر الكلام اللى بنقراه فى التاريخ عن أيام المظاهرات اللى كانت بتطلع أيام صدقى، ونقول: إن نفس الأيام دى عادت من جديد.

والظاهرة الغربية إن عدد من هؤلاء الناس المصابين من منظمات الشباب! يعنى ٢ منهم من الموجودين من منظمات الشباب! دا استرعى انتباهى برضه. وبعدين اتكلموا على مجلس الأمة - زى ما قال الدكتور لبيب شقير - قلت لهم: فاضل ٤ شهور، بدل ما يتحل مجلس الأمة ويقال: إن مجلس الأمة اتحل يستمر فى المدة بتاعته و ٤ شهور مهياش يعنى زمن طويل فى تاريخ أمة! قالوا: لا.. فى الوقت الحالى إحنا نعتبر ٤ شهور دول أهمية كبيرة، وإحنا لا نتق فى المجلس ولا يمتلنا على وجه الإطلاق.

سرى للغاية

وبعدين اتكلموا على التغييرات اللي بتحصل وأسبابها، بيقولوا: على صبرى خرج من الاتحاد الاشتراكي وبعدين رجع تانى الاتحاد الاشتراكي! إنت خرجت من وزارة الثقافة وبعدين رجعت تانى وزارة الثقافة! مذكور أبو العز جابوه فى الطيران وبعدين خرج من الطيران ليه؟! ما هو لازم نعرف ما إحنا مش حيوانات إحنا لابد إن نعرف إيه الأسباب بتاعة خروج الناس دى وعودة الناس دى تانى.. دا الكلام اللي اتقال يعنى.

وبعدين اتكلموا - واحد فيهم - على أحمد سعيد ليه خرج؟ بينما إن الدول الأجنبية والدول الاستعمارية مستعدة إنها تقطع رقبتة وأى شخص يقدم رقبتة ممكن إن هى تجزيه خير الجزاء! فى الوقت ده اللي هذا الشخص مطالب بدمه فى وسط الاستعمار، إحنا نيجى نخرجه من الوظيفة بتاعته ونهمله ونهينه؟! ويعنى اللي فهمته منهم إنه وصل الى درجه البطولة!

أحمد سعيد وصل فى رأى هذا الطالب اللي كان بيكلمنى فى كليه الطب على وجه التحديد، كأنه بطل كبير! وإنه ساعد فى صوت العرب على إعلاء كلمة مصر إعلاء القومية العربية.. الى آخره.. الى آخره. وإنهم عاوزين يعرفوا ليه هذا الشخص خرج؟ لأنه حتى الآن فى نظرهم عبارة عن بطل فكان لابد إن حد يقول لهم إن هذا الشخص مش بطل وإيه أسباب الخروج بتاعته.

ده الكلام اللي بيقولوه، وبعدين واحد فيهم، ده بتاع كليه التربية أو معهد التربية على ما أذكر بيقول لى أنا..

عبد الناصر: هو فيه معاهد خرجت النهارده؟

شقيير: طالب فى السكة معاه.

عكاشة: هقول لسيادتك: قال لى: أنا مكنتش داخل مظاهرة ولكن كنت رايح السينما الصبح! قلت له: يعنى مزوغ؟! قال لى: لا.. يعنى كنت رايح سينما وبعدين لقيت مظاهرة فى شارع فؤاد ولقيت البوليس بيضرب فى زملاى، فانضميت لزملاى بدافع من المروءة ومدخلتش السينما وانضربت بالرصاص فى ساقى - خد رصاصه فى ساقه - وبعدين بيقول: بقى يعنى فى الوقت اللي احنا موجودين فيه دلوقتى مكانش يصح أبدا إن يبقى فيه مسارح وسينما! قلت له: مش كنت رايح السينما الصبح! (ضحك)

سرى للغاية

وبعضهم إتكلم برضه على قتلى فى حلوان، فأنا أنكرت.. قلت لهم: مفيش أى قتلى فى حلوان أوكد لكم أنا كوزير مسئول إن لم يحصل أى قتلى، ودى إشاعة موجودة فى البلد بيروجها ناس من ذوى الأغراض وده مش حقيقى إطلاقا، وإن كل المصابين خرجوا وزى ما قريتوا فى الجرايد مفيش أى حاجة زى كده.

وبعدين اتكلموا عن إن احنا غير شاعرين إن فيه إصلاح جدى! فاتكلمت يعنى بتوسع شوية مع الحرص الشديد، على إن عملية الجيش وعملية القوات المسلحة وبناءها بنتم بطريقة مختلفة تماما، ولكن مش من مصلحتنا دلوقتى إن احنا نعلن عن سير العملية دى.

ولكن أوكد لكم إن رئيس الجمهورية بشخصه هو المتولى عملية بناء الجيش والقوات المسلحة، وفى وقت اللزوم القوات المسلحة هتؤدى الواجب بتاعها أما تكون جاهزة لهذه العمليات.

وإن الإيجابيات بتاعة الهزيمة المريرة اللى احنا منينا بيها، إن احنا عرفنا إن احنا كنا عايشين فى illusion! وده درس يجب إن احنا نستفيد منه علشان إصلاح أنفسنا وعملية الإصلاح جارية. قالوا: مش حاسين بيها! قلت لهم: الإصلاح بياخد وقت ولكن زى ما إنتو شايفين.

اتكلموا بقى على المناصب الكبيرة والقيادات، قلت لهم: كبار الناس ٣ وزراء موجودين فى قفص الاتهام وبيحاكموا علنا وبينتشر فى الجرايد كل شئ خاص بيهم وبنحرفتهم. إذا كانت الدولة مش ناوية إن هى تمضى فى عملية الإصلاح والقضاء على الفساد مكانتش نشرت هذه الأعمال!
بس هى دى تقريبا النقط.

وأنا خارج الدكتور بيقول لى: فيه واحد منهم أو اتنين جايز اللى انضربوا بالشوم ممكن إن هم يخرجوا النهارده، ولكن البوليس مستنهم علشان يقبض عليهم! فقلت له: متخرجهمش! (ضحك)

حسونة: هو فى الواقع يعنى سيادتك بدأت بقضية صدقى محمود والأخ فوزى أوضح حكم القانون واختصاص المحكمة والظروف اللى لبست الموضوع.

أنا فى الواقع طبعا من اللى بيؤمنوا إن القاضى هو أقدر الناس على - حتى يعنى نفس المناقشة فى موضوع زى ده صعب أوى لغير القاضى - يعنى القاضى هو أقدر الناس على تبين ظروف كل قضية والتدخل..

سرى للغاية

عبد الناصر: الناس كانت مطالبانى أن أتدخل.

حسونة: ما أنا عارف.

عبد الناصر: يعنى أنا أسهل حاجة عندى إن أنا بكره الصبح باخد ورقه لحسين الشافعى، ويقول له: حولت لك صدقى، وبعدين حسين الشافعى لن يستطيع إلا أن يحكم عليه بالإعدام!

حسونة: ده أنا محرج إن أنا أقول الكلام ده فى غياب السيد حسين الشافعى لأن هو..

عبد الناصر: لن يستطيع.

حسونة: أصلا ميحوزش إن احنا نتكلم فعلا من وراه يعنى.

عبد الناصر: بعدين.. أنا عايز أقطم رقبة صدقى محمود يعنى بصراحة، وكنت عايز الحكم يكون عليه بالإعدام لكن هل أتصرف النهارده هذا التصرف!؟

حسونة: يعنى ما أنا بقول: أنا هاقول لسيادتك يعنى طبعا أنا يعنى يمكن..

عبد الناصر: الناس كلها تعرف، إن أنا بصدّق أو أحيل محكمة أخرى أو أحيل محكمة، أنا شخصيا بالنسبة لصدقى محمود، وسبب لى مشاكل فى العشر سنين اللى فاتوا صدقى محمود دى لايعلمها إلا الله! وكل الأزمات اللى كانت بينى وبين عبد الحكيم عامر كان أساسها صدقى محمود!

وإخوانا عارفين من سنة ٥٦.. من حرب ٥٦ ومواضيع الملاجئ اتكلمنا فيها، وهو قال: الملاجئ مبتنفعش! اللى كل أوروبا النهارده بتعمل ملاجئ للطائرات. ومجدى حسنين راح عمل مطار فى مديرية التحرير وعمل فيه ملاجئ مرضيوش يستخدموه.. تصور بقى!؟ كل ده لكن الحقيقة وضعى أنا يعنى علشان الوقت يحترم نفسه..

سرى للغاية

حسونة: لا.. ماأنا بقول فى النقطة دى بالذات، يعنى هى أصلا متجوزش فيها المناقشة على المستوى السياسى؛ لأن الحقيقه هيبقى رجل الشارع هيتحكم فى الحكم فى أى قضية! عبد الناصر: ده بيطالبونى أنا دلوقتى - مبيطالبوش القاضى - بيطالبونى أنا إن أنا أبعته لحسين الشافعى، وأنا سألت حسين الشافعى أول إمبراح.. قلت له: لو بعثك صدقى محمود هتعمل إيه فيه؟ قال لى: مقدرش أعمل حاجة غير الإعدام.. قال لى كده وقال لى هاروح فىن؟! (ضحك) قلت له: إذاً أنا الحقيقة يعنى كمسئول، رغم شعورى بالنسبة لصدقى محمود ورغم متابعتى للقضية ورغم إن أنا عايز أقطم رقبتة، لا أستطيع أبدا.. بصراحة!

صوت: سيادتك تتجاهل إرادة شعبية يافندم!؟

عبد الناصر: يعنى العملية مش إرادة شعبية.. العملية مش إرادة شعبية، العملية النهارده.. طب ما أنا أقدر آخذ يعنى علشان إرادة عشان يعنى أكسب سياسى، آخذ راجل يعنى بصرف النظر أنا بقى هنا مغمض إن هو صدقى محمود ولا ماصدقى محمود، آخذه أوديه يدبح!؟

صوت: تعاد محاكمته.

حسونة: لو سمحت لى أكمل؟

عبد الناصر: اتفضل.

حسونة: هو أنا بقول يعنى: أنا يمكن لى رأى شخصى فى النكسة والعملية والمسئولية والحكم. إنما هل يجوز لى أنا - وأنا خارج المحكمة - إن أنا أتحكم برأى الشخصى فى القضاء؟! مش جايز، والأخطر من كده أن يتحكم الشارع فى القضاء! ليه بقى؟ لأن إلا إذا سلمنا بهذا المبدأ يعنى نعمل بقى زى الصين مثلا، سلمنا بمبدأ المحاكمات الشعبية على مستوى الملاعب والحاجات دى.

عبد الناصر: على مستوى إيه؟

سرى للغاية

حسونة: الملاعب اللي بيعملوها، فيه ماوتسى تونج بيحبوه فى الملعب والاستاد، بيحاكموه ٢٠

ألف، محدش سامع كلام المتهمين ولا كلام الشهود ويحكموا!

فإحنا حتى الآن كدولة، ملتزمين بقانون بأحكام، والحد بين الالتزام بالمحكمة هنا وبين إطلاق إرادة رجل الشارع أيا كانت عواطفه، هيبقى حد خطير جدا! يعنى إذا مزجنا دى بدى إذا نزلنا أنا بقول - بغض النظر عن رأيى الشخصى فى القضية وفى المتهم - إنما أنا بقول: هل يجوز لنا إن احنا تحت ضغط ما إن احنا نضحى بنظام؟! أنا رأيى.. لا يجوز أيا كان إحساسى الطبيعى بالنسبة للقضية وبالنسبة للمسئولية الضخمة.

فالحقيقة أنا عاوز أنقل من هذا لنقطة تانية: الحقيقة البوليس وقف موقف طيب جدا، ولو إنى يعنى مقداميش إلا قضية حلوان، القضايا التانية معرفش هل بلغت للنيابة العامة ولا لأ؟ لأن طبعا لما يقال: إن فلان عنده رصاصة أو فلان، إذا لم تحقق من النيابة العامة بالذات ويشوفه الطبيب الشرعى محدش هيصدق فيما بعد إصابته جايه من شومة ولا جاية من كذا! فأنا القضايا الحقيقة المصادمات اللى فيها إصابات بالذات يجب تبلغ للنيابة العامة علشان الحقيقة كل واحد يعرف، ويجب يعلن هذا وكل واحد يعرف من أين أصيب.

كل هذا ملوش شأن الحقيقة بالموضوع.

وأنا عاوز بقى يعنى أعود بسيادتك لسنة ٣٦ الشباب لسنة ٥٢، ونزاع عن نفسنا صفة السلطة والصفة أيضا يعنى عقلية البوليس والتحقيق الإلزامى وكذا.. كذا.. وكذا. هو الحقيقة فيه بعض النقط لاشك دارت بخاطر سيادتك الحقيقة أنا لغاية دلوقتى مش فاهمها..

النقطة الأولى: يقال: إن فيه تنظيمات تحتية، وده يمكن كنا سألنا قبل كده فى وضع معين.. هل هناك تنظيمات تحتية ولا لأ؟ يعنى إحنا فى تحقيقاتنا فى أيام المظاهرات القديمة، كان لابد أولا من وقود جاف؛ يعنى سيادتك كنت تمشى فى مظاهرة ساعات كانت تبتدى مثلا ناحية النحاس باشا إنما ٥ - ٦ فيهم فى الكذا ألف بيوجهوها، لكن لابد علشان يشعل فهو السؤال.. كيف تجمع هذا الوقود الجاف حتى استطاع بعض المهيجين - إذا صح إن فيه مهيجين - يمين أو يسار ضد النظام، كيف استطاعوا إنهم يشعلوها بالسهولة دى؟ وخصوصا يعنى أنا سامع دلوقتى من الأخ عكاشة إن المسألة وصلت لملايات اللف والحاجات دى والناس فى الشارع يعنى.

فدى الحقيقة نقطة عاوزين نناقشها، وخصوصا إنها متصلة بنقطة مهمة جدا وهى قدرة التنظيم على ضبط العلمية وده التنظيم السياسى، على تحريك الجماهير

سرى للغاية

وضبطها وتوجيهها. وأنا لى رجاء إن احنا نتأملها طويلا.. يعنى القضية دى موضوع النقل ده بقى بتاع القاهرة ده يعنى دكتور سعداوى يجيبه.

يعنى قدرة التنظيم السياسى وتغلغله ويعنى صلته الحية الافناعية على تحريك الجماهير؛ ده سؤال برضه الحقيقة الواحد مش واضح فى ذهنه، وخصوصا أنا قدامى قضية حلوان الحقيقة فيها بعض الحاجات يجب سيادتكم تتوقف عندها طويلا. أول هتاف هتاف عجيب - يعنى على حسب أقوال رجال البوليس اللى قدامى - بيقولوا: حكومة إيه هو صدقى غطوا عليه؟! فهتاف نوعه عجيب شوية!

عبد الناصر: الهتافات كلها سجع أيضا! (ضحك)

حسونة: أيوه.. لكن يعنى اتهام بالتواطؤ يعنى، وبعدين فى هذه المظاهرة بالذات كان فيها عبد اللطيف بلطية، وكان فيها أمين الاتحاد؛ يعنى فيها عضو مجلس الأمة أو المسئول السياسى وفيها عضو المكتب التنفيذى وفيها حوالى ٢٠٠٠؛ فأنا الحقيقة كنت متوقع إنهم يوقفوا أو يوجهوا العملية.

أخطر يمكن شئ فى العملية دى، الهجوم على قسم البوليس وانتزاع السلاح.. يعنى دى النقطة اللى استوقفتنى. هتاف من نوع جديد.. أو أنواع جديدة من الهتاف بتلقى استجابة، لماذا تلقى استجابة؟! ده سؤال.

وبعدين نوع أيضا من الأحجام يمكن من أيام ٥٢ مشوفنهاش أو ٥٤ يمكن يعنى أحجام التجمعات، وبعدين بيلقوا استجابة برضه! ده سؤال، وسيادتكم برضه تستطيع يعنى إن احنا نتوقف قدامه ونسأله كلنا؛ يعنى الحقيقة دى مسئولية المجلس كله يسأل ويحاول يجاوب.

وبعدين استخدام قضية صدقى كحصان طروادة زى مابيقولوا دخلوا فيها كلهم الى موضوعات تانية! دى مسألة تستوقف النظر، يعنى كلهم دخلوا هى موضوع أنا فى يقينى إن قضية صدقى ملهاش كل هذا الدوى أو كل هذا الاهتمام، بدليل إنهم تانى يوم قلبوا فى موضوعات تانية.

يعنى أنا كان عندى النهارده جنب وزارة العدل الجامعة.. جامعه عين شمس، فهيصه وبتاع وإشاعات وبتاع؛ البلد اتقلبت يعنى، فمش عاوز طبعا أبلغ وبرضه الواحد بصفاء ذهن كده وبهدوء ياخذ المسألة، بس نحلها نشوف بخصوصها إيه؟

سرى للغاية

هو طبعا لو الأخ شعراوى أو سيادة الأمين العام تفضل ووضح لنا من الناحية السياسية..

الحقيقة أنا عاوز أعرف فعلا طلبة الجامعات، يعنى هل من السهل التسلل الى داخلهم بالسهولة دى؟! وبعدين لماذا التقى طلبة الجامعات مع العمال وهم يعنى يمكن هم سندننا؟! وبعدين لماذا التقى العابر سبيل - زى ما بيقول الدكتور قيسونى - معاه؟! ويجب نصل لحل لأنها هى دى الجبهة الداخلية، وطبعا مع تقديرنا الكامل لما اتخذ فى القوات المسلحة، إنما هذه الجبهة بتعكس بقى ده له أخ وله ابن عمه وله هكذا، بتعكس طوالى على القوات المسلحة، بيتهيالى مسألة مهمة.

أنقل من هذا الحقيقة كلها أسئلة.. بنقل من هذا الى نقطة برضه يعنى فيه ناس قالوا إخوان وفيه ناس قالوا شيوعيين، وفيه ناس من متقفين، قالوا: إن برافدا بالذات اتكتب حاجة أظن سيادتكم أو حاجة زى كده ..

عبد الناصر: نعم؟

حسونة: كانت كتبت صحيفة برافدا إن فيه اتجاهات معتدلة وإن البعثات ومش عارف إيه، وإن المسائل دى بعض المتقفين بيربطوا بين هذا وبين عمليات، طبعا دى مسائل مايمكنش توضح إلا فى تحقيق.

إنما أنا ميهمنيش التحقيق أنا كل مايهمنى - وأعتقد يههم سيادتكم ويههم الإخوة - إن احنا نقف طويلا قدام الظاهرة الجديدة يعنى. هى جديدة فعلا يعنى أنا فعلا فوجئت بيها بالوضع ده. يمكن طبعا أيام النكسة قلنا: هيحصل فوزى وهيحصل.. وهيحصل ومتوقعين طبعا، إنما ما هو برضه قلنا: إننا يجب إن احنا نتخذ حاجة يعنى قبل ما يسبقونا أو قبل ما المسائل تنتقل للشارع.. تبقى القيادة السياسية..

هو بعد هذا بقى، الحقيقة يمكن سيادتكم توافقنى إن احنا نعود للأسئلة الأولى..

يعنى كيف يمكن أن نوحدهم الجبهة الداخلية الحقيقية؟

بقيت مسألة، الناس بتقول لى صحفيين وغير صحفيين: إنهم مش فاهمين حاجة؛ يعنى ما هو الخط السياسى الخارجى والخط السياسى الداخلى، يعنى عدم حديث سيادتكم للشعب بيعطى نوع من علامات الاستفهام، زى ما بيقول الإخوان: عاوزين نسمعه يقول لنا إيه الخط السياسى الخارجى والخط السياسى الداخلى؟

سرى للغاية

وبعدين الحقيقة فى الخط الثقافى والإعلامى، أنا سئلت سؤال فى اجتماع يعنى جاوبت عليه كده - جواب يعنى مش واضح - بالنسبة للتعبئة للحرب أو التجهيز للسلم. ويعنى أنا دخلت مثلا مسرحية عجيبة الشكل اسمها - بتاعة تحية كاريوكا دى - اسمها البغل فى الإبريق، فلقيتها شتمت الاتحاد الاشتراكى بكلام لا تقبله أى دولة، واندهشت.. يعنى مهما كان الخلاف فى وجهة النظر السياسية أو فى تقييم الفاعلية، إن إزاي يقبل فى دولة يقولوا عليها: إن احنا الاتحاد الاشتراكى حرامى! وإن الموظفين لصوص وإن ما فى إنسان فى الدولة لم يشتم، والناس بقت قاعدة مبسوطة!

يعنى أنا كنت قاعد كده على جنب، وكمان يعنى وإسفاف! فأنا بقول: الخط أيضا الثقافى.

وبعدين الجنس ومش الجنس وبتاع والمسائل دى كلها، فالسؤال الموجه الينا.. هل هذه سياسة بلد؟! البعض دس أو فهم لبعض الناس إن هل هذه سياسة يعنى مقصود بها تلهية الناس؟! ولماذا يعنى يبلغ القاع فى شتيمة الاتحاد الاشتراكى الى حد إن يجيبوا واحد أمى ولا مش عارف إيه ويشغل مدير بشكل سخيف يعنى، وبعدين لماذا انتشرت صور الجنس فجأة فى الصحافة والإذاعة وبتاع؟!

يعنى يعذرني الدكتور عكاشة إذا قلت الكلام ده يعنى.. لماذا يعنى؟! ما هو يقال دى مسائل فنية! الناس بتبحث فى الناحية السياسية، يقال: هل حدث فى فرنسا هذا أيام الاحتلال الألماني.. هذا؟! لا.. وهى بلد الجنس! هل بيحدث فى فيتنام هذا؟! لا! إذا حكاية إن الفن معليهاش قيود والنزعة الجمالية وبتاع فى الأيام دى مش مقبولة!

دى نقطة سئلت فيها من أكثر من شخص. وأنا لما دخلت فعلا هذه المسرحية اندهشت! إزاي إن يباح هدم النظام كله مش الاتحاد الاشتراكى؟! يعنى إيه؟! الاتحاد الاشتراكى حمارين أظن أو حاجة زى كده! القطاع العام كله رشوة!

وبعدين فى النهاية افتعلوا حكاية، قالوا: ياريس أنت اللى باقى لنا وبتاع علشان يمكن تمشى شوية العملية، لكن هى طبعا اللى بيتفرج فاهم إن النظام كله مش..

عبد الناصر: أنا فهمت إن ثروت راح المسرحية دى.

حسونة: يمكن عدلها بقى لما دخلتها أنا! (ضحك)

عكاشة: هو الواقع المسرحية..

عبد الناصر: لا.. بلاش المسرحية يعنى.

حسونة: فهو الحقيقة هو فيه أسئلة هتطرح يعنى بعد ماحدث وهيطلب من سيادتك بالذات أن تجيب يعنى أن يجاب عليها..

هو أول سؤال فعلا.. توضيح الخط السياسى الداخلى. طبعا إحنا بنؤمن اشتراكية عربية ناصرية.. غريبة الناس لا تصدق هذا! الناس بتقول: إن فيه دلوقتى يعنى جذب الى اليمين وجذب الى اليسار، وإن مفيش الكلام ده انتهى خلاص، وإن يعنى هل يستطيع القائد إنه يوضح هذا الخط والا لأ؟ ده سؤال يعنى.

السؤال الثانى: ماهو شكل الحكومة؟ الحقيقة زى ما قال الأخ عكاشة: هو الناس مش مبسوطه مننا إحنا كلنا بلا استثناء وبتقول: دى مش حكومة حقيقة كده وإن يعنى إذا كانوا فنيين ومستمعين حاجة زى كده يعنى، لكن حكومة بمعنى حكومة يعنى وعدنا بيها الرئيس بعد النكسة؟ مش حكومة!

أيضا فى التنظيم السياسى بيدور تسأل.. ماهو الخط المطلوب فى التنظيم السياسى؟ هل هتحدث فاعلية ولا هيبقى كما هو وبعدين ينتقل شخص من هنا الى هنا وأيضا فى مجلس الأمة.

وبعدين فى قوانين الحريات اللى هم قالوها فى الهتافات، هو طبعا إحنا ماشيين بل إحنا بنسبق مجلس الأمة فيما يطلب، يعنى لغايه دلوقتى إذا جه دايم السؤل.. ماهو الضمان؟ لأن هذا الخط نمضى فيه.

كل دى الحقيقة أسئلة، وأنا الحقيقة بسأل نفسى برضه.. إحنا فى حرب ولا مش فى حرب؟! لأن أسئلة عجيبة تقال فى حالة حرب وعاوزة تأمل. يعنى أنا بيتهيالى الناس بتسأل لدخول المعركة زى برضه ماسيادتك يعنى لحوافز القتال، يعنى الناس برضه بيهمها كيف يكون ولو الخطوط العريضة للحكم؟ كيف تكون إذا أمكن دلوقتى أن تقال يبقى تجمع الناس على خط واضح عن الغد. إذا أمكن أن يقال الآن على أن يكون التنفيذ بعد كذا.. أيضا توضح كل هذه النقاط.

الحقيقة يعنى هى أغلبها أسئلة وايضاحات، ويمكن لسيادتك تتفضل نسمع فى الموضوع ده الحقيقة لأن الموضوع دقيق جدا، وننسى إن احنا فى السلطة ونعود لشبابنا

سرى للغاية

شوية يعنى نضع نفسنا موضع اللى ماشيين فى الشارع الطالب والبتاع وننسى بقى إن أنا وزير عدل أو داخلية أو تعليم، ونحاول نحلل الموقف.
شكرا.

عبد الناصر: يمكن الكلام ده مبسمعوش لأول مرة أنا سمعته من ناس آخرين. موضوع التغيير، انتقال لى: الناس عايزة تغيير وبعدين أنا بشوف ناس، طب إيه التغيير؟ إيه هو التغيير؟
مفيش إجابة!

يعنى يمكن الكلام اللى إنت قلتة إن الناس زهقانة من الحكومة، بيتقال: التغيير وشوش جديدة، ويمكن منكوا إنتو برضه ناس بتقول: إن محصلش تغيير محصلش تغيير من يوم ٩ و ١٠ لغاية دلوقتى!

هذا الموضوع أنا فكرت فيه تفكير وسألت فيه ناس كثير، يعنى طيب أنا ممكن أغير الحكومة بكرة طب يبقى برضه قدامى سؤال طب أجيب مين؟! يعنى إيه إيفرض إن أنا وصلت الى هذا الحل.

فيه نقطة تانية الحقيقة أيضا الناس حاسة بيها، مش حاسه بوحدة الحكم وده مخلى - وأنا منتظر إمبراح كنت أسوأ من هذا وأنا قلت يمكن للناس إن أنا منتظر أسوأ - مش حاسيين بوحدة الحكم يعنى باين إن فيه تيارات وباين.

وده بيتقال: إن الحكومة مهياش حكومة واحدة أو الحكم مهواش حكم واحد! طيب أنا رأيى إن الناس بتختلف أفكارها يعنى ده بيقول كذا وده بيقول كذا، ولكن الكلام اللى بيتقال هو اللى بيمشى. بعدين أنا الحقيقة وأنا بسمع هذا الكلام كله اللى أنت يمكن النهارده لخصته كله يعنى قلتة؛ كله البلد مطعونة والناس كلها مكبوتة، واليهود محتلين جزء من بلدنا وعايزين نحارب.. عايزين نخلص يعنى من اليهود. أنا قلت - يوم ٢٣ نوفمبر يوم ما اتكلمت - قلت: ردى على هذا الموضوع الحقيقة، بعد ما اتكلمت حصل راحة.. ولكن لفترة ورجع تانى الكلام.

فى رأيى إن القضية واللى حصل فيها والكلام اللى اتقال فيها هز الثقة فى الكل.. محكمة الثورة الكلام اللى انتشر فى محكمة الثورة واللى بيحصل واللى فى رأيى إن ده يعنى خلى الناس مذهولة؛ لأنها شافت حاجات مكانتش متصورة إن الحاجات دى تحصل أو الكلام اللى طلع على المخابرات أو الكلام اللى طلع.. يعنى فيه حاجات كثيرة طلعت وحكايات - هو يمكن بولغ فى هذا أكثر وأكثر - سبب هزة عند الناس.

سرى للغاية

ففيه حاله نفسية موجودة فى البلد، ودى أنا يمكن حاسس بيها وأنا قلت قبل كده ويمكن لو تفتكروا يوم العمال، قلت لكم: فيه حالة نفسية موجودة فى البلد وإن أى عملية بسيطة بتخلى العمال.. وقلت: العمال والطلبة عندنا وسهل قوى عمل فى المجموعات دى، ونبص نلاقى نفسنا بنواجه موقف لا نستطيع إن احنا نسيطر عليه، وإن أنا شايف إن البلد فى حالة نفسية عسيرة!

إيه خطنا الداخلى؟ إيه التغيير؟ فيه إيه خطنا يعنى مثلا الكلام.. إيه سياستنا الداخلية؟ بالنسبة للسياسة الداخلية اتكلمنا الحقيقة.. اتكلمنا على الحريات وعلى إطلاق الحريات وعلى لجنه الحريات وعلى هذا.

وأنا فى رأى إن ده بيشجع العناصر المضادة أكثر - فى رأى هذا - وأنا إديتكم مثل، وقلت لكم: إن احنا أوقفنا نشاطنا فى يوم من الأيام لغاية ما تتلغى الأحكام العرفية، ويوم ما تلغت الأحكام العرفية بدأنا نشاطنا.

ويعنى أنا بقول لكم حكاية تانية النهارده: أنا دخلت سياسة.. دخلت سياسة وأنا كنت فى ٣ ثانوى، وأنا ماشى فى الشارع فى إسكندرية لقيت البوليس بيضرب فى الناس زى الرجل الللى كان رايح السينما، وبعد المغرب ومروح ماشى فدخلت مع الناس ضد البوليس ومسكونى وودونى القسم وبيت!

ياناس إيه الحكاية؟ قالوا لى: ده أحمد حسين كان جاى يخطب والبوليس جاء يفرض العملية بالقوة، وطلعت وانضميت لمصر الفتاة. وده بيتهيألى عملية طبيعية. يعنى لكن برضه النهارده مقدرش أبدا أقول: إنها عملية طبيعية؛ لأن فرق بين الوقت الللى أنا كنت فيه فى سنة ثالثة - الللى هى سنة ٣٤ الللى هى فى الكفاءة - والنهارده الللى هو فيه ثورة.. بنعلم الناس ونعين الناس مكانش فيه معتقلين من الطلبة مفيش حاجة أبدا وعمرنا ما حطينا من ٥٤ عسكرى، لكن دى حالة نفسية موجودة فى البلد.

الحقيقه السؤال برضه، حكاية السلم ولا الحرب؟ أنا مش عارف والله بتسألنى يعنى! أنا أما روحت أسوان وروحت واخذ معايا نقط علشان أرسى برضه بالنسبة وسكنتون ونقط مش عارف. وأنا يوم ما تكلمت يوم ٢٣ نوفمبر حطيت "ما يؤخذ بالقوة لا يسترد إلا بالقوة"، وبعدين جيت بعد كده وقلت: العمل السلمى عمل من أعمال القوة إذا كنا بنقدر نحل سلمى يبقى نحل سلمى.

سرى للغاية

موضوع السياسة الخارجية، بيتهبالى واضح فى علاقتنا مع الناس، واتكلمنا أيضا يوم ٢٣ بالنسبة للعلاقة العربية وبالنسبة للكلام الخارجى.. بالنسبة لكل هذه الحاجات.

بيجى بقى السؤال الحقيقى اللى كل واحد يقابلنى يقول لى: محصلش تغيير! يعنى عايزكوا إذا كنتوا تقدروا تتورونى فى حكاية التغيير دى يعنى أنا قتلت.

وبعدين أنا الحقيقة وضعى النهارده وأنا مثلا فى الاجتماعات اللى كنا بنعملها، كنت بقول: كل واحد قبل مانبتدى كل واحد عنده كلام لازم يقوله. أنا الحقيقة وضعى وفى تفكيرى فى رأى لازم أكون بطئ الحركة حقيقة، ليه؟ إحنا بيدبر لينا إن احنا مانضريناش عسكريا لازم نضرب داخليا، وعلى هذا الأساس فى تصرفاتى الداخلية وفى كل تصرفاتى أتصور إن الواحد واقف فى حته موجود فيها الرمال المتحركة، دى إذا ممشيش كده يعنى إذا مشى باندفاع يبص يلاقى نفسه واقف فى العملية.

بعدين هل التغيير يعنى بس علشان يتقال تغيير؟! يعنى إحنا فى الأول قلنا: كل واحد يحاول يغير اللوائح عنده وكل واحد بيحاول يعمل إيه ونحاول نريح الناس بنعين الناس وجينا هنا وقلنا: بنشغل الناس.

اللى أنا بدى أفهمه ما هو المطلوب من التغيير؟ قلنا: قوانين حريات هنبص فيها بالنسبة مش فاهم إيه للحراسات هنبص فيها، يعنى كل الحاجات دى عملنا إيه فيها؟ وأنا رأى إننا نشجع وأنا فى أول العملية طلب منى إن أنا آخذ خطوات من هذا، أنا رفضت وقلت: إننى أول ما بتدى إنى آخذ خطوات هيحصل ردود فعل، وكان ممكن إنها تكون ردود فعل أعنف من ردود الفعل الموجودة.

برضه الكلام فى البلد إن ده بيقول: إن رؤساء مجالس الإدارات حرامية والتانيين بيقولوا: لا.. ده حرامى، وده بيقول: ده حرامى، وده بيقول ده بيعمل وده بيقول ده بيسوى وده بيقول يعنى فيه كلام! وأنا الحقيقة واخذ هذا الكلام كله على أساس إنه أزمة نفسية موجودة.

كيف نعالج هذه الأزمة النفسية؟ أنا فيه ناس قالوا لى: إتكلم، طب ما أنا هتكلم وبعد ١٠ أيام أو ١٥ يوم يضيع تأثير هذا الكلام؛ لأن فيه الحجر الرازح علينا اللى هو الاحتلال.

طب بعدين إيه؟ هل فرنسا كانت بتعمل كده؟ اللى هى مثلا الكلام اللى الحقيقة إحنا مكانش عندنا بنادق؟ أنا قلت لكم إن يوم البتاع ده كان عندنا ٥ آلاف بندقية يدوب إن احنا نعمل منظمات شباب نعمل مقاومة.

سرى للغاية

وبعدين الحقيقة التنظيم نفسه التنظيم السياسى، يعنى فيه بقى شيوعى وفيه الإخوان المسلمين وفيه.. أنا عندى تليغات من ناس بره شعراوى وبره ده وده إن بتوع الاتحاد الاشتراكى بيقدوا العمليات وبتوع منظمات الشباب بيقدوا العمليات!

وخالد ابنى إمارح بالليل قعد معايا وقال لى: اللى عامل العملية فى كلية الهندسة بتوع منظمات الشباب، وهو اللى قال لى على إسم الجدع رشيق. وقال لى: رشيق ده فى سنة أولى وده فى منظمات الشباب، وهو اللى مهيج الكلية كلها وهو اللى عامل العملية دى كلها. وأنا حتى أما سمعت من خالد مقولتش يعنى إمسكوا رشيق ولا يعنى ده كان كلام بينى وبينه بناء على هذا متكلمتش.

وبعدين هو فيه ناس فصلوا أيضا من منظمات الشباب، وكانوا القوميين العرب - اللى هم التنظيم العربى اللى موجود بسوريا - بيحاولوا يجندوه، وهؤلاء الناس موجودين أيضا، ودول أيضا ناس جاية من قضية اسمها قضية سمير حمزة.

هو فى الحقيقة أنا برضه بدى أقول: إن يعنى أسلوبنا غريب فى الحقيقة نتيجة إننا لاحنا ماشيين على ديمقراطية غربية ولا ماشيين على حكم دكتاتورية مضبوط ونمسك البلد مضبوط.. يعنى سايبه العملية بين كده وكده. وده كلام اتناقشنا فيه الأول يمكن اللى عبد العزيز السيد قال: نعمل الحزبين واللى قال نعمل ٣ أحزاب واللى قال نعمل حزب واحد.

وبعدين أنا جالى برضه كلام إن بعض أساتذة الجامعة كانوا بيدفعوا الطلبة، هل هذا حقيقى أو غير حقيقى؟ أنا مش عارف الحقيقة.

بعدين اللى ثبت النهارده برضه، إن الاتحاد الاشتراكى ملوش الفاعلية ومنظمات الشباب ملهاش الفاعلية، العملية السياسية ملهاش. طبعا هيتقال: إن القضية كانت أكبر من إن حد يقف فى وجهها، ولكن الحقيقة لو فيه حزب الناس بتلتزم حتى مع الحزب على الخطأ والصواب.. يعنى اللى الواحد شايفه الدنيا كلها النهارده.. لأ.

الواحد الحقيقة فى هذه المرحلة وهو بيفكر، محتار ومش عايز يتسرع بالنسبة لى. إنت يعنى كنت بنقول لى: مش عايز أتسرع الحقيقة فى أى عملية، يعنى أنا تعرف لو أصبح الصبح وغيرت الوزارة الناس بيقولوا: آه حصل تغيير طب بس على أى أساس إمسك بتوع المؤسسات بغيرهم يقولوا: حصل تغيير، إذا كان التغيير فى الأسلوب نمسك التغيير فى الأسلوب إحنا اتكلمنا عن التغيير فى الأسلوب يعنى فى الفترة اللى فانت وقلنا كيت.. كيت.. كيت.

ولكن كان لازم نعتقل إمارح ولازم هناخد إجراءات تانية النهارده الحقيقة.

سرى للغاية

يعنى أنا رأبى بكره الجامعة فى تصاعد عن النهارده، هيجصل وهيطلعوا علشان يروحوا يطلعوا ثانوى ويطلعوا المعاهد وتتأخذ عملية. ورأبى إن جميع القوى المضادة النهارده بتشتغل على هذا، طب والأمريكان عملوا إيه فى إندونيسيا؟! ماهو الأمريكان اشتغلوا فى إندونيسيا بالطلبة. وإحنا قدامنا الطلبة والعمال هم اللى ممكن يشتغلوا فيهم. بعدين أنا إمبراح الحقيقة بعد حادثة حلوان، كان تقديرى إن تانى يوم العمال هيطلعوا ويحدث تضامن وكذا، والحقيقة العمال كان موقفهم كويس رغم إن احنا مانعين عنهم العلاوات ومانعين عنهم الأرباح وعيشتهم مرة زى مايقولوا الناس النهارده فى الهتافات.

الطلبة يعنى بيقول لك حرية وديمقراطية، ده الكلام اللى هو بيتقال بعد القضية؛ عايزين حرية وعايزين ديمقراطية وعايزين حرية صحافة. والله أنا فى رأبى إن الصحافة عندنا عندها من الحرية أكثر مما يجب بـ ١٠٠ مرة، وإمسك فى هذا روزا اليوسف وروزا اليوسف مطلعة كل واحد فى البلد حرامى، وكل واحد فى البلد مرتشى، وكل وزير كذا وكل رئيس مؤسسة كذا! ويعنى أنا بدى أقول إيه الصحافة إيه الأحزاب؟ اسمه إيه ده كاتب أول إمبراح كاتب بيقول أنا عايز ٣ أحزاب.. واحد اسمه إدريس!

صوت: يوسف إدريس.

عبد الناصر: إدريس حد عارفه؟

صوت: ده يعنى يسارى وشيوعى.

صوت: مش يسارى ولا حاجة.

عبد الناصر: لا يعنى هم النهارده الموضوع..

صوت: مش شيوعى لكن يسارى.

صوت: آه.. يسارى.

سرى للغاية

عبد الناصر: أنا يسارى، على فكرة أنا بدى إنكم تفهموا ده معايا؛ يعنى على يمينى زكريا محى الدين وعلى [صبرى] يسارى (ضحك)، لكن أنا يسارى والعملية لأ.. العملية فى اليسار واليمين دى عملية نسبية؛ العملية الحقيقة هل فيه تنظيم أو مش فيه تنظيم؟ إيه هو وضعه بيشتغل إيه؟ بيتهيالى دى النقط اللي أنت قلتها، فيه نقطة تانية؟

حسونة: هو أنا مع سيادتك طبعا إن على المهل محدش بيطلب حاجة، إنما سيادتك معايا إن فيه أزمة ثقة الآن.. يعنى فيه حالة نفسية فى البلد إذا لم تعالج يمكن تكون عواقبها وخيمة، وإن طبعا كقيادة سياسية علاجها لازم يكون سياسى قبل أن يكون بوليسى أو قضائى أو.. أو.. أو..

الحقيقة كيف تعالج؟ إحنا فعلا اتكلمنا فى هذا كثيرا.. يعنى قبل كده اتكلمنا زى ما قلت لسيادتك: اللي اتجه حزب واللى اتجه كذا إنما يعنى إحنا فات ٨ اشهر على كلامنا الأولانى.

عبد الناصر: كان السؤال هل ده وقته النهارده يعنى حتى إذا عملنا حزب؟

حسونة: أنا أخشى مآنا هقول لك بصراحة، مآنا أخشى إنهم يسبقوا؛ يعنى التنظيمات الأخرى تقدم غد أفضل من الغد اللي ممكن تقدمه القيادة السياسية، وهو ده السؤال سيادتك بتقول على المهل. وفعلا محدش بيدى حد يعنى اللي بيقولوا عايزين تغيير فى كذا وبعدين إيه الحل؟ بيوقف فى الحلق أحيانا، إنما مع هذا فيه تنظيمات سواء بقى كانت يمينية أو يسارية بتقدم حلول مش عاوزة كلام، يعنى أنا متصل طبعا بدول واتصل بدول بيجونى يعنى.

عبد الناصر: تقدم شعارات.

حسونة: شعارات طبعا.

عبد الناصر: مش حلول.

سرى للغاية

حسونة: شعارات طبعا مش حلول ماهى بتبدأ زى ٥٢؛ هو يعنى سيادتك بتقول مشيت لقيت اصطدام مع البوليس، بمشى خلف لافتة معينة لغاية ما تتحقق أو لا تتحقق ثم بعد كده أفقد ثقتى أو لا أفقد ثقتى.

اللى عاوز أقوله: إن فيه حقيقة أولى وهى إن هناك حالة نفسية أنا بسميها يمكن سخط عام أو ضيق أو حاجة زى كده يعنى كالوقود الجاف تماما، وإن أى واحد يستطيع يشعلها. فهذه الحالة أنا الحقيقة بطرحها للبحث، كيف يمكن أن نتجاوزها؟ كيف يمكن إن احنا نعالجها؟ يعنى ده السؤال بتاعى.

وهل سيادتك بتقول مفيش يعنى عجلة لكن أنا برضه إحساسى إن فيه عجلة.

عبد الناصر: لا.. مفيش عجلة؛ لأن إيه فيه عجلة ليه؟

حسونة: فيه مثلا عدم ثقة بالحكومة، دى مش عايزه كلام يعنى تسأل أى واحد مفيش حكومة فيه عدم ثقة.. آدى حاجة. فيه اتهام لمجلس الأمة فيه اتهام للاتحاد الاشتراكى طبعا اتهام شديد جدا، على الرغم إنه صعب على طبعا أكيد فى التمثيلية لكن اتهام شديد جدا؛ بإنه ممزق بأن التنظيمات التحتية اللى فيه أقوى من التنظيمات السطحية، وأنا الحقيقة مكنتش مصدق!

أنا كنت فاهم إن برضه لا شك إن منظمات الشباب والحاجات دى لها تغلغلها، لكن أنا فوجئت لما ألقى المسئول السياسى بتاع شمال القاهرة زائد عضو المكتب التنفيذى، ميعرفش يمنع هجوم على قسم بوليس. ده هجوم على قسم بوليس ده يوم ٢٦ يناير ١٩٥٢ اللى حصل، وسيادتك لما تذكر يوم ٢٦ يناير - ماهو برضه الواحد لازم يذكر هذه الأيام - طب ماهو ابتدى بحالة عامة، وبعدين نزلت الأيدي المحترفة فى العملية واستطاعت إنها..

عبد الناصر: ابتدت ٢٥ بعملية الإسماعيلية.

حسونة: ٢٥ أنا نفسى نزلت كنت عاوز أحرق البلد! يعنى يوم ٢٥ وأنا وكيل نيابة نزلت فعلا مبسوط بالحكاية دى، وبعدين فرغت لما لقيت فعلا بقى العملاء دخلوا فى العملية.

سرى للغاية

فأنا يعنى لهذا عاوز نوقف فى هذه الجلسة أو فى أى جلسة، كيف نستطيع أولا أن نعيد جسر الثقة.. نبنى جسر الثقة بين الحكومة وبين الناس؟ وأيضا كيف نستطيع أن نبنى الثقة بين الاتحاد الاشتراكي؟ وأنا طبعا ضد حزبين والكلام ده لأن ده اصطناع، هو يكفى إن يكون فيه ديموقراطية فى مصر التنظيم ليكفى الناس. إنما حكاية إن أنا أصنع معارضة، دى مسألة يعنى مفتعله جدا ولن تقبل هتبقى يعنى نوع من الاحتيال، فكيف نعيد الثقة فينا؟ دى مسألة الحقيقة عاوزة تأمل يعنى الحقيقة.

عبد الناصر: كيف؟

حسونة: الحقيقة الواحد يعنى ببسأل برضه كيف يعنى؟

عبد الناصر: يعنى أنا الموضوع ده الفترة اللي فاتت كلها يعنى فكرت فيه تفكير، وعندى حلول تبادلية وكاتبها.

الحقيقة الثقة بتيجى بموضوع من موضوعين.. بنحط الأزمة النفسية الموجودة اللي هى أنا باعتبارها عامل كبير، ولكن مش لوحده فيه عدة عوامل معاه. الثقة بتيجى يإما بالتعصب ليك كحكومة، معاك حزب بتاعك ماشى معاك مهما عملت.. ويلسون البلد كلها ضده لكن معاه حزب سانده وفيه حزب تانى معارض.

يإما فيه حزب ماسك البلد أو تنظيم سياسى ماسك كل حاجة، وهنا برضه بيجى التعارض.. يعنى إيه ماسك كل حاجة؟ يعنى نمسك البلاد اللي فيها حزب واحد من تنزانيا الى غينيا بلاش أقول الاتحاد السوفيتى ولا إسرائيل الى.. الى.. الى.. آخره..

الحزب متولى المسؤولية الكاملة، لكن مفيش الصراع اللي بين الحزب وبين الحكومة؛ مفيش الانفصال اللي بين الحزب وبين الحكم؛ وده بيخلى فيه شعور فى البلد بوحدة كل الأجهزة الموجودة. الحقيقة إحنا معندناش هذا الشعور، وعلى هذا الأساس على طول بيحصل فقدان الثقة فى الحكومة وفى القيادة وفى كل حاجة.

أنا باعتبار ده رأس الموضوع كله؛ لأن لو مثلا بتاع الاتحاد الاشتراكي يتشردوا فى الوزارة والاتحاد الاشتراكي بيشتتم فى الوزير والوزارة الفلانية بتشتتم فى الوزارة الفلانية والوزير الفلانى بياخذ قرار الوزير التانى بيقول مش فاهم إيه؛ ده بيخلى باين إن الحكم مفكك، بكل أسف هذه الظواهر موجودة!

سرى للغاية

طب الحل إيه؟! برضه الواحد مش قادر يرسى! بالنسبة لمجلس الأمة، لأن فى نقطة بداية بيحرجنا ده الحقيقة الى مجلس الأمة.. مجلس الأمة إيه؟ لا هو مجلس أمة زى بريطانيا ولا هو مجلس أمة زى تنزانيا؛ لأن مجلس الأمة فى تنزانيا - وأنا بقول تنزانيا برضه مابقولش الاتحاد السوفيتى - اللى فيها حزب واحد مرتبط بسياسة الحكومة ويدافع عن سياسيه الحكومة.. الى آخره!

مجلس الأمة فى بريطانيا معناه إن الحكومة معاها الـ House of Commons ليه؟ لأن معاها الأغلبية يوم ماتفقد الأغلبية بتسقط. إحنا لا ده موجود ولا ده موجود! أصبح كل واحد بيعمل حزب وكل مجموعة ملمومة على بعضها وبينكلموا فى أى كلام، وبعدين أيضا مهواش مرتبط فى الانتخابات بالحزب اللى هيرشح؛ لأن فى إنجلترا اللى يطلع من حزب العمال لا يستطيع إنه ينجح فى الدائرة اللى يفصل.. والرجل اللى وقف معنا سنة ٥٦ اسمه بانس وفصل لم يستطع إنه يرشح نفسه. أما النهارده أى واحد بيطلع علشان يرشح نفسه هو بيرشح نفسه لحسابه ولمجموعته. فمجلس الأمة أصبح الحقيقة مجلس ضايع جدا، وبقى بيتكلم فى أى كلام وأى كلام فارغ ومجموعة من المزايدات، وده عايز يرضى المزارعين وده عايز يرضى.. مبقاش فيه الالتزام!

أما ويلسون عمل السياسة بتاعته وقررها وامتنع ٢٥ عضو عن التصويت، وجه إليهم اللوم بواسطة سكرتير الحزب وأندروا! النهارده أنت متقدرش تندر حد فى مجلس الأمة.

وبعدين ماهو التنظيم السياسى أيضا؟ يعنى إيه التنظيم السياسى؟ فى أيام الوفد وفى الاتحاد السوفيتى وفى تنزانيا وفى إنجلترا، معناه اللى بيمشى فى التنظيم السياسى ويعمل هياخد جهد على هذا؛ بأنه هيبقى فى المناصب ويرتقى فيها حتى يصل الى أعلى منصب فى الدولة وهو الوزارة.. هذا الكلام حقيقة.

دى الحقيقة نقطة البداية، فيه خلل فى علمية التنظيم.

أما نيجى نقول تغيير، الحقيقة لازم نبتدى من هذه النقطة، وأنا لما جيت أتكلم بعد العملية وجينا اتكلمنا فى اللجنة التنفيذية العليا كان الواحد حاطط هذه النقطة فى موضع الابتداء.

طبعا بنسمع كلام من الفنيين ضد الاتحاد الاشتراكى، وبنسمع كلام من الاتحاد الاشتراكى إن الفنيين كذا، ونسمع كلام ضد الجماعات القيادية وبنسمع كلام من

سرى للغاية

الجماعات القيادية؛ باين إن الحكم فيه تناقضات كبيرة جدا، وده على طول الناس فاهمة بتشوف الكلام ده ويتطلع وتحس إن مفيش قيادة بتلم العملية وهتقرض عليك لم العملية. الحقيقة ده فى تصورى نقطة الإبتداء لأى حل؛ وبعد كده بيبقى النقطة الثانية..

السؤال على التغيير إيه هو التغيير؟ ماهو التغيير؟

برضه أنا أحب أسمع منكم الإجابة على هذا السؤال.. ماهو التغيير؟ يعنى

عصام بيقول إن الحكومة مش مقبولة. ليه؟

حسونة: أنا يتهيألى إن هو أول سبب، إن احنا ما قبل النكسة يعنى إحنا بذواتنا اللي كنا موجودين قبل النكسة، وطلعنا محملين إحنا طبعا كل أسباب النكسة وكل ما تكشف عنها نفسيا. حتى لو أيا كان الإنسان بعيد أو قريب من الأحداث و فهو محمل. دى حاجة طبيعية فى الشعور فى أعقاب هزيمة - زى مبقول سيادتك - أو حاجة بيبقى كل المسئولين إلا اللي يفوض من الشعب، لكن فيما عدا ذلك نفس الوجوه ونفس الأشخاص! الناس بتحس إن هم دول - يعنى أنا بحللها نفسيا - طب ماهم دول اللي جابوا لنا طب ماهم دول اللي! هو بين السلوك وبين الكلام كيف يستطيع الإنسان أن يخاطب الجماهير الآن؟ فى منتهى الصعوبة.

كيف يستطيع وزير فعلا يجتذب وجدان المستمع؛ لأن هو عارف تقريبا هو هيقول إيه مقدما ومحشود له ناس بالذات وفى مقاطع معينة هيقولها وفى كلام هيقوله.. دى مسألة يجب نتوقعها أما نيجى نحللها هنلاقيها كده.

زى مثلا قيادات الجيش، قيادات كذا وقيادات كذا طب ماهى نفس القيادة! يعنى ده سبب نفسى وطبعا فيه حاجات تانية من ضمنها عدم وحدة الفكر بينا وبين بعض. واضحة أظن يعنى لسه إحنا فى محنة فى شدة، على الأقل لازم هذه المجموعة اللي احنا فيها تبقى أظن فى صلابة.. اللي واقفين فى الخط الأول. كل هذه المسائل مش جديدة زى مايقول سيادتك، فهى عايزة حالة من الحقيقة يعنى عاوزة تأمل.

صدقى: هو إذا اتكلمنا عن موضوع المشاكل اللي موجودة حاليا، أنا بتفق مع الأخ عصام إنها

مش موضوع القضية بقدر ماهى اتخذت لباس بيحطوه فيه للتعبير عن أشياء أخرى.

يمكن الحاجات اللي تقدموا بيها فى هتافاتهم أو فى مطالبهم، بتعبر عن عدم

الثقة فى بعض الأجهزة وفى بعض الأعمال، وسيادتك سألت سؤال يعنى نقطة مهمة

جدا بتاعة عدم الثقة.. الناس بتطالب بالتغيير ماهو التغيير؟

سرى للغاية

أنا عايز ابندى من البداية، الحقيقة إنه علشان الناس تثق فى خط عمل واضح.. خط فكرى واضح، وبالتالي بترى إن هذا الخط هى موافقة عليه فبنتلزم به وتسير وراءه؛ هذا الخط يتمثل فى أذهان الجماهير الأشخاص، إذا سار الأشخاص فى تطبيقهم لهذا الخط بنهج سليم وفق هذا الخط بتوجد الثقة.

الثقة فى هذه الحالة بتنعكس على الأشخاص أيضا. إذاً يجب أن يكون هناك ثقة، على أساس أن يكون فيه مفهوم واضح للخط، والجماهير راضيه عن هذا الخط وبالتالي بنتق فيه.

ثانياً: هناك ثقة فى الأشخاص اللى بيمارسوا السلطة وتنفيذ هذا الخط، ويبقى الثقة تكاملت عناصرها سواء من حيث السياسة أو من حيث الأشخاص.

الواضح - وأنا يعنى عايز أتكلم بصراحة - إنه هذا الخط أصبح مهتر فى أذهان الجماهير!

إحنا إيه؟ هل إحنا اشتراكيين؟ هل إحنا سياستنا اشتراكية؟ هل إحنا سياستنا رأسمالية؟ هل إحنا سياستنا شيوعية؟

الواقع والواضح إن سياستنا اشتراكية، هل كلنا بنؤمن بهذه الاشتراكية؟ هل إحنا فى أعمالنا بنطبق الاشتراكية؟ هل فى كلامنا بنعبر عن إيماننا بالاشتراكية؟

الواضح إن ده يعنى فيه اختلاف كبير فى مفهومنا للاشتراكية فى درجة إيماننا بيها وفى أسلوبنا فى عملنا، كل واحد منا فى نطاق عمله أو فى تطبيقه لهذا الخط - إذا كانت هذه هى الصورة - إذاً أصبح فى أذهان الجماهير أنه ليس هناك خط.. هيمشوا ورا إيه؟!

النهارده اللى مؤمن بالاشتراكية، بيشفوف فيه تصرفات غير اشتراكية تقوم بها الدولة؛ ويمكن بيتكلم عنها أو بينادى بيها أو بيحبذها بعض المسئولين!

إذاً فى هذا الجزء من العمل ييفقد الثقة، عكس هذا ناس بيؤمنوا مثلاً.. إن الاشتراكية تاخذ أسلوب القريب الى اليمينية بيلاقوا إن لأ التطبيق لأ، فيه اتجاهات يسارية.. أيضا هذا الجزء بيخل بالثقة.

وبالتالى إحنا مبقالناش قاعدة، يعنى القاعدة التاريخية اللى هى ترتبط بالمبدأ أصبحت مبلبله الفكر، وابتدت هى أيضا تفقد الثقة نتيجة لأن احنا تصرفاتنا لا تعكس الخط بوضوح.

سرى للغاية

بعنقد إن القواعد أو القاعدة الواضحة والحقيقية لهذا النظام للاشتراكية فى بلدنا، ترتكز أساسا ومبدئيا على الفلاحين والعمال، هل إحنا فى سياستنا بيتضح إن احنا فعلا يعنى بنطبق الاشتراكية بالنسبة لهؤلاء؟! أنا بعنقد إن احنا فى الفترة الأخيرة كانت اتجاهنا ضد هذه! هنتكلم عن ناحية أنا بألمسها وبيجلى بيانات عنها وأعتقد أنها عملية أساسية فى نظامنا وفى عملنا وفى إنتاجنا، وهى العمال.

الناحية الاشتراكية أو القرارات الاشتراكية اللى أعطيناها كمظهر تطبيقى للخط الاشتراكى فى السنين الأخيرة، من حيث الخط بتلاقى إن تصريحاتنا جميعا، يمكن كل مانيجى نتكلم الإدارة هى اللى على حق، العمال هم اللى غلطانين! وأبص ألاقى لوائح جزاءات ومش عارف إيه، يعنى ولا فى عهد الرأسمالية كان بيتعمل مثل هذا! طبعا ده العامل لقينا لائحته الجزاءات ألعن من اللى كان عبود عاملها، بيتدى يهتز إيمانه بالاشتراكية إذا كانت ممثله فى هذا!

القرارات الاشتراكية، قلنا: ٧ ساعات، إدينا إيه فى ال ٧ ساعات؟! قيل إن القيادات تقدمت، وأنا دى نقطة نحب إن احنا نتفق عليها، من هم العمال؟ هل لما بيجتمع ٣ - ٤ رؤساء نقابات ويقولوا العمال قرروا التبرع ببقى ده معبر عن رأى مليون عامل اللى واقفين قدام المكن؟! ده موضوع لازم ناخده بتحفظ. كادر العمال، هم القاعدة الكبرى مش كام واحد اللى يمكن بيعتبر إنه لو قال هذا الكلام ببيان إنه شاطر، وبيأخذ قرارات للعمال.

رجعنا فى ال ٧ ساعات الى ٨ ساعات فده أحد القرارات الاشتراكية. قرار تانى للاشتراكية اشتراك الأرباح لغينا الأرباح. قرار تالت موضوع العلاوات المستمر وقفنا العلاوات! يعنى الحقيقة ألاقى هذا الجزء الهام من القاعدة اللى بيرتكز عليها هذا النظام، واللى بيرتكز عليها المبدأ اللى احنا بنقول إن احنا سايرين عليه، ببقى معذور إنه يتشكك فى إن احنا فعلا نسير على الاشتراكية.

يبقى الواضح إنه يعنى الخط يجب إنه يكون واضح أولا لينا جميعا ونتفق كلنا على تبنيه، واللى مش عايز يتبناه يقول: أنا مش موافق عليه. يبقى المسائل واضحة، لكن لا يجوز طالما إن هو أصبح فى الصورة إن هو الممثل للتطبيق الاشتراكى إنه يبقى تطبيقاته لا تتماشى معاه!

إذا بعضنا أو كلنا كحكومة يعنى، خرجنا عن الخط بدافع أو بأخر يمكن بإخلاص وعن إيمان إن دى مصلحته، لكن هذا الخروج يجعل الخط يهتز فى أذهان

سرى للغاية

الملايين وبالتالي الناس اللى هم مؤمنين واللى هم المفروض وإنهم يقولوا زى ماسيادتك بتقول.

ماهو الحزب؟ الحزب مجموعة من الناس مؤمنة بمبادئ الحزب فانضمت إليه، ولذلك بتقف مع الحزب لأنها مؤمنة بالمبادئ، وتعتبر إن مناصرة الحزب هى الضمان الحقيقى لاستمرار هذه المبادئ.

أما إذا كانت مبادئ نفس الحزب مش متمسك بيها طب هو هيتمسك بالحزب ليه؟! ما هو ممكن إنه يفقد الثقة أيضا فى الحزب، ويبقى علاقته بالحزب علاقة مصلحة وليست علاقة مبدأ.

أما بالنسبة للخط، أنا باعتبار أنا يافندم الشعب كله مش عارف خطنا إيه! إحنا بنقول: الاشتراكية وبصراحة ماحناش اشتراكيين واجهة الاشتراكية فى الأشخاص. وأنا برضه بتكلم معنى بصراحة فيه مننا اللى الشعب بيقول ده يسارى، معنى يسارى إيه؟ هو بيؤمن بخط يمثل مبادئ معينة، وناس بتقول على بعضنا إنه يمينى، معناها إيه؟ ما هو معناها إن هذا الشخص له مبادئ أخرى فى اتجاه آخر.

ماهو أنا أفهم إن احنا يمين ويسار ننصهر فى مبدأ واحد، طالما إن احنا نظام واحد ونمثل حزب. يعنى إذا كنا إحنا حكومة الحزب أو حكومة المبدأ؛ فيجب إن احنا يكون هناك وحدة فكرية واتفاق على المبدأ وكلنا نلتزم بيه.

هل كلنا ملتزمين بيه؟! لا.. فإذا اهتزت الثقة من حيث المبدأ؛ لأن ماهو الخط؟ أنا عايز أعرف - أنا كرجل الشارع - عايز أعرف النظام الاشتراكى اللى أنا مؤمن بيه بيطبق ولا لأ؟! أطالب، والحقيقة إنه الاشتراكية غير مطبقة بالمره يبقى يهتز إيمانى بالمبدأ وبالتالي تعلقى بالخط يهتز!

أقول - أشخاص برضه - أقول: ألقى إن الأشخاص لا يعبروا فى رأى - بالصورة اللى أنا شايفها - يمكن عن إيمان متساوى بنفس المبادئ بالصورة اللى كل واحد بيصورها لنفسه عن الاشتراكية؛ فهنا تهتز الثقة أيضا بالأشخاص هذه الحقيقة! فإذا الثقة فقدت، يمكن لأن احنا ما أصبحناش واضحين فى أذهان الناس. وأنا رأى يافندم، إن احنا أن الألوان أن نحدد الخط الواضح وملتزم بيه. إحنا يعنى يمكن فى الفترة الأخيرة برضه يعنى مشينا شوية كده وشوية كده، فده ضرنا جدا كنظام لأنه حتى القواعد اللى هى الحقيقة إنها ملتزمة معايا ابتدت يعنى الالتزام ده يهتز! يعنى أنا لم أكن أتصور أبدا إن العمال بييجى يوم من الأيام اللى العمال يحصل يعنى إنهم يبقى فيه موقف بهذا الشكل!

سرى للغاية

لكن لما أرجع أقول: إحنا عملنا فيهم إيه؟ أقول والله هم بشر وهم معذورين فى تفكيرهم إنهم يضيقوا ويفقدوا إيمانهم فى الخط اللى إحنا ماشيين فيه! دى نقطة. سيادتكم بتقول التغيير.. يعنى إيه التغيير؟ أولاً: سيادتكم فى الخطاب بتاع ٢٣ يوليو ثم فى ٢٣ نوفمبر، أكيد فيه مراجعة شاملة ويعنى فيه تغيير. التغيير مهواش بس فى القوانين - وده طبعا جانب هام - لكن بيرتبط فى أذهان الجماهير بالأشخاص. فإذا لم يحدث تغيير فى الأشخاص، بيبقى أيضا فى ذهن الجماهير محصلش تغيير، فقطعا لازم بيبقى فيه إشارة الى إن فيه تغيير.

أنا هاقول لسيادتكم دلوقتى بغاية الصراحة، الكلام اللى أنا بقوله ده يعنى أنا مارسته: أنا بجتمع برؤساء شركات ورؤساء مؤسسات، وإحنا هنا سيادتكم برضه مع القيادات اللى بتشتغل معنا كل واحد فى مستواه بيتكلم. فيه اللى بيتساعل يعنى الاشتراكية إيه؟ فيه بيجى يقول: عاملين للاشتراكى شماعه كده نعلق عليها جميع أخطاءنا! وحصلت مناقشات معايا أنا وفتحت الموضوع لأن ما هم دول واجهة هذا النظام، لما يقعد رئيس مؤسسة أو رئيس شركة ويتكلم ضد الاشتراكية وبعدين هو مؤمن بالكلام اللى بيقوله، إزاي بقى الناس بعد كده تقول النظام الاشتراكى؟!

وبعدين الناس برضه حتى إذا أحسنت النية وإن ده قد يكون رأى فرد، بيشوفوا فى التطبيق إن إحنا ما حناش ملتزمين بالخط الاشتراكى، فإذا الصورة تتكامل.

أما أعداؤنا اللى هم غير مؤمنين بالخط من أصله، فدول لن نكسبهم سواء يعنى خرجنا عن الخط بتاعنا أو لم نخرج، سيظلوا هم أعدائنا ولا أمل إن إحنا نكسبهم! نيجى لموضوع مجلس الأمة، من الواقع يافندم، إن فيه عدم ثقة فى مجلس الأمة منذ بداية التشكيل؛ لأن وبعدين بالممارسة فى الواقع، إن الشعب ما حشش إنه بمستوى المسؤولية. يعنى يمكن الكلام عن مجلس الأمة، مش حكاية إنه يعنى فاضل له ٣ أشهر أو ٤ أشهر لا.. لا شعور عميق - زى ما قلت - طب مافيه حاجات كثير حصلت وإنتم مجلس الأمة ما تكلمتوش! يعنى المناقشة اللى حصلت بالنسبة للموضوع اللى كان جمال عطيفى أثاره فى الأهرام وبعدين وقف بعض مجلس الأمة وقال: إزاي الكلام ده إحنا هنا اتكلمنا ويعنى الصحافة قالت على مجلس الأمة، وأعضاء مجلس الأمة، قالوا على الصحافة الكلام ده انتقال النهارده ماتقالش وقتها ليه؟ معنى هذا إن صورة مجلس الأمة أيضا..

سرى للغاية

أنا بقول: إنه مجموع هذه العوامل الحقيقة كانت بتعكس ضيق للناس! سيادتكم فى الاجتماعات فى اللجنة التنفيذية أثرت موضوع مهم جدا.. الأمل. أنا بعتبر النهارده طلبة الجامعة، يمكن جزء أساسى من اللى بيحصل ده الولد يبص لنفسه ولمستقبله إيه أمله فى البلد؟ دا طب ما اللى اتخرج السنة اللى فاتت قاعد فى بيتهم ومش لاقى شغل! وبعدين الصورة قاتمة، ويعنى طيب إذا كان هذا النظام هو اللى بيوصله لهذا ليه يتعلق بالنظام!؟

الانجازات اللى الثورة كانت بتحققها سنة بعد سنة، هى العامل الحقيقى اللى خلت هذا الشعب يؤمن إيمان عميق بها والخط اللى ماشية فيه. ثم عندما تبلورت هذه الانجازات الى خط سياسى عقائدى اشتراكى واضح، خلاص تكتلت القواعد اللى هى المستفيدة الحقيقية بالتطبيق الاشتراكى بصورة قوية جدا وراء هذا النظام. وللأسف إن احنا فى تطبيقنا فى السنين الأخيرة وإحنا أيضا فى سلوكنا كمسئولين، مديناش كلنا الصورة بإن الخط الاشتراكى مستمر وإن الإيمان عميق بهذا الخط، وبالتالي هذه القواعد بتفضل ملتزمة.

الغريب جدا يافندم، إن اللى يقوم بالمظاهرات الطلبة والعمال! الطلبة اللى هم يعنى عاصروا الثورة مفروض إنهم يعنى لم يعاصروا الرجعية ويعاصروا الكلام ده.. يعنى كانوا المفروض دول يكونوا قلبا وقالبا معنا!

سيادتكم تفضلت وقلت: إن احنا التعليم مجانى يعنى غالبية اللى فى الجامعة دول مستقيدين من ذلك، ومع ذلك خرج يتظاهر.. يتظاهر لأن الصورة مهزوزة! العمال يخرجوا يتظاهروا؟! أنا سمعت من العمال وأنا جاى من رؤساء شركات وده قالوه، قالوا: إن العمال كفروا! لأنه بيقولوا: يعنى مش عارفين ليه الضرب ليه كله فوق دماغنا؟! بصراحه كده بيتكلموا، كل حاجة على العمال.. إحنا شايفين إن البلد كلها يعنى بخير ومحدث بيتعمل فيه حاجة فى حد لكن كل حاجة على العمال!

يعنى إذا الثقة تتأكد يافندم مرة ثانية بحاجتين.. تأكيد الخط الاشتراكى وبوضوح، وأنه لا عدول عن التطبيق الاشتراكى كسياسة. حصل كلام فى فترة مابعد العدوان، كان هناك هجوم على الاشتراكية.. ده طبعا موضوع أنا بعتبر إنه غير وارد، ولكن يحتاج الى تأكيد من القيادة للشعب حتى يطمئن.

بعد كده لكل مسئول يجب أن يكون واضحا وضوح الشمس أمام الشعب وأمام كل فرد، إنه ملتزم بهذا الخط وأنه يؤمن بيه، وإلا إحنا برضه بنقول الكلام وينطبقه بشكل تانى! ومرة أخرى بيؤدى الى الاهتزاز.

شكرا.

شاكر: سيادة الرئيس.. فى الواقع أنا مش عاوز أتكلم عن كيفية قيام الحوادث الأخيرة، مين اللى أثارها ومين اللى حرض عليها، ولكن أنا عاوز أشير لظاهرة تكررت فى أكثر من مناسبة وأشار إليها السيد عصام حسونه فى كلامه، وهى استعداد الناس للانفجار لمجرد وقوع أى حادثة!

النحاس باشا بيموت ويشيع جنازته الناس تنفجر! ويحصل مانتش كورة وتيجى النتيجة على عكس مايتمنى الناس بالناس بتنفجر وبشكل مظاهره وحشية! بيصدر الحكم من محكمة وواضح إن المحكمة محايدة وملتزمة بالقانون الناس بتنفجر!

فالعلمية مش مسألة وفاة النحاس باشا أو إن الحكم اللى صدر يتلائم مع مشاعر الناس أو لا يتلائم، إنما ده يدل على وجود نوع من الكآبة.. فيه إحساس عند الناس، وعند الناس بقول: يعنى لأن من ضيق الناس وعلى جميع المستويات بأن فيه كبت. الكبت ده ناتج عن إن الناس بتحس إنهم مبيشاركوش مشاركة فعلية فى العمل السياسى، مبيشاركوش فى إرساء نظام للعمل يضمن إن الشعب ولو فى المدى الطويل يبقى هو صاحب السلطات.

أنا يهمنى هنا إنى أشير ردا على بعض الكلام اللى اتقال، إن احنا يجب أن نفرق بين نظرة الناس لأسلوب الحكم ونظرة الناس لنظام الحكم؛ اللى لا يحتاج لشك إن الناس غالبيتها - وغالبيتها الكبرى - مؤمنة إيمان عميق بنظام الحكم الحالى. ونظام الحكم الحالى يوفر لنا جميعا على مختلف مستوياتنا قدر كبير جدا من حريتنا السياسية ومن حريتنا الاقتصادية، والواقع إنه أعطانا جميعا أكثر مما كنا نفكر فيه أو نأمله.

فالموضوع.. نظام الحكم ليس موضوع مناقشة بين الناس، ولكن موضوع المناقشة هو أسلوب الحكم.

الناس بنقول إيه على الحكم؟ بنقول: إنه من فترة طويلة الحكم فى إيد القلة.. هذه القلة بتحيط بسيادة الرئيس حلقة، وإن احنا كنا بنؤمن فى مناسبات متعددة إن هذه الحلقة تتسع وتشمل أعداد أكبر وأكبر الى أن تشمل الشعب كله، ولكن لسبب أو لآخر ده ماتمش وعلى ما يبدو إن حتى الآن هذه الحلقة بتضيق ولا تتسع!

هو الناس برضه بنقول: إن المسألة مش مسألة مشاركة كده بوجه عام يعنى؛ لأن فيه ظروف تستدعى إن قيادة الثورة تاخذ الأمور فى إيدها وتاخذ القرارات فى إيدها لفترة معينة أو لمواجهة ظروف معينة بذاتها. وده وارد فى كل الدنيا، فى مناسبات معينة

سرى للغاية

بنتعطل برلمانات فى أكبر الدول الديمقراطية، ولكن فى ظروف زى ظروفنا كانت ظروف الثورة ٥٢، الآن قبول الناس لتركيز السلطات فى إيد القلة كان مقبولاً فى مرحلة الانتصارات الوطنية المتكررة؛ سياده الرئيس كل شهرين بيفاجئ الناس بانتصار وطنى كبير.

ففى هذا الوقت الناس بتقبل وبتطمئن الى وجود هذا النظام، ولكن بعد انقضاء فترة الانتصارات الوطنية مباشرة، الناس بتتكلم عن عملية المشاركة فى الحكم وفى مسؤوليات الحكم. إحنا بنسأل نفسنا.. طب إحنا عملنا إيه عشان خاطر نخلى الناس يحسوا إنهم مشاركين فى الحكم؛ بأن لاشك إن هذه الثورة ثورة شعب والغرض منها إنها تؤكد معنى أن الشعب صاحب السلطات؟

إحنا بنكلم الناس وبنشجع الناس إنها تكلمنا، لكن كلامنا للناس خد صورة ضيقة، لنطل على الناس كل يوم جمعة من مقالة الأستاذ هيكل؛ الفترة متباعدة ومساحة الكتابة متباعدة والموضوعات متشعبة ولا يمكن لهيكل أن يتناول إلا موضوع واحد.

الناس كلها يعنى قراءتها للصحف الأخرى هى قراءة خبر مش قراءة رأى، يبقى خيلنا العملية عبارة عن ثغرة ضيقة، لا يمكن للناس والجمهير العريضة إنها تقدر تبص من خلال هذه الثغرة الضيقة عشان تشوف كل ما يجرى فى قمة الحكم!

الناس كمان عشان تكلمنا عن طريق الصحافة، لسبب أو لآخر ولبعض قرارات اتخذت بخصوص بعض الصحفيين، عمليات إعادة تنظيم فى الصحافة شملت بعض الناس، وفسرت على إن الناس دول أبعدهوا أو أوقفوا عن العمل لأنه كتب كذا أو قال كذا، خلت الناس حتى اللي يعملوا فى الصحافة غير واثقين وغير مطمئنين إنهم يقدرنا يزاولوا أعمالهم بالحرية الكافية!

إيه طيب الاتحاد الاشتراكى؟ إيه الدور اللي قام به بهذه العملية؟ الاتحاد الاشتراكى المفروض إنه بيملاً الفراغ اللي بين قيادات وبعض، يجعل فيه اتصال عضوى واتصال نفسانى بين القاعدة. أنا معتقدش إن الاتحاد الاشتراكى فى مراحل مختلفة وُفق فى هذا العمل! والاتحاد الاشتراكى بدل من أن يتحول الى تنظيم مفتوح وينفتح على الناس، اللي إحنا شايفينه النهارده إنه تحول الى لجان.. لجنة الـ ٢٠ ولجنة القسم ولجنة المحافظة! بيجتمع الناس دول بيتكلموا وبيتناقشوا، وأنا بحضر بعض اجتماعات اللجان وأنا شايف إنه يتقال فيها كلام على مستوى كلام كويس، لكن هذا الكلام لا يتقال للناس ولا الناس بتقول لهذه اللجان شئ! فقيمة الاتحاد الاشتراكى كجهاز شعبى الحقيقة لم تتحقق بالصورة المطلوبة!

سرى للغاية

أكثر من هذا الناس أحست فى بعض فترات، إن جهاز الاتحاد فيه محاولة للاستغلال لخدمة أيديولوجية معينة.. فكر سياسى معين أو جماعة معينة، بينما كان مفروض أن هذا الاتحاد يلتزم بالفكر السياسى العام لهذه الثورة.

يبقى إحنا ايه اللي علينا فى الوقت الحالى؟ إحنا يجب إن احنا نعمل على القضاء على حالة القلق وعلى الإحساس بالكبت اللي موجود عند الناس. أنا بقول لسيادتك: إن يعنى أنا شوفت بعض شواهد إمبراح والنهارده؛ لأن أنا مكتبى فى شارع القصر العينى وأمام ميدان التحرير وشايف العملية. طول النهار بتمشى المظاهرات، وبأين إن العملية مهلهلة وغير منظمة والناس دخلت فى الطابور وكل واحد بيقول اى كلام. يعنى المظاهرة الواحدة، لاحظت النهارده مثلا مظاهرة ماشية حوالى ١٠٠٠ شخص و٤ شايلينهم على أكتافهم، الأولانى بيقول كلام! واللى فى الوسط بيقول كلام! واللى ورا بيقول كلام تانى! إنما نوع من التفجير عن شئ محبوس فى صدر الناس، وعمالين يزعموا وعمالين يقولوا هتافات من ضمنها مثلا هتاف غريب جدا.. عاوزين حكومة حرة! ده يعنى حاجة غريبة!

عبد الناصر: بقية الهتاف؟

شاكر: أفندم؟

عبد الناصر: بقيته إيه؟

شاكر: عاوزين حكومة حرة.

عبد الناصر: عاوزين حكومة حرة عيشتنا بقت مرة! مش كده؟! (ضحك)

شاكر: يعنى حكومة حرة.

عبد الناصر: ده بيدى.. ده بيدى معانى كتيرة برضه.

سرى للغاية

شاكر: معلىش، لكن كلمة حكومة حرة! أنا أفهم حكومة جايبيينا الإنجليز تبقى مش حرة، جايبيينا الأمريكان تبقى مش حرة، إنما حكومة وطنية زى دى تبقى مش حرة إزاي؟! مثلا عاوزين حرية رأى عاوزين حرية.. كذا معلىش.

عبد الناصر: لا.. لا هو المطلوب الجزء التانى مش الجزء الأولانى طبعاً.

شاكر: وبعدين الناس اللي وهم ماشيين، أبص ألقى جميع العمارات الموجودة الناس تطلع حتى ستات تصفق لهم، واللى تزرغد واللى مش عارف يعملوا إيه! كان فيه تجاوب تلقائى من الناس مع الحركة اللي بتبدوا كمظاهرة إنها عمل ضد الحكومة! وبعدين بيتدخل البوليس وبيبتدى يضرب المظاهرة عشان يمشيهم. وأحب أقول: الحقيقة البوليس كان بيتصرف كويس جداً.. يعنى كان يمكن يضرب ١٠٠ عصابة فى الأرض وبعدين يضرب عصابة فى المليان بعد ما كان بيزداد عليه ضرب الطوب.

لكن لما زحزح المظاهرة ودخلت فى ميدان التحرير ووصل البوليس الى أمام الجامعة الأمريكية، إذا بسيل من الطوب من المجمع على البوليس. ظاهرة غير طبيعية أيضاً مكانش يجب أبدا إنها تحصل، لدرجة إن أنا نزلت عدد كبير من الموظفين فى المجمع عشان الطوب نازلة من الدور العاشر على العسكرى هتاخذ أجله بهذا الشكل! فلاشك إن حصل نوع من التجاوب من الناس لهذه العملية، اللي فى ظاهرها تدل على نوع من عدم الارتياح أو نوع من الكبت!

عشان إحنا نقضى على هذا الكبت، يبقى لازم نعمل كل شئ عشان نخلى الشعب فعلاً يشترك معنا فى الحكم، نديله كل الفرص للناس كلها، نبطل بقى حكاية عمال وفلاحين ومتقفين وبتاع!

النهر واحد والمجرى واحد، المجرى بتاع الناس كله واحد كل الناس مرتبطين بهذه الثورة، بس كل إنسان أيضاً بيجد إن من واجبه الوطنى أن يشترك بصورة فعلية فى تقرير نظام الحكم وفى تقرير أسلوب الحكم. هذا ليس تحدى لقيادة الثورة وليس انتقاص من قدر هذه القيادة، بل بالعكس إنما هم بيعتبروه واجب عليهم وأنه لا بد إنهم يصلوا.

ده عشان يحصل، ينبغى أولاً: أن يحدث فينا إحنا تطوير نفسى؛ إن احنا نقبل برضا وبترحيب مشاركة الناس لنا فى الرأى، وأن نحترم رأى الناس احترام حقيقى وليكن هذا الرأى.

سرى للغاية

إحنا بنحكم لإيه؟ بنحكم لصالح الناس، الناس لما يعوزوا حاجة لازم نعملها طالما أنها سليمة، والناس قبل ما نفاجئهم بقرار لابد إن احنا نستشف رأيهم فيه، فإذا وجدنا أن هذا القرار هيجد استجابة عندهم نعمله مايجدش استجابة منعملهوش لأنهم اللي هيقع عليهم العبء؛ إذا هم اصحاب الحق الأول والأخير فى هذا.

فالعمل اللي حصل ده فى اليومين اللي فاتوا، هل ده يدل زى ماقال الأخ عصام إن الناس قالت: الحكومة.. الحكومة إيه يعنى؟ يعنى هل الناس النهارده بتهتم إن فلان وزير ثقافه أو فلان وزير عدل أو فلان وزير سياحة؟! دى عملية الناس مبتكلمش فيها إطلاقا الناس، مش زهقانة من الحكومة الناس مش مرتاحة لأسلوب الحكم.

بيعتيرو إن الأسلوب فى صورته الحالية أو فى صورته السابقة أيضا، مإداهمش فرصة كافية علشان يشاركوا مشاركة فعلية فى الحكم. يبقى الاصلاح بيدأ، فى أننا نفكر إزاي ندى للناس فرصة علشان يشاركوا مشاركة حقيقية فى نظام الحكم أو فى أسلوب الحكم.

يبقى لما بيقولوا: إيه هو التغيير؟ يبقى التغيير لاشك فى أسلوب الحكم مهواش فى نظام الحكم؛ لأن نظام الحكم الجميع مستقر عليه ومرتاح.

برجع مرة تانية وبقول: طيب هنصلح إزاي؟ لاشك إن نقطه بداية مهمة. الاتحاد الاشتراكى، ده بعد الحالة النفسية بتاعتنا إن احنا نقبل فعلا مشاركة فى الرأى وفى العمل السياسى.

الاتحاد الاشتراكى يجب أن يتحول الى جهاز مفتوح مبيقاش جهاز مغلق، وحصلت محاولات لتحويل هذا الجهاز الى جهاز مفتوح وحصل إصرار من الاتحاد الاشتراكى إن يبقى كجهاز مغلق!

وأنا بأشير الى حديث تليفونى حصل من السيد عبد المحسن أبو النور لى، بيسألنى بيقول لى: ليه إنت ليه مبتعاونش مع الاتحاد الاشتراكى.. ليه؟ ده قبل ما ييجى السيد على صبرى. قلت له: والله أنا يسعدنى جدا إنى اشتغل مع الاتحاد الاشتراكى؛ لأن ده التنظيم الوحيد اللي أقدر أتسند عليه فى إدارة الوزارة. وأنا بعد هذا الحديث جبت بتوع الاتحاد الاشتراكى، وقلت لهم: إن احنا نشغل بنظام عمل جديد، وأنا مستعد أحضر معاكم مرة فى الشهر على الأقل، ونعمل اجتماع للناس كلها منقولش اجتماع بس لرجال الاتحاد الاشتراكى، خلى الناس تتكلم فى الموضوعات ونرد على الموضوعات بصورة صحيحة، ويبقى فيه قبل كل اجتماع بنتصل برئاسة الاتحاد

سرى للغاية

وبنشوف إيه هى الموضوعات اللي مفروض أن تثار فى هذا الاجتماع.. متفقين؟ متفقين.

بعد هذا مجوش ولا مرة! ولا قبلوا إن يعقد اجتماع مفتوح! نفس الاجتماعات المغلقة لجان الـ ٢٠ واللجان الجماهيرية وكذا! مفيش إطلاقا! اتصلت بيهم مرة واثنتين وتلاتة.. مفيش! يعنى هم متصورين إن العمل ده حكر عليهم، إن هم فازوا فى الانتخابات وان العمل السياسى حكر عليهم ومش مفروض إن الآخرين يشتركوا فيه بقى!

فيه النهارده مواطن عضو فى الاتحاد الاشتراكى وده ومواطن ليس عضوا فى الاتحاد الاشتراكى، وده ملوش الحق إنه يعمل فى العمل السياسى. الدكتور طعيمة الجرف مثلا ببيجى إمبراح بيقول: أنا رايح أكلم الناس فى الجامعة، طب مكلمتش الجامعة ليه؟! ده إنت عضو الجيزة بقالك ٦ - ٧ سنين! طب مرحتش ليه كلمت الطلبة مرة واثنتين وعشرة من ٦ - ٧ سنين فاتوا لغاية النهارده!؟

اشمعنى النهارده لما وقعت الواقعة تكون بتفكر إنك تروح تكلم الناس؟! طب ماكان يجب هذا الكلام يحدث من الأول. الناس اللي هم فى المصانع حتى، هل هم فعلا بيقدوا مع العمال وبيكلموهم؟ لأ.. مبيتكلموش! بيقدوا برضه فى الاجتماعات المغلقة وبيتكلموا ويروحوا، لا العمال سمعوا حاجة ولا العمال قدروا ينفسوا عن صدرهم ويقولوا اللي فى ذهنهم!

مجلس الأمة، هجوم شديد على مجلس الأمة وهجوم شديد على السيد أنور السادات، طب هو يعنى نفرض إن احنا حلينا مجلس الأمة وعملنا انتخابات جديدة، ما هيبجى برضه ناس هى الناس الموجودة! طب إحنا هنجيب ناس منين؟! ما هو الناس الموجودة كويسة برضه، ولكن العيب هو مش فى مجلس الأمة نفسه العيب فى نظام العمل فى مجلس الأمة، فعندما يتعدل نظام العمل فى مجلس الأمة هينتفى الشكوى من مجلس الأمة وقصور مجلس الأمة عن إنه يزاول واجباته.

بأجى لنقطة أثارها الدكتور عزيز، وبيقول: الاشتراكية والإيمان بالاشتراكية. أنا يمكن يعنى شايف الدكتور عزيز بالغ فى التعبير، وبيقول: الناس النهارده أصبحت مبلبله ومش عارفه إحنا مؤمنين بالاشتراكية ولا مش مؤمنين بالاشتراكية، وما مدى إيماننا بالاشتراكية؟ هذا الكلام فى تصورى فيه مبالغات كثيرة! كلنا مؤمنين إن هذه الاشتراكية حقت آمالنا كلنا.

سرى للغاية

فلاحين، طب مين فى الفلاحين كان بيأمل أو بيتمنى إن يصل الى ما وصل اليه الآن؟! هل النهارده فيه استغلال فى الريف؟! هل النهارده فيه أخطاء فى الريف؟! هذا كلام مش صحيح. فيه أخطاء طبعا، إنما زى ماسيادتك قلت: أينما وجد عمل فيه خطأ وأينما وجد البشر فيه أخطاء!

لكن إحنا لازم نبص للخطوط العريضة، الريف النهارده فى وضع ما كان يصل اليه والله فى ١٠٠ سنة! العمال.. العمال، المكاسب اللي أعطتها الثورة للعمال هل عمر العمال طالبوا بهذه المكاسب؟! هل فكروا أن يصلوا الى جزء من هذه المكاسب؟! الثورة إدت هذه الطبقات وغيرها من طبقات والمتعلمين والمتقنين؛ مين المثقف اللي كان بيأمل إن التعليم الجامعى فى مصر - هذا البلد الفقير - يبقى مجانا، وانه يطلع والحكومة تلتزم بإنها تعينه وتديله المرتب وتعمل له مكتب وساعى على الباب وكذا، علاوة كل سنة حتى لو لم يقد يعمل؟! أنهى عهد بيدي للناس كده؟! يبقى بعد نتصور إزاي إن الناس مش مؤمنة بالاشتراكية؟! ولكن الحقيقة الاشتراكية قوالب جامدة، الاشتراكية ملهاش قوالب جامدة فى الاتحاد السوفيتى اللي هو مهد..

عبد الناصر: اختصر.

شاكر: إيه؟

عبد الناصر: اختصر.

شاكر: حاضر يا فندم.. يعنى لازلنا بنجد الجماعة اللي بيقولوا عليهم استالينيين ولازلنا بنجد الجماعة اللي بنقول عليهم معتدلين، والله أنا بعتقد إن دى علامه صح مهياش علامة غلط، منقدرش إطلاقا نقول إن فيه خط محدد وكلنا نصب فيه ونمشى فيه بلا قيد ولا شرط.

إنما إذا كان الموضوع.. موضوع إن محاولة حقيقية بتتعمل النهارده عشان يتوضع أساس اقتصادى سليم للعمل؛ سواء فى قطاع الزراعة، سواء فى قطاع الصناعة سواء فى الخدمات.. الى آخره، وهذا النظام يضمن إيجاد قاعدة اقتصادية سليمة تدينا الفرصة إن احنا نتقدم ونمتد وننمو بصورة سليمة، وإن منواجهش بموقف مالى فى وقت

سرى للغاية

قريب أو بعيد، لا يمكننا أبداً من التقدم، ويضطرنا إن احنا بنسحب من قطاعات كثيرة الناس بياخدوها دا وضع آخر.

أنا بعتمد إن الاشتراكية معناها، العمل الصحيح على أساس علمى صحيح. أنا مقدرش إطلاقاً استمر فى إنى أدى الفلاحين سلفيات من بنك التسليف بلا فوائد، وبعدين بياخدوا هذه المبالغ وبيضيعوها وبيبقى المبلغ ٤٢ مليون جنيه راحت على الدولة! العمال فى وقت ما فى مثل هذا الظرف مقدرش أديهم العلاوة بتاعة آخر السنة. فيها إيه؟ طب ما فى قطاع السياحة ٣ آلاف عامل قاعدين فى بيوتهم وبيأخذ مرتبه بالكامل. كل الفنادق فى القطاع الخاص كل شركات القطاع الخاص رفدت الناس، الحكومة مرفدتش الناس بتديله مرتبه كامل وهو قاعد فى البيت! هل منتظر منى كمان آجى آخر السنة وأديله العلاوة بتاعة ١٠٪ و ١٢٪؟! أظن إن ده نفس العامل لا يرضاها ولا أعتقد إن العمال بيثيرو هذا الكلام!

يبقى خلاصه الكلام يافندم.. إن نظام العمل، وهذه الثورة فى قلب كل إنسان وكل إنسان بيعلم إن مستقبله ومستقبل أولاده فى هذه الثورة، ولكن الحاجة الللى بنالاحظها ولا سبيل الى إنكارها هو أسلوب الحكم.. أسلوب الحكم ينبغى أن يحدث فيه تغيير أساسى؛ بحيث الناس تحس بحق إنها مشاركة فى تقييم نظام الحكم ومشاركة فى تنفيذ ومشاركة فى الرقابة ويصح الحق فى هذا على كل حال.

ف. فوزى: بعد إذن سيادتك ٣ دقائق فقط وأبدأ فى حديث أول الجلسة، - شايف إن المناقشة والتوضيح الللى تم بالنسبة للمظاهرات الللى تمت، لو تصاعدت ستصبح فى غير الصالح العام. وعلى ذلك باقتراح تحويل قضية الطيران تجاوبا مع الاتجاهات الشعبىة، ولو إن هذا من رأى مخالف للقواعد القانونية إلا أن الشعب فى هذه الحالة، لو أجمع المجلس أنه رأى متكامل يمثل الشعب بغالبية.

فتطوير الموضوع تجاوبا مع القاعدة الشعبىة، يكون فى الصالح العام لغرض استقرار القاعدة الداخلىة؛ المفروض أنها بتعد نفسها وراء القوات المسلحة فى المعركة اليوم.

من ناحية الأسلوب، ممكن القضية تيجى لأمر التشكيل ويتم تحويلها على نفس المستوى العسكرى برضه.

عبد الناصر: يعنى بمعرفتك إنت؟

سرى للغاية

- ف. فوزى: أيوه.. محكمة أخرى عسكرية. يحدونى فى هذا الرأى بعض نقاط:
- ١- السيطرة على القوات المسلحة مضمونة ١٠٠٪ بالنسبة لرأيها فى هذه القضية.
 - ٢- إنى أنا اكتشفت عدم وجود وحدة فكر داخل ٥ أعضاء المكونين للمحكمة.

عبد الناصر: إفرض راح للمحكمة الثانية حكموا عليه براءة بقى هنعمل إيه! (ضحك) لأن يعنى أنا عارف مناقشات المحكمة وأنت عارف! (ضحك)

ف. فوزى: توضيح بسيط.. سيادتك علمت إن حصل تغيير جذرى فى القوات الجوية بعد ما كنا ثبتنا الشهود، فجاءوا الشهود ضمن الـ ١٨ قائد التالين للفريق أول صدقى مباشرة من خلال القضية طلوعوا المعاش، فكانت هذه نقطة تطوير من الناحية الفنية داخل القضية.

عبد الناصر: طب ما هم هيجوا شهود تانى نفسهم!

ف. فوزى: محكمة جديدة.

عبد الناصر: لا.. لكن هم الشهود هيجوا شهود!

ف. فوزى: الشهود بالنسبة لهذه القضية القوات الجوية بكاملها، والنيابة العسكرية استقرت القادة القريبين من الموضوع، وكانوا هم القادة فى ذلك الوقت اللى موجودين فى قيادة القوات الجوية.

الغرض هو امتصاص الحادث اللى بنفكر فيه فى الوقت الحاضر، ونشيل الواجهة اللى ابتدينا بيها الحديث عشان نوصل للجذور الأصلية عن السبب فى هذا القلق الموجود فى الوقت الحاضر ولا نعطى الفرصة. هنصلح الواجهة اللى هم بيتحججوا بيها.

أول يوم بدأت مظاهرة صغيرة استخدم فيها المنطق، وتانى يوم دخلت بأسلوب آخر، وتالت يوم الأخ شعراوى طلب منى النهارده قنابل غازات بكره شئ آخر بعده شئ آخر!

سرى للغاية

الجبهة موجودة على القنال تعلم تماما إن القاهره هى القاعدة بتاعتها، وأنا من ناحيه المنطق العسكرى - إنجلترا كانت ديمقراطية طول عمرها وتشرشل أصبح ديكتاتور وقت الحرب - فلا بد من السيطرة الكاملة والأمن الكامل طول ما إحنا موجودين فى المعركة؛ أمر واجب لا بد إن جميع الشعب يلتزم بيه، ولا بد إن القوات المسلحة تشعر بأن هناك تأييد كامل لهدفها فى دخول المعركة وهى بتعد نفسها الآن.

عبد الناصر: ماهو إزاي والأحكام؟

ف. فوزى: لا يافندم.. عشان حاجة بسيطة إن الحثيات لسه ماتمتش.

عبد الناصر: وانتم هتحققوا إزاي قبل الحثيات؟!

ف. فوزى: والله بتجلى ورقة واحدة مش ضرورى حثيات كاملة، مادام فيه اقتناع بالشكل ده، والمواجهة للشعب تكون بصراحة؛ تجاوبا مع الاتجاهات الشعبية وإذا كنا اقتنعنا..

حسونة: أنا طبعا يعنى مع تقديرى للأخ فوزى أخذ الجانب السياسى وساب الجانب العسكرى يعنى أخذ الجانب الشعبى، إنما هتكون سابقة سيئة جدا يعنى بناء على ضغط معين يعاد المحاكمة! منضمنهاش يعنى إنها تكون دايمًا سليمة، وهتبقى أيضا ضغط على المحكمة الحالية طبعا بشكل صعب.

صوت: ياسيادة الرئيس دى قضية مش عادية حتى إن احنا نستخدم فيها الأساليب التقليدية، وأنا أويد السيد وزير الحربية فى كل ما قاله، وأنا التمس من سيادتك يعنى المبادرة الليلة بإعلان هذا للشعب.

رفعت: أنا تقديرى لاتخاذ هذا الرأى، ده يمكن يوسع العملية أكثر؛ طالما العملية دخلت فى مطالب أكثر من موضوع المحاكمة، إذاً استجابة لهذا الطلب هيستتبعه مطالبات أخرى إذاً يعنى هى دى القضية دلوقتى.

سرى للغاية

سليمان: هو يعنى قطعاً زى سيادتك ماقلت: إن سيادتك مش راضى عن الحكم وكل الشعب برضه بنفس الأسلوب. سيادتك فى ٢٣ يوليو قلت: الشعب يريد وأنا معه، وفى القضية هنا واضح جداً إن محدش فى الشعب رضى بهذا الحكم.. ده من ناحية الحكم. من ناحية المطالب، أنا لى رأى فى عملية الحريات والحاجات دى كلها؛ إحنا فى حالة حرب جزء من بلدنا محتل، فممكن هنا بعد ما يعلن مثل هذا بتتخذ أى إجراءات أمن مستمرة ومتكاملة لحد إزالة آثار العدوان. العملية مش عملية إن احنا نزيد من الحريات ونزيد وينطلق من كذا وينطلق من كذا، مفيش دولة فى العالم فى حالة حرب وفيه بلد جزء من بلدها محتل وهى بتبتدى تخش فى مناقشات فكرية، هل بتزيد الحريات هكذا؟! لآ.

الحريات فى إطار محدود اللي تسمح به حالة إزالة آثار العدوان، واللى تسمح به حاله الحرب، هو اللي احنا بنمشى فيه ككل مع الضمانات الموجودة. العملية هى هتبتدى تبقى مزادات وقوانين حريات والحاجات دى كلها؛ يعنى أنا شخصياً أرى إن فيه جزء من بلدنا محتل، بأرى إن احنا لابد إن يبقى لدينا خط واضح نحو إزالة آثار العدوان. وهو ده الهدف الاصلى فى العملية، مش عملية مزيد من الحريات ومزيد من غيره! لابد يبقى فيه سيطرة كاملة وبالشكل ده بنقدر نحقق هذا.

أما بالنسبة لهذه القضية، قطعاً رجوع القضية للمحاكمة العسكرية هيمتص الى حد كبير جداً السخط اللي واقع. إحنا فى اللجنة التنفيذيه لما سمعنا الحكم، نسينا اللي احنا كنا بنتكلم فيه.. وإحنا وزراء! طب وإحنا يعنى موجودين والشعب وكان وطول النهار بنقابل الناس وبنتكلم مع الناس فى كل القواعد فى العمليات.

فأنا يعنى اقتراحى الآن وبأؤيد اقتراح السيد وزير الحربية، وده اقتراح سليم جداً بالنسبة للكلام المبتدئ فى أول الجلسة لمزيد من الحريات وغيره. وسيادتك قلت هذا الكلام.. قلت لما اتكلمت كده مرة من المرات: لما زالت الأحكام العرفية ابتدينا إن احنا نشكل الخلايا ونعمل الحاجات دى.

إحنا مش فى وضع طبيعى الناس تقدر تشكل على كيفها وتعمل على كيفها.. دى مسألة حرب. النهارده لو أمريكا رمت مليون جنيه - مخابراتها المركزية - فى البلد أو عملت أى حاجة هى أو غيرها، طب وده مين اللي بيضمن هذا. مؤكد أن مثل هذه الحركة فرصة العمر لأى جهة استعمارية تحاول تغذيها.. وتغذيها بالشكل الغير طبيعى. وطبعاً إحنا عندنا فيه قوة معارضة موجودة، وطبعاً فيه ناس مستغلين موجودين، وإحنا فى حالة لا تسمح بحال من الأحوال بأى نوع من هذا التخريب؛ لأن

سرى للغاية

احنا فى حالة حرب. وفى حالة الحرب، كفاية أوى إن ضمان حريات صحافة. ده كان يجب إن يبقى فيه رقابة على الصحافة ورقابة على كل الدنيا طالما إن احنا فى حالة حرب، وإن جزء من بلدنا محتل من العدو. وإن الشعب أيد القائد فى ٩ و ١٠ يونيه وادى له التفويض بإنه يعمل اللى هو عايزه بأى شكل؛ سواء كان من جانب حريات أو من جانب زيادة فى الضمانات لإزالة آثار العدوان.

حسونة: هو أنا بس عاوز أضيف كلمة يعنى مع تقديرى الكامل للكلام اللى قيل عن تعديل الحكم، إحنا فى كل كلامنا قلنا: إن دى كانت يعنى تكأة لعمليات أخرى، وإن حتى لو أخذنا من مقدمة المظاهرة الحكم هتظل المظاهرة ماشية لأسباب تانية يعنى فبقول..

عبد الناصر: قطعنا اللى بيقول أمين بيسقفوا! قطعنا بيسقفوا لأنهم مهماش موافقين على الحكم.. يعنى مش معقول الستات يعنى إيه..

حسونة: ماهو يعنى.. ماهو الحكم جزء يعنى من الناحية النفسية، يعنى هو زى ما بقول: بندخل بيه للمهاجمة بدليل إن فيه تنظيمات مختلفة. فيعنى العملية داخلية فى الحكم، ولا يههما إن فلان بياخد كذا أو كذا هى اللى يههما إدانة النظام كله؛ يعنى آدى اللى هى عاوزاه.. يعنى هى عاوزة فى أى مكسب تبقى عاوزة ضحايا! هى خطورة المسألة، إن سيادتكم بتقول: لما أعطيت تسهيلات فى قوانين الحريات زادت العملية مش كده؟! طب لما نعطى لرجل الشارع إن يحكم ماذا ستحدث؟! ماذا سيحدث فى البلد؟!

أبو النور: إذا سمحت لى سيادتكم بالنسبة للموضوع اللى اقترحه الأخ فوزى، هو دون شك تغيير الحكم مطلب شعبى.. يعنى مجمع عليه كل الشعب حتما. لكن أنا فى رأى إن ماحدث من مظاهرات فى الكام يوم اللى فاتوا، ليس وضع تعبيراً عن الحكم فقط، وإن المظاهرات هذه وماحدث فى القاهرة بالذات، مدسوس فيه ناس بأهداف لا تتعلق بالحكم بل بما هو أبعد من هذا؛ بدليل الإسكندرية عبرت عن رأيها فى الحكم بكلام منطقى وانصرفت ومحصلش حاجة، أسيوط محصلش حاجة!

عبد الناصر: بعتوا تلغراف.

سرى للغاية

أبو النور: بعثوا.. أنا باتكلم أبدو رأيهم ومحصلش حاجة. المنصورة إدوا رأيهم ومحصلش حاجة، إذاً واضح تماماً أن هناك تكتل مدفوع من ناس مخصوصين بهدم القاهرة بهدف أبعد من عملية الحكم، وواخدين عملية الحكم مظهر يدخلوا منه فى هذا الموضوع. لو إحنا استجبنا فى الفترة الحالية المباشرة لوضع الحكم، هتديهم الفرصة أن يأملوا لما يهدفوا اليه فيما وراء هذا الموضوع، وهيستمر هذا الكلام لما هو أبعد ويحاولوا أن يعنفوا هجومهم علشان يصلوا الى ما هو أبعد من هذا!

ولذلك أنا باقتراح فى رأيي، إذا كان ممكن علشان ميحصلش حاجة بكرة أو فى المدى القريب، إن احنا بندى جامعة القاهرة وجامعة عين شمس أجازة لغاية العيد. وفى هذه الفترة الدنيا بتريح، وينحاول ندخل للناس وينحاول ندخل فى الطلبة ونحاول نفهم الناس الحقيقة إيه والوضع ماشى إزاي؛ لأن دون شك اللي بيدفعوهم مهما كان قلة ومهماش كل الطلبة.

وفى هذه الفترة ممكن جدا بعد ما الدنيا تريح وميفاش فيه هذا الضغط، ممكن أن يحصل التحوير كمطلب شعبى ومطلب طبيعى؛ إن احنا الفترة خدناها على ماجت حيثيات الحكم وبعدين الأمر بالتشكيل لم يقتنع بحيثيات الحكم، يبقى مشينا فى ناحيتين.. أولاً: معملناش تحت الضغط وما إدناش الفرصة للضغط. وفى نفس الوقت المطلب الشعبى.

ف. فوزى: القوات المسلحة نفسها مقتنعة بأن الحكم ضعيف؛ لسبب بسيط فنى عرفناه فيما بعد إن مفيش قدرة عندنا فى إننا نجيب إدعاء يناسب منطق الشعب؛ لأن الخبراء الروس اللي معانا اندهشوا وقالوا إزاي فيه براءة؟! عرفوا فيه براءة فى الموضوع، طلع إن القانون بتاعهم فيه إجراءات تخص المعركة مش موجودة عندنا خالص فى القانون! فالنيابة العسكرية اللي قدمت القضية متنبهناش لمثل هذا، ولأول مرة نجابه بهذا المنظر.

النقطة الثانية: القوات المسلحة واحدة على التحوير، يعنى من بعد المعركة فيه قادة جم جداد مش قابلين أسلوب تطبيق قانون الأحكام العسكرية وقواعده الانضباطية اللي جت ملحقة له!

يعنى ممكن رائد يبقى قاضى يجُوب بقائد اللواء - اللي هو برتبة لواء - وإن ملازمين احتياطي؛ واحد دخل فى يوم مسك ايد بنت فى السينما والثانى باع ٢ رشاش باعهم، والاتنين خدوا حكم سنة حبس. حور القضية - برضه جه حكم مش أوى -

سرى للغاية

حور القضية.. يعنى كلمة تحوير المحاكم داخل القوات المسلحة أمر مسلم به، وحدثت حوادث بهذا الشكل كثيرة.

فيعى داخل النطاق العسكرى مهوش غريب؛ خصوصا أنه متجاوب مع الرأى بتاع القوات المسلحة خلاف أنه متجاوب مع الرأى الشعبى. وإذا كان الخطأ فى القانون أنه مش مستكمل، مش معنى ذلك إن احنا نصبر عليه بل يكون فيه محاولات أخرى ولو وقتية، نحاول فيها الوصول الى حقيقة ما لغاية مانغير القانون وندخل فيه جزء كبير جدا يخص إجراءات المعركة.

والطلب الثانى: أن تكون المحكمة الجديدة علنية - إذا وافقت سيادتك - لسبب بسيط ما هو لو كنا هنعمل التكتيك بتاع ما قبل المعركة يبقى مينفعش ندخل المعركة.

الشافعى: هو الحقيقة الكلام اللى الأخ فوزى بيعرضه، يعنى إن الواحد يقول فيه رأى على طول كده العملية مش سهلة. وطبعا مفيش شك إن هو مسئوليته عن القوات المسلحة، ما من شك إنه بيشعر فى نفس الوقت بالخطورة يعنى فى القاعدة وفى البلد مبتقاش قاعدة تساند جبهة الجيش كلية. وما من شك إن دا اعتبار أمن قومى كبير وكبير جدا.. دا اللى بيدفعه ويبدعه النهارده إن هو يحور المجلس. ودى مفيش شك إن سلطة الضابط الأمر بالتشكيل له سلطة إنه يخفف أو يصدق أو يحور المحكمة.

مفيش شك أنه لوجود القصور فى القانون ودا اعتبار، فعلا الناس أحست بأن الجزاءات لا تتناسب مع الصورة اللى تكونت عند الناس من العدوان. النهارده ويمكن العملية مش هنا داخليا بس بل هى أيضا فى البلاد العربية، وتعليق جميع الصحف العربية تقريبا مشتركة مع الرأى العام الداخلى فى مصر؛ ولذلك يعنى الواحد اللى بيخشاه إنه نفس التحوير ما عرفش رد فعله بالنسبة لشعور الناس بالنسبة للجيش، إن إجراءاته يعنى طبعا بعد المعركة حصل فجوة بين الجيش والشعب.

النهارده لما ييجى التحوير لأن الإجراءات مأسعفتش أو التنظيم الداخلى لم يسعف، ما عرفش برضه رد فعلها على شعور الناس بالنسبة للنظام داخل الجيش!

الواحد بيخلص من هذه التساؤلات - الواحد قبل مايقول رأى أخير - برضه الواحد يحب يسمع يعنى - إذا سمح سيادة الرئيس - الأخ وزير الحربية. هو بيقول: إنه هو ضامن الأمن داخل الجيش و.. و.. الى آخره، أنا بيتهيألى إن هذا الإجراء له رد فعل من الشعب على الرغم من إنه استجابة لعواطفه؛ لأن فعلا الجزاءات لا تتناسب مع ماكونه من شعور بالنسبة لهذه العملية. ومن ضمن الكلمات اللى بيقولوها الناس:

سرى للغاية

مانشطروش إلا على الصغيرين! ضابط احتياطي يدوه مؤبدا! ودى كلمة يعنى الحقيقة بتتردد ومش لاقية فعلا تفسير. ويمكن الواحد يقدر يفهم ما وراء كلام الأخ فوزى، بالنسبة لأنه يفرض إن العملية تكون علنية لأن الموضوع أصبح موضوع كبير.. وكبير جدا. الموضوعات الثانية: يعنى الإخوان اتكلموا بما فيه الكفاية، ولكن يمكن بس بأصيف نواحى صغيرة ولكن لها تأثير. يعنى الأخبار اللى بتنتشر مثلا عن العمليات فى الأردن، ما من شك إن ليها انعكاس برضه داخلى.. يعنى بيقلوا: الأردن الصغيرة دى عمالة تعمل كذا وكذا وبعدين إحنا مبنقومش بعمل، وفى الوقت نفسه الناس اللى غلطوا فى حق البلد كان جزاؤهم بهذا الشكل! دى صورة لها انعكاسات.. وانعكاسات كبيرة قوى قوى.

صبرى: الحقيقة يعنى بصرف النظر عن..

عبد الناصر: إذا سمحتوا لى قبل على مايتكلم.. أنا جالى منشور مطلعينه الولاد اللى فى كلية الهندسة جامعة القاهرة بيقلوا:

"إننا جميعا - جميع الطلبة المعتمدين - إننا جميعا نقدر أهمية المطالب الحقّة التى نطالب بها، وثقة منا فى قدرتنا وأنفسنا على التغيير فإننا نهيب بكم جميعا أن تتبينوا أن ما تريدونه بالضبط، ويجب أن يعلم كل حر فيكم أن الحرية تؤخذ ولا تعطى وأنها تغتصب ولا تمنح!

وبما أننا ليس لدينا من القوة ما هو قادر على فرض مطالبنا، فقد وجدنا ووجدت معنا - وخصوصا ماحدث اليوم - أن السبيل الوحيد الى أن يسمع صوتنا الشعب فى كل مكان من أنحاء البلاد، وحتى يستطيع كلا منا أن يأمن على نفسه فى بيته فى ظل دولة المخابرات هذه! ونجبر السلطة الحاكمة على احترام الحريات واحترامكم أنتم بالذات بصفتكم قمة الطبقة المثقفة الواعية فى هذه البلد. وإيماننا منا بهذا فقد رأينا:

إن طريقنا الوحيد اليوم الى تحقيق أهدافنا السامية، هو المقاومة السلبية فى صورة اعتصام كامل قد يكون مدة من الوقت لا نعلم مداها. ويجب أن تعلموا جميعا أن المسألة مسألة وقت، ويجب أن نعلم أيضا أن العدو على الأبواب يتربح لحظة ضعف فينا ومن مصلحته أن يزعزع جبهتنا الداخلية، وأن هناك كثيرا من العناصر الدخيلة التى قد تحاول أن تحرك عواطفنا ومشاعرنا لتوجهها؛ لتحقيق أغراض بعيدة كل البعد عن قضيتنا الرئيسية.

سرى للغاية

فليكن فى علم كل منا، أنه كلما طال بنا وقت الاعتصام - بغض النظر عن أى اعتبارات أو احتياجات يومية أو فردية - كلما اقتربنا أكثر من أهدافنا وعلا صوتنا؛ ليجمع حولنا كل فرد فى الأمة، فقد قرر مجلس الكلية أن يبقى معنا طالما بقينا فى الكلية؛ ولذلك يجب على كل منا أن يقدر الموقف ولا يعتريه القلق حتى لا نتشتت. وليكن واضحا للجميع أننا لن نقبل المساومات، وأن مطالبنا هى:

- الإفراج فورا عن جميع زملائنا المعتقلين.
 - حرية الرأى والصحافة.
 - مجلس حر يمارس الحياة النيابية الحقة السليمة.
 - إبعاد المخابرات والمباحث عن الجامعات.
 - إصدار قوانين الحريات والعمل بها.
 - التحقيق الجدى فى حادث العمال فى حلوان.
 - توضيح حقيقة المسئولية فى قضية الطيران.
 - التحقيق فى انتهاك حرية الجامعات واعتداء الشرطة على الطلبة.
- هذا وسنبقى معتصمين حتى تجاب هذه المطالب من أجل مصلحة الشعب الحقيقية.

وقفنا الله وإياكم فى خدمة ونصرة وطننا".

طبعاً حكاية حرية الجامعات، ماحدث دخل الجامعات هم اللى طلعوا مظاهرات،

أصول يروحوا النيابة ويروحوا المحكمة!

فده الموضوع يعنى، وبرضه أسمع برضه قبل ماقول رأى. (ضحك)

صبرى: الحقيقة أنا سمعت طبعاً الآراء كلها، وأنا متفق فى أغلب الكلام عن إن موضوع القضية ليس هو الموضوع الأساسى أو الوحيد، ولكن هناك عوامل أخرى ذكر منها الكثير ولم يذكر البعض الآخر.

إنما فى الواقع ومن صورة التقارير اللى جت، واضح أن هناك إجماع كامل فى الجماهير على موضوع القضية، وأن القوى المضادة أو القوى اللى هى فى ذهنها أى تدمر، اجتمعت كلها وأيدها الناس تلقائياً فيما يختص بموضوع القضية وتحولت العملية بعد ذلك الى دروب فرعية.

سرى للغاية

فى الواقع يعنى أنا بفصل موضوع التنظيمات اللى فى كليه الهندسة أو غيرها، إنما بتكلم من خلال مناقشات جادة ولقاءات مع ناس عاديين ومؤيدين للنظام بإيمان؛ بيتساءلوا - حتى وفكرهم مبلبل - طب مين المسئول؟! وده سؤال بي طرح، وهناك نكسة وتحديث عنها الرئيس فى ٢٣ يوليو، وتقدم للمحكمة وتهياً للناس إن صدقى محمود أو قياده الطيران هى المسئولة. طيب إذا كانت المحكمة قالت: إن هو إهمال طب مين المسئول عن النكسة؟! لم تتضح بالشكل الكامل.. ده جانب.

الجانب الآخر من التساؤل، انصب على طيب هل هناك لاتزال مراكز قوى بتضغط على الرئيس حتى لا يتحرك بحرية؟ وده تساؤل آخر جعل أن الحكم.. وقيل فى هذا كلام كثير: إن دول زمالتهم وطبعاً هيطلعوهم و١٥ سنة الى آخر هذا! فى الواقع هو ده السبب اللى بقوله، من لقائى من الناس الغير منظمة واللى يعنى موجود يمكن فى كل بيت، وغيره من التساؤلات عن الضابط الاحتياطي اللى واخذ مؤبد.. والى آخره.

ففى الواقع إن ده اللى بيفسر الظاهرة، إن وهى ماشية المظاهرة الناس بتزرعد لها. قطعاً اللى بيزغردوا فى الشبايبك مش بيزغردوا لا لمجلس الأمة، والنسوان اللى بالملايات ولا يهتمهم مجلس الأمة ولا الواغش اللى كان فى الشارع بيهمه مجلس الأمة ولا أسلوب الحكم، ولا هو فاهم إيه أسلوب الحكم ولا الكلام ده، إنما هو تلقائى التقت عليه الجماهير كلها، هو موضوع المؤامرة. كون بعد كده أن استغللتها بعض العناصر المضادة، ففى الواقع فى رأى إن طالما موجود هذا الموضوع واضح فالجماهير ستؤيد المظاهرات!

وهنا وضع الخطورة، إن الجماهير اللى هى مع الثورة ومؤيدة للثورة وتلقائياً مع الثورة بتجد نفسها مؤيده لقوى مضادة للثورة بدون وعى أو لسبب فرعى وهو سبب القضية. ولولا أن الأحكام اللى صدرت، كان فيه تدمير وكان فيه كل هذا الكلام بيتقال، لكن مكانش هيولد مثل هذا الانفجار لأن حتى أعداءنا مكانوش يقدرنا يلاقوا موضوع واحد يجمع عليه الشعب مثل هذا الموضوع!

ولا يمكن، يعنى الواحد كان بيخوف إن فى أى موضوع حتى فيه انقسام فى الرأى، يعنى فيه ناس بتقول: نحل الاتحاد الاشتراكى، يقف واحد يقول له: لأ.. مانحلش الاتحاد الاشتراكى نقويه فى نفس الجدل. بنجد واحد يقوم مثلاً يقول: عاوزين حرية الصحافة، فيه واحد يقول: لأ.. عاوزين الصحافة تبقى جد.. الى آخره من النقاش اللى

سرى للغاية

كان لا يلتقى عليه اتنين، ماعدا موضوع واحد. وهو موضوع المحاكمة اللى ما فى حنة وما فى مجموعة وما فى اتنين اجتمعوا مع بعض إلا اتفقوا عليه!
وهنا وجه الخطورة فى العملية، أن هناك موضوع معين أجمع عليه كل الناس، بما فيهم الناس اللى لا هم داخلين فى عمليات مضادة ولا داخلين.. ولكن تلقائيا من شبابيكهم بيصفقوا لهم أو يزغردوا لهم.
ده الحقيقة الوضع!

وإن هنا هو عملية التنظيم هو اللى قصر أو لا يقصر، فالحقيقة يعنى بصرف النظر عن نقائص هذا التنظيم والكلام اللى قاله الرئيس عن نقائص هذا التنظيم وغيره من الأسباب، فدى عملية قومية والناس بتربط ما بين قضية صدقى محمود ومايين يوم ٥ يونيو.. صورة ٥ يونيو عالقة فى ذهنهم وفى تصورهم أن هذا هو السبب! خطأ أو صواب من كلمة حوروها من كلام الرئيس، إنما تصوروا إن لما الرئيس قال: إن الطيران هو خسرنا المعركة.. من أول ساعتين لما دمر الطيران بتاعنا؛ فى تصورهم إن النكبة والأزمة النفسية بالكامل اللى هما موجودين فيها النهارده هى بسبب..

عبد الناصر: أويدهم

صوت: ودى حقيقة.

صوت: وبعدين النهارده.

عبد الناصر: شمس قال إمبراح، كان موجود وقايل له وفوزى كان موجود وقايل لهم الاتنين: إن اليهود هم هيهجموا ويبندوا بضرب الطيران!

صوت: والحفلة يعنى ياريس الحفلة يومها.

عبد الناصر: وبعدين وهو قاعد إيده عملت كده، وقال: this will trouble us قلت له: إزاي؟ أنا بقول لك: إنه لن يتأخر!

سرى للغاية

وبعدين أنا لما قمت قلت لعبد الحكيم - الله يرحمه - قلت له: صدقى أما أنا
اتكلمت إيدته اترعشت ليه؟! قال لى: لا.. لا!
بعدين يوم ٥ الصبح، ممنوع ضرب المدافع كلهم الطيارات فوق رايجين سينا
وصدقى. وأنا أما طلبت الجيوشى مكانش فيه حد! أنا أما سمعت الضرب طلبت غرفة
العمليات.. الجيوشى مفيش حد فيهم فى غرفة العمليات!

صوت: سهرانين للصبح يافندم!

عبد الناصر: لا.. مكانش صدقى موجود.

صبرى: هذا الكلام معروف.

عبد الناصر: ما هو النهارده طالع فى..

صبرى: وطالع النهارده فى الأهرام.

عبد الناصر: اللى شمس قاله إمبراح.

صبرى: بيؤيد وجهة نظرى، أنا شوفت مجموعة من الناس النهارده بعد الظهر من اللى مطلعوش
فى مظاهرات، وجايين وبيقولوا: أهوه الجورنال أهوه وشمس بدران بيدين صدقى محمود!
وبعدين كل هذه التفاصيل معروفة، قالوا لى على حفلة إنشاص، قالوا لى على الطيارات
اللى مترصصة.. كل هذا الكلام! طيب القانون؟ مش مقتنعين بالقانون؛ لأن هنا هو
العملية مش عملية الشارع هيحكم فى قضية؟ بقدر ماهى قضية قومية مش قضية
عادية.. هى قضية قومية بتمس كل واحد فى بيته وفى شرفه وفى كرامته وفى عزته.
ده اللى بيسبب فى الواقع هذا الانفجار.

وفى رأى أنا إنه يعنى لابد من سحب هذا الـ issue من إيد الناس بقى اللى
عاوزين تستغله وتستغل ما وراءه من أحداث؛ لأن استمرار هذا الوضع بيخلى الناس
اللى معنا ١٠٠٪ ينقلبوا ضدنا بالكامل!

سرى للغاية

عكاشة: هو فيه استفسار، يعنى أنا فهمت من الأخ الفريق فوزى إنه حسب الادعاءات المقامة العقوبة اللى رأت المحكمة توقيعتها أقصى ما يسمح به قانون الأحكام العسكرية، فهل تحوير المجلس هيقام ادعاءات جديدة على المتهمين ولا هيبقى هيطبق نفس القانون؟ وفى الحالة دى هنبص نلاقى نفس الحكم ونبقى كأننا معملناش حاجة!

ف. فوزى: أفسر هذه النقطة، بأن كان ممكن فيه ٥ ادعاءات أقيمت على الفريق أول صدقى، اتنين منهم طلع مذنب ولكن بأغلبية ضعيفة، هذه الأغلبية الضعيفة استبعدت نوع الجزاء الأقصى وهو الأشغال الشاقة المؤبدة واستبعدت المؤقتة كذلك! ووصلوا للخطوة التالية الخاصة بالسجن.

كما أنه فى الخطوة الثالثة، اختلفوا فى التقدير ما بين ٣ سنين و ١٥ وهنا كذلك جاءت أغلبية صغيرة. فممكن بتحوير منطقى بالنسبة للادعاءات لإدخال نفس الادعاءات التى تمت عليها الذنب، مذنب ولكن بتحوير المحكمة ممكن أن تصل اللى الأشغال الشاقة المؤبدة.

عبد الناصر: هل هيرضوا لما تطلع الأحكام الجديدة.. الأشغال الشاقة؟ هل هيرضوا الناس بالأشغال شاقة والا الناس عايزة إعدام؟!

صوت: لا مش هيرضوا.. عاوزة إعدام!

حسونة: لو سمحت لى سيادتك، أنا يعنى مع كل الإخوة مع السيد على صبرى فى إن الإحساس القومى مش عاوزة كلام، إنما ده موضوع مختلف كل الاختلاف عن الموضوع اللى احنا بنناقشه الآن - زى ما سيادتك سألت هذا السؤال - وأنا فعلا كنت يعنى تساءلت فى النقطة دى.. أقصى عقوبة إيه؟ الأشغال الشاقة المؤبدة يعنى زيادة إيه؟ ٥ سنين يعنى مع سنه، أنا سألت عن سنه حتى علشان أشوف الناس، لا هينفذ ال ١٥ ولا هينفذ ال ٢٥!

الناس عاوزة دم! فعلا يعنى ده الإحساس فى الشارع فى كل البيوت، وزى ما قال السيد على صبرى فعلا بيقولوا: فعلا الملازم الاحتياطى ده ولا إيه واخد مؤبد وإزاي؟! حتى قال على الغول، اتكلموا على اللى ده ياخذ ١٥ سنة! وأيضا قارنت حكاية صدقى

سرى للغاية

بالملازمين الأول. فهي مسألة العقوبة بتاعتنا هي الأشغال الشاقة.. يعنى ٢٠ سنة مفيش مؤبد عندنا.

بعدين أما نحسبها مع السن، هي تبقى مسألة نفسية بقى إلا إذا كانوا الناس يعنى أيضا أولا هيتابعوا القضية وهيتابعوا النظام من خلالها. هي مش مسألة قضية، خصوصا إذا أخذ اقتراح العلنية يعنى هيتابعوا العملية وهيتابعوا الدفاع وهيتابعوا المناخ السياسى وهيتابعوا المناخ العسكرى، وهل مثلا القائد الأعلى منه كان موقفه إيه؟! كل هذا الناس عايزة تقلب الأمعاء!

عبد الناصر: ده هو لبس الكل فى القضية يعنى!

حسونة: فهي أقصى حاجة - زى ما قال الأخ فوزى - دلوقتى هي السجن المؤبد، ده مفيش أشغال شاقة حتى فى السن ده.. يعنى فى السن ده وإحنا هنلغى الأشغال الشاقة؛ فهي السجن المؤبد.. يعنى ٢٠ سنة يعنى هيزيد ٥ سنين!

هو السؤال اللى بيقوله السيد على صبرى، هل لو حور الحكم - وطبعا محدش ضامن الحكم اللى جاى ولا القوات المسلحة فى الناحية دى - هل لو حور الحكم ووصل فعلا للسجن المؤبد، هل الناس هتقبله؟

صوت: أى تحوير فى القضية.

صبرى: هو أنا مقدرش أرد على هذا السؤال، طبعا هو لو كان صدر الحكم بالمؤبد فى تقديرى من الأصل يمكن مكانش عمل مثل هذا الانفجار، لكن هي العملية فى الواقع إن فيه عاملين..

العامل الأول: إن الناس كانت متصورة إنه إعدام ثم فوجئت بـ ١٥ سنة، ودا اللى عمل حالة من الوجوم الكامل الساعة ٢ بعد الظهر يوم الثلاثاء! وجوم وحالة كده من الدهول اللى خلت الواحد يعتقد منذ البداية إن هتحصل تطورات بهذا الشكل. إنما اللى أنا متصوره، الناس فوجئت المحاكمة سرية لا هم عارفين ادعاءات ولا عارفين القانون!

سرى للغاية

ويعدين مرة واحدة الناس فوجئوا كده وهم يسمعون الإذاعة وينقول لهم: ١٥ سنة! فرق كبير بين هذا وبين بتقعد بتمهد لهذه. العملية بالمنطق وتفهم الناس؛ حتى لما تحور المحكمة إيه قانون الأحكام العسكرية؟ وإيه التهم؟ وإيه دا وإيه دا؟ هذا غير مفهوم! إنت عايز تقنع الناس وهم فى الشارع فى حالة هيسستيريا؟! غير ممكن! والكلام اللى بيتقال: إن بعض القيادات فى الاتحاد الاشتراكي آه.. طلعت طبعا؛ لأنى أجد صعوبة إن أنا أقنع ابنى فى البيت، فما بال أى واحد مهواش فاهم هذا الموضوع؟!

طبعا هيطلع هقول له: التزام. إيه التزام؟! دا راجل مش مقتنع بهذا الكلام خالص ومش داخل مخه ولم يمهد له أى شئ! فعلا أعداؤنا خطبوا الرأى العام بالكامل أو الجماهير وشعورها بدون ما نستطيع إن احنا نتحرك، ولا أمهد ولا أفهم ولا أوعى القواعد بتاعتى؛ لأن أنا عادة على الأقل يعنى لو كان حتى التنظيم قوى، لابد أنى أكون موعيه ومفهمه إن هتصدر كذا والأسباب كذا عشان يقدر يتكلم.

كل واحد سكتكم بكتم! يقولوا له: طيب أنت يا بتاع الاتحاد الاشتراكي، قل لنا.. فسر لنا هذا الحكم.. يسكت! السكوت فى حد ذاته شلل! ويعدين أى واحد يقوده بقى ويمشى به؛ فهو دا أنا مش بأضمن طبعا هذا الكلام!

لكن اللى بقوله: إن فيه حالة بشعور كل واحد عن عملية قومية يستطيع أن يتحرك من خلالها أى حد، والعملية بتاعة إمبراح - بلاش بتاعة النهارده - اللى ابتدى يتحرك ٣٠ - ٤٠ واحد بيجروا وراهم كل البلد! لم تزد عن ٣٠ - ٤٠ واحد! لو ٣٠ - ٤٠ واحد دول طلوعوا من الجامعة، بيقولوا: نريد إسقاط مجلس الأمة مكانش حد مشى معاهم فى الشارع! لو طلوعوا قالوا: نريد حل الاتحاد الاشتراكي مكانش حد مشى وراهم فى الشارع! إنما أول ما قالوا الأحكام كل الناس مشيت وراهم فى الشارع! هو دا الموضوع!

الشناوى: هو الحقيقة يعنى أنا عايز أقول برضه، أرجع أتساءل.. أقول: هل المظاهرات اللى قامت دى كان فعلا سببها أو السبب الرئيسى بتاعها الحكم دا من عدمه؟! أنا مفنكرش إن هو دا السبب، إنما هو كان تكأة مفيش شك وكنا عشان نغير الحكم لأن الشعب غير مرتاح للحكم ذاته! وإحنا بنقول دلوقتى: إن الشعب نفسه الحياتيات بتاعة الحكم مش موجودة.. الأسباب اللى انبنى عليها الحكم دا مش واضح للشعب.

سرى للغاية

ونيجى إحنا مرة واحدة كده نقول: إحنا هنغير الحكم؛ لأن الشعب بيقول الكلام دا! أنا بيتهيألى يبقى فيها حتى مساس بقداسة الأحكام له عواقبه الخطيرة بعد كده؛ خصوصا إذا كنا إحنا برضه عارفين إن المظاهرات لم تقم أبدا للسبب دا وحده. دا يمكن كان تكأة أو كان باب عشان يعبروا عن الحاجات المكبوتة اللي قال عليها الأخ عصام حسونة. ولذلك أنا أرى إننا منمشش الحكم دا أبدا عشان العواقب الخطيرة بتاعته اللي حاصلة.

وأرى إن الموضوع يقدر يعالج قوى زى ما قيل دلوقتى من الأخ محسن: إننا ندى الجامعة الاجازة بتاعتها العادية أو زى ما فهمت أنا دلوقتى من الأخ شعراوى إن الأولاد هيفضوا الاعتصام.

جمعة: الحقيقة أنا عايز أتكلم لو سمحت لى سيادتكم، هل الصورة بنفس الوضع اللي احنا شايفينه؟ وهل ابتدت المظاهرات بمهاجمة للحكم ثم استجابت لها القاعدة العريضة دى؟! لو نبتدى بحادثة حلوان، فما حصل فيها وبعدين أنا رحى زيارة للناس اللي مضروبين وكان معايا الدكتور النبوى والأخ سامى شرف.

الحقيقة وأنا داخل أنا كنت خايف كيف سنستقبل بواسطة ناس وأنا وزير داخلية والناس يعنى مضروبين بواسطة الشرطة؟! الحقيقة استقبلنا استقبال أخلنا الحقيقة، وسامى لما كان بيقول له: إن سيادة الرئيس ببسلم عليك، كان بيقول له: إدينى إيدك أبوسها ووصل هذه البوسة لسيادة الرئيس.. ده حقيقة! الحقيقة شفنا واحد قايم من البنج لسه وبيردد إنه كان خارج عشان خاطر الرئيس.

القاعدة العمالية كلها فى الحقيقة لم تتأثر بهذا الموقف. المظاهرة ابتدأت بمجموعة من الطلبة إحنا عارفين اتجاهاتها ومتأكدين من هذه الاتجاهات، وفريد حسنين - وهناك معلومات أكيدة - متصل لحد إمبراح قبل ما يعتقل بمجموعة سمير حمزة. وهناك شاب اسمه صالح اتصل به، وصالح هذا كان فى كلية الهندسة ومن المجموعة القديمة بتاعة سمير حمزة.

عملية الطلبة لما ابتدوا الحقيقة بهذا الموضوع، ابتدوه أساسا بالأحكام وتجمعت الطلبة حولهم فى الأول من أجل الحكم اللي هو نفس الحكم فى القضية، بعد هذا استغل الموضوع.

فيه باقى الطلبات اللي هم بيقولوها..

سرى للغاية

أى مظاهره طبعاً بتمشى ممكن تطلع لمبدأ ثم تتحرف فى السكة تبعاً للقيادة اللى بتوجهها.. ودا مبدأ معروف. الكلام اللى اتقال: إن فيه ضغط على سيادتك من أجل الحكم والتصديق على هذا الحكم. وهذا الضغط بيفسروه إن هو من العسكريين، وكثيراً من التعبيرات كان بي فهم منها إنها مساعدة لسيادتك؛ عشان سيادتك تخرج من هذا الضغط ثم تأمر بتحويل الحكم.

النقطة الثانية: إن هم عارفين إن سيادتك دايماً لا ترفض آمال الشعب أو لا تستجيب لمطالبه، فهم بيطالبوا بهذا وهم واثقين إن سيادتك هتستجيب لهذا كمطالب. كل اللى بيندس فى المظاهرات، فيه بعض العمال وفيه بعض الموظفين أنا بعتبرهم لهم ميول قطعاً قد تكون ميول يسارية متطرفة أو ميول إخوانية.. هتكشف العملية، زائد بعض الرعاى وبعض الأطفال، زائد الأفراد اللى هم متصدرين المظاهرة! وبعدين كام طالب خرج من الجامعة فى هذه المظاهرات ٦ آلاف - ٨ آلاف؟! طب فيه كام طالب فى الجامعة؟ فيه ٤٠ ألف طالب.. يعنى هم لا يمثلوا الرأى العام كله!

الحقيقة بالنسبة لنقطة الحكم، أنا أؤيد الأخ فوزى ودا يمتص غضب الكثير. النقطة الثانية: أنا سمعت كلام كتير جداً على شرح الموقف والتغيير ومسمعتش حل فى الحقيقة! يعنى مفيش حد اقترح حل لسيادتك! هو فعلاً فيه كلام إن الوزارة محدش عايزها، فيه كلام إن الأمانة فى الاتحاد الاشتراكى محدش عايزها، وفيه كلام إن مجلس الأمة محدش عايزه!

هو فيه سؤال الحقيقة: إحنا نمثل مين؟ كل فرد اللى قاعد هنا أو كل فرد - ماعدا سيادتك طبعاً - أو كل فرد فى الأمانة العامة للاتحاد الاشتراكى، ماهى قاعدته؟ حقيقة الأمر إحنا مالناش قاعدة ولم نمارس العمل السياسى على مستوى القاعدة، فكان زمان أى واحد بيصل وزارة عضو فى الحزب وعضو فى البرلمان ويبدخل الانتخابات وله قاعدة يرجع إليها ويرتبط بها باستمرار، إحنا فى الحقيقة لا نمثل هذا.. ملناش قاعدة أبداً وعشان كده ملناش ارتباط بال جماهير.

الحقيقة أنا فى رأى - طبعاً الأمر متروك لسيادتك - نظام الاتحاد الاشتراكى النهارده الحقيقة وما شفناه من منظمة الشباب، لا يمثل الالتزام أو الارتباط أو الصلابة! وأن الألوان فعلاً إن سيادتك تعلن تكوين الحزب، ونعلن تكوين شباب الحزب اللى يرتبط بالحزب ويناضل فى سبيل هذا الحزب، وكل واحد يعرف إن مصيره ومستقبله مرتبط بهذا الحزب.

سرى للغاية

ليس هناك حل من وجهة نظرى غير كده، فى هذه الفترة بيعلن عن حل مجلس الأمة ثم تحديد ميعاد يتناسب مع ظروف العدوان.
سيادتك بتقدر الموقف، ثم كل فرد فينا لابد أن يدخل الانتخابات ويكون رجل سياسى فعلا حتى إذا وصل الى هذا الكرسى.

عبد الناصر: بعد الحادثة بتاعة النهاردة؟! (ضحك)

أصوات: (ضحك)

جمعة: وبهذه الطريقة بتتحول الوزارة والحزب والجهاز الحاكم الى جهاز سياسى فعلا مرتبط ببعضه ارتباط كامل.
متشكر.

شقيير: هو يافندم أنا مسلم إن القضية كانت سبب مدخل وعلقت عليه أشياء، لكن لا شك إن المدخل دا مدخل رئيسى والجماهير والإرادة الشعبية اللي موجودة واللى واضحة نقطة الإجماع الأساسية، هى نقطة القضية. القضية دى فيها ظاهرة غريبة جدا، إن حيث التزمنا تماما بالقانون الناس مش راضية عن هذا القانون.. يعنى دى المشكلة الأساسية! القانون التزمناه بدقة ولم نخرج فى أى جزء عليه والناس مش راضية عن هذا..
دا يمكن بيبين يافندم يمكن جايز حدث منا خطأ مبدئى فى تصور القضية.
القضية لم تكن قضية قانونية فى اعتقادى، وإنما كانت لابد أن تعالج كقضية سياسية ربما لا ترتبط فيها ارتباط كامل بقانون محدد سلفا.

دلوقتى يافندم هل لو حورنا أو غيره - أيا كان الفن اللي هنستخدمه فى معالجة الموضوع - هل دا هو مش هيرضى الناس وهتفضل المظاهرات مستمرة؟ قطعا ربما فئة معينة من اللي داخلة فى العملية بهدف هو هدف تهبيج وهدم، جايز لن ترضى. إنما الفئة دى ضئيلة وبنبقى فى الحقيقة بننتزع منها تماما الجماهير الكبيرة اللي هى معتمدة عليها فى الشارع لما بتطلع، وبالتالي فى الواقع فى الأيام القادمة أو فى الفترة القادمة لا نتعرض لحالة أنا شايف إنها بتتصاعد يوم بعد يوم.

سرى للغاية

فاعتقادى لو سيادتكم قبلت هذا الوضع، بمعنى إن القضية دى بتعالج علاج تانى بتكون النتيجة فى الحقيقة كسب كبير لنا لأن ببقى تمثينا مع الإرادة الشعبية ومنخافش نقول: خضعنا لها أو شئ؛ لأن فى الواقع المطلب دا لا يكاد يكون هناك فرد مش مجمع عليه.

بنيجى يافندم لنقطة التكنيك.. نقطة الفن اللى هنحول به، هل القضية نعملها بطريقة التحوير والمحاكمة المفتوحة ولا لآ؟ القضية قضية سياسية بشكل معين ببقى فى اعتقادى - ودا اقتراح آخر باتقدم به - إنها بتقدم مش عن طريق التحوير وإنما بتقدم الى محكمة سياسية أساسا، ويبقى التحوير هنا اللى بيسأل عنه، هل يمكن تحويل نفس الاتهامات ولا لآ؟ لأن الاتهامات اللى هى واردة كما وردت، ربما مش هتوصلنا إلا لهذا الحكم، وإحنا لا نطالب قضاة فى أيدهم قانون مبيديش أزيد من هذا.. نطالبهم إنهم يحكموا حكم لم يرد فى هذا القانون لأن دا ببقى خطأ. إنما التهمة الحقيقية اللى يجب إنها تثار، طب كان فىن تكوين القوة دى لمدة طويلة؟! وبالشكل دا بتتحول القضية لقضية سياسية وبالتالي بيبقى الحكم فيها كآى قضية سياسية أخرى.

حسونة: هو لو أدنت لى بتعليق دقيقة واحدة، هو برضه نقلها لمحكمة سياسية هى مقيدة بنفس قانون العقوبات.. يعنى هى إجراءات المحكمة دى زى المحكمة دى بالضبط من حيث العقوبة، إنما من حيث الإجراءات دا موضوع تانى.. سياسية أو غير سياسية ماهى المحكمة السياسية قدامها قانون العقوبات برضه!

صوت: هو مفيش شك الحكم هو أساس العملية كلها، وإذا عدل فيه هيمتص الأغلبية العظمى من الكلام اللى موجود حاليا.

بس هو النقطة بالنسبة للتحوير، برضه أنا بأؤيد التحوير.. لازم إذا كان ممكن من الناحية العسكرية؛ لأن التحوير يتعمل ادعاءات جديدة مضمون فيها إن لازم هيبقى فيه حكم أقصى من هذا الحكم. مش عارف هل ممكن دى عسكريا تتعمل ادعاءات جديدة مش نفس الادعاءات؟ يعنى التحوير يصح لمجلس عسكري جديد، لكن هل ممكن عمل ادعاءات جديدة وكل الثغرات اللى فى الادعاءات الحالية نقدر نتلافها ولا لآ؟

فى الحالة دى هيبقى الحكم له تأثير وهنقدر نسيطر على العملية.

سرى للغاية

رفعت: يعنى هى القضية دلوقتى.. قضية الأيام القادمة أو قضية عاجلة النهارده؟! موضوع التحوير أو إحالتها الى محكمة سياسية أو بتاع، هذا يمكن موضوع بياخد وقته لكن النهارده كيف يواجه الموقف اليوم وبكره وبعده؟! دا تقديرى، يعنى أى تراجع النهارده أو بكره فى هذه الأحكام، معنى كده إن أنا بدى فرصة للـ ٣٠ - ٤٠ واحد اللى هم قادوا العملية دى أنهم أصبحوا أبطال، وهيستمرروا فى قيادة هذه العملية الى المدى اللى هم بيهدفوا له! ودى فى تقديرى عملية هنتفتح أبواب كبيرة مش هنقدر نمسكها إلا إذا كان فيه ترتيب آخر.

يعنى كل الكلام اللى قيل واللى قاله الأخ شعراوى واللى قاله الأخ عصام، كل دى هتاخد وقتها فى معالجة الأوضاع سواء فى الاتحاد سواء فى الحكومة سواء فى مجلس الأمة.. الى آخره.

ولكن فى تقديرى، إن احنا يجب كإجراء عاجل أن يصدر بيان يا من سيادتك يا من مجلس الوزراء؛ بتوضيح إيه الظروف اللى قامت فيها هذه العملية، وتوضيح كافة المخاطر اللى بتواجهه النهارده. البلد فيه جيش واقف وفيه عدو على الضفة الشرقية واقف وبعض العناصر استغلت هذا الموضوع، مع محاولة بطريقة ما إن احنا بندى أمل؛ إن كل الموضوع الخاص بالأحكام دا بيعاد النظر فيه، ولو إنه لا يقال برضه بطريقة مباشرة. دا يمكن بيخلى عناصر كثيرة بتنفض عن المجموعة اللى هى قادت هذه العملية، وإلا هتكون النتيجة إن احنا بنقوى هذه العناصر وهنتولى القيادة بعد كده فى البلد وفى أوساط العمال والطلبة، وتوضيح العملية من وجهة نظر سياسية صرفة. أنا تقديرى دا ممكن يعنى يهدى الموقف وتوضيح خطورة الموقف اللى بتواجهه البلد النهارده.

هو يدى: هو طبعا مفيش خلاف على أهمية القضية بتاعة الطيران، سواء على الصعيد عندنا فى الجمهورية العربية المتحدة أو على الصعيد العربى. ويمكن لم تمر قضية كانت بتتجاوب فيها الجماهير العربية ومرتقبة النتيجة بتاعتها زى قضية الطيران فى الواقع! هو صدر الحكم، أنا بقول: هذا الإجراء المقترح كان يمكن أن يتم لو يوم ماصدر الحكم فعلا كان ممكن صدوره وإعلانه ثم التحوير مباشرة.. هنا كانت العملية تسمى مراجعة فعلا، ولكن بعد ماتم كل اللى حدث أنا باسميه تراجع وليس مراجعة، وفرق طبعا كبير جدا بين المراجعة وبين التراجع!

سرى للغاية

ويعدين النهارده فيه زى سيادتك ما قرئت المنشور بتاع الطلبة بتوع كلية الهندسة النهارده، كانت مختفية نهائيا فى النداءات وفى الشعارات وفى المطالب موضوع الطيران.. اختفت نهائيا! واللى كان بارز شعارات أيضا أكثر برفافة جدا أكثر من موضوع الطيران فعلا!

فالقضية فى رأى مش قضية الطيران، طبعا كانت الناس تود إنها تكون الأحكام أشد من هذا لكى ترتفع الأحكام لمستوى القضية نفسها، ولمستوى النكسة اللى شعرت بها الجماهير.

ولكن الجماهير تقبلت النكسة نفسها.. تقبلتها ومشيت، ولكن فى رأى أنا - زى سيادتك ما قلت دلوقتى - إن احنا سيحاول الاستعمار ضرينا عسكريا، وإن لم يتمكن من هذا هيضربنا داخليا فى أوساط العمال وفى أوساط الطلبة. وهنقوم خلاف هذه المطالب مطالب جديدة، وسيظن بعد ماتم فى اليومين اللى فاتوا النهارده وإمبارح القائمين بهذه الحركة، أنهم تمكنوا من الضغط وأجبروا السلطة على التراجع فعلا فى موضوع.. ودا يشجعهم على إنهم هيطالبوا باستمرار بحاجات أخرى! ودا تم لما بدينا نتراجع - زى سيادتك ما تكلمت وقلت دلوقتى - بدأت عمليات أكثر وأكثر وعمليات نقد أكثر وأكثر، والموضوع اتفتح فعلا الآن أكثر من اللازم.

فأنا فى رأى: لو إن هذا الإجراء لو تم مباشرة عقب صدور الحكم بدون شك كان هيكون صداه كبير جدا على الصعيدين الداخلى والعربى. ولكن النهارده لن يعالج المشكلة، وزى ما قيل دلوقتى إحنا أمامنا بكره فعلا سنواجه بموقف، وهدوء الحال النهارده مش معناه هدوء الحال بكره أو بعده. ويخشى لو استمرت الأحداث بتاعة الجامعة؛ لأن النهارده انضم لها بعض المعاهد وبعض المدارس الثانوية! فيخشى أيضا - أنا عندى الكشف بتاعها يافندم السعيدية انضمت والعباسية - فاللى بأخشاها اتساع العملية.

فبقتروح: إن لو نوقش موضوع تأجيل الدراسة للعيد برضه الى أن نعيد تنظيم نفسها. وأما قضية الطيران فليست هى أبدا علاج المشكلة اللى احنا موجودين فيها، وزى برضه ما قلت: لا داعى أبدا لتراجعنا، وإحنا دايمنا بنعمل من مركز قوة رغما عن النكسة اللى احنا بنمر بها فى الوقت الحالى.

سرى للغاية

فائق: يافندم بالنسبة للمناقشة اللى دارت.. أنا ملاحظ إن كلنا جميعا بنجمع على شئ واحد - حتى بما فينا الإخوان اللى عارضوا فكرة التحوير - بنتفق كلنا على إن الموضوع بتاع الحكم أصبح موضوع قومى فعلا. فإذا كنا كلنا مقتنعين بهذا والشعب مقتنع به فكنا نصر أو نقول: إن عملية الرجوع فى ذلك عملية التحوير بتعتبر تراجع فقط لمجرد إن احنا مش عايزين نرجع فى هذا القرار ورغم إن احنا مقتنعين به بيتهيالى يمكن عملية بتبقى يعنى ماحصلتش قبل كده بالنسبة لهذا النظام ولهذا الحكم.

كون أن استجابة سيادتك لرغبات الشعب دى يعنى حاجة الناس متعودة عليها وشعبنا اتعود عليها كثيرا.

برضه فيه نقطة مهمة جدا إن بعتمد - زى ماقال الزملاء - إن دا مش هيكون نهاية الموضوع قطعا فيه بعد كده قد تظهر حاجات أخرى.

فأنا متهيالى إذا أخذنا هذا القرار وعملية التحوير يجب أن يصحبها إننا نفكر إيه المستقبل هيكون إزاي؟ وأنا بتصور إن ضرورى نتخذ إجراءات تتناسب مع ظروف الموقف الحالى.. يعنى لا يمكن مع حالة القلق النفسية اللى احنا بنعيش فيها، وحالة الخطر اللى بتواجهنا إن احنا مثلا نتصور إن مش لازم يبقى فيه عندنا معتقلين ولازم الحرية مطلقة بالكامل! ومجلس الأمة مفتوح بالكامل! فيصح قوى إن أنا آجى النهارده وابتدى أعمل عملية محاسبة للناس اللى استغلوا موضوع الأحكام؛ مثلا إذا كان معروف أشخاص معينين وثابت ومعروف إنهم استغلوا هذا الشعور اللى موجود لدى الناس كلها، فيتجابوا ولذلك حتى لا يظهر أيضا إن هناك تراجع أو إن العملية تمت تحت ضغط ناس معينين أو تحت ضغط مظاهرات معينة.

أبو النور: سيادة الرئيس.. واضح من الكلام - زى ماقال فايق دلوقتى - إن الاحتجاج بتاع الشعب كله فى الواقع وإن التنفيس اللى حصل، مجاش نتيجة إن ٣٠ أو ٤٠ شخص حرضوا الناس على الخروج فى مظاهرات. يبقى واضح أمامنا إن الشعب بأكملة غير راضى عن هذا الحكم وبيطالب بتحويره. يبقى إحنا ملناش حل تبادلى فى مواجهة هذا - لأن هذه الثورة كان موقفها دائما الى جانب الشعب والى جانب مطالب الشعب - إلا أن تأمر بالتحوير. والموضوع مفهوش غرابة؛ لأن القانون - زى ما شرح سيادة الفريق فوزى - بيقول: إن هذا الحكم لازم يصدق عليه من الضابط الأمر بالتشكيل، ومعنى هذا إن عملية التحوير عملية واردة وقانونية ومن الممكن أن تحدث.

سرى للغاية

هل إحنا لو تجاوزنا مع مطالب الناس، ممكن إن يفسر هذا ويقال: إن دا خضوع للشارع أو إن الشارع ابتدى يسيطر، وحتى ابتدى يسيطر على المحاكم؟! أنا بعقد إن الكلام دا مش صحيح؛ لأن الواقع مش اللي طالب بتحويل الحكم هو الشارع، إنما اللي بيطلب بتحويل الحكم هي كل الناس بلا استثناء! وأنا بعقد إن احنا جميعا هنا بنحس إن الحكم دا لا يتلاءم مع الجريمة، وإحنا مش فى الشارع، يبقى الناس على مختلف مستوياتها تطالب فعلا.. إذاً الطلب جاى من الشعب مهواش جاى من الشارع.

فيه ناحية تقنية وضحت من كلام الفريق فوزى فى أول الكلام، إن طريقة المحاكمة كانت غير سليمة ووصف الجريمة كان خطأ، بل إن القانون اللي حوكم به الناس دول مهواش القانون اللي كان ينبغى تطبيقه فى مثل هذه الحالة، ويمكن دى أشار إليها الدكتور شقير. الجريمة اللي وقعت جريمة سياسية مهياش جريمة عسكرية! وأساس تقديم القضية دى لمحكمة عسكرية عمل غير سليم؛ خصوصا بعد ما ظهر كمان إن القانون العسكرى فيه قصور، وميقدرش فعلا يغطى العقوبة اللي يجب أن تتلاءم مع مستوى الجريمة اللي وقعت.

وأنا باشير الى كلام قاله السيد على صبرى: إن احنا لما نتجاوب مع مشاعر الناس ونأمر بالتحويل، دا لا يعنى إطلاقا إننى بادى تصريح لـ ٣٠ - ٤٠ بنى آدم حركوا المظاهرات. دا كلام إحنا بنقولُه هنا، لكن الناس حاسة إن فيه مظاهرات قامت وإن الناس كلها استجابت معاها، وإحنا فى واقع الأمر إذا متجاوبناش إحنا هنقوى الـ ٣٠ - ٤٠ واحد!

إنما إذا استجبنا، إحنا هنسحب السجادة من تحت الناس دول، وهنفرغ الشعارات الفارغة اللي هم بيقولوها، وهنخلى كل الناس اللي قاموا تلقائيا علشان يشاركوا فى هذه المظاهرات هيرجعوا لوضعهم الطبيعى، ويعرفوا إن الثورة واقفه جنبهم وأنها استجابت لكلامهم. وإذا أى كلام أو تحريض آخر أو أى استغلال لهذا الموقف لن ينجح، ويبقى يافندم وقفنا العملية بسرعة بدل ما إنها تستمر وتأخذ الشكل الموجود حاليا والذى لا يجب إطلاقا إنه يستمر.

صوت: كلمه قصيرة جدا سيادة الرئيس، إن هذه القضية لم تعتبر سابقة فى التاريخ، كلنا نذكر قضية القديس فى فرنسا، إن صدر عليه حكم وبعدين أعيدت محاكمته تانى بناء على ضغط الرأى العام.

سرى للغاية

أصوات: خد براءة! (ضحك)

عبد الناصر: النقطة الأولى: يجب إن احنا نعطل الجامعات من بكره ومنقولش ليه؛ لغاية ما نبحت الموقف. وفي تقديري الجامعات هتعمل عمليات أو هيحصل عمليات أخرى، فبنعطل الجامعات بكره؛ لأن في رأيي إن قطعاً فيه عناصر مختلفة - أنا مش عارف قطعاً فيه عوامل - ولكن هناك عناصر استغلت وقد يكون هناك عناصر أجنبية استغلت هذا الموضوع.

موضوع الطلبة نجح في إندونيسيا، والـ CIA اشتغلوا في إندونيسيا بموضوع الطلبة بس. وعلى هذا الأساس ودا سلطة مدير الجامعات.

شقيق: دي سلطة مدير الجامعات يافندم، وأنا بحثتها معاهم النهارده وأنا مجهزهم إذا مجلس الوزراء وافق هتصل بيهم، وبنعلن إن القرار صدر من السادة مديري الجامعات، وأرجو إن تبقى للجامعات كلها مش القاهرة وعين شمس.

صوت: غلق ولا اجازة؟

شقيق: لا.. وقف، بنص القانون إيقاف الدراسة.

حسونة: أنا بحسب إن فيه أجازه جاية اليومين دول فيبتدوا فيها من دلوقتى.

شقيق: لأ.. إيقاف الدراسة.

عبد الناصر: في رأيي لا نستأنف الدراسة إلا ما ننظم نفسنا ونرتب نفسنا، وإلا أثناء الدراسة يتكرر الموضوع ده تانى وبما فيهم جامعة الأزهر.

شقيق: والمعاهد العليا.

سرى للغاية

عبد الناصر: والمعاهد العليا. وأنا قبل ما آجى، الجرايد هيقولوا النهارده.. هيقولوا: مين النهارده اللي طلع ومين مطلعش، بيقولوا: إن أسبوط منتظمة وإسكندرية منتظمة. الواحد كان مستبوح العملية! ولكن فى رأى إن احنا بكره إذا استمر الوضع على ما هو عليه بدون إيقاف الدراسة، وأنا عارف الطلبة ١٧ سنة و١٦ سنة وهيقولوا: ده انضرب بالرصاص واللى عمل إيه وإحنا لازم مش فاهم إيه؛ فنوقف الدراسة ومنقولش ليه.

الموضوع التانى: اللي هو برضه موضوع الحرية، يعنى فيه دلوقتى أحكام.. إمبارح راحت ناس للمواصلات علشان يحصل اضطراب فى المواصلات، وبلغنا من الأميرية. والنهارده جالى إن فيه ناس راحوا شبرا الخيمة دلوقتى، من بعض المعزولين وبعض الناس مش فاهم إيه علشان يحصل تخريب فى مصانع الصلب. الحقيقة إذا مخلناش فيه دولة قائمة ومجلس الأمة وكلام أى حد، نبص نلاقى البلد فانتت مننا؛ وعلى هذا الأساس البلد لازم تتمسك مسكة شديدة.

الموضوع الثالث: أنا الحقيقة أما اتكلمت، كنت متصور إن فوزى صدق على الحكم. كانت محكمة سياسية المفروض إن فوزى ميقدرش يحول لمحكمة سياسية أنا اللي أحول لمحكمة سياسية، وأنا الحقيقة عملية التحويل بالنسبة للقوات المسلحة هى عملية يستطيع أن يحول أى مجلس إذا معجبهوش الحكم. رأى إن هو بيقول: إن هو لم يصدق، إن الأحكام والحيثيات وصلته اليوم، وإنه لم يصدق على الحكم، وقرر: إعادة المحاكمة باعتباره الأمر ومش هيصدق على الحكم بس يعنى.

بالنسبة للقضية كلها - مش لصدقى بس - برضه أنا فى البيت بأسأل ولو قلت اللي قاله فوزى محدش هيصدقنى! (ضحك) لو كان البلد بتحاكم على معركة، كانوا حاكموا روميل خمس مرات لأنه جرى ومش فاهم مين جرى وراه والتقاليد والجيش. فالحقيقة صدقى المسئول شخصيا، وفوزى يعلم هذا وفوزى قاسى من هذه المراحل وهو كان موجود رئيس أركان حرب! ففوزى يدى تصريح النهارده. الجامعات.. وبعدين بكره لو المدارس الثانوية طلعت تتضرب. ده لازم الحقيقة وأنا النهارده كنت بقول: إن اللي بيطلع ينضرب ويتقبض عليه ويتحول الى النيابة. وبعدين أى حد يحاول يعمل حاجة، يعنى إذا جالى ناس هيحرقوا مصنع ما أنا لازم أمسكهم. النهارده الحقيقة كلام عن الحريات وكلام يميل الى زيادة فلتان!

سرى للغاية

حسونة: هو الكلام عن الحرية مش دلوقتى، ما قانون الطوارئ قائم يعنى إحنا فى حالة حرب وقانون الطوارئ قائم إنما اللى بيقال فعلا فيما بعد.

صوت: الكلام ده اللى بيظمن الناس.

عبد الناصر: الحقيقة لازم قبل ما أقول أى حاجة نقول: إحنا بحثنا.

جمعة: مجلس الأمة يافندم لازم يقعدوا الأعضاء ويتكلموا.

عبد الناصر: أنا زهقت منهم! ممكن أنفذ لهم الطلب بتاع مجلس الأمة ده! (ضحك)

أصوات: (ضحك)

عبد الناصر: إحنا مش هنقول: قرار مجلس الوزراء.

شقير: لا يافندم أنا هتبع فيها الإجراء اللى القانون بتاع الجامعة نفسه بينص عليه، لذلك أنا بعد ما بنخرج أنا متفق مع السادة مديرى الجامعة إنى هديهم تليفونات بالليل، وهنعلن بإيقاف الجامعات.. أصدرنا قرارات بإيقاف الدراسة.

رفعت: طب ما عشان رأى العام يفهم إن كان فيه عناصر عايزة تخرب.

عبد الناصر: ما إحنا قلنا الكلام ده فى بيان وزارة الداخلية.

معى الدين: لأ.. يعنى أنا متصور بعد الإجراءات اللى هتتعمل دى اللى لازم تنزل بالراحة، على الأقل يعنى إذا مكانش على مستوى سيادتك يبقى على مستوى مجلس الوزراء بيبين ثلاث أربع نقاط أساسية؛ لأن أنا تصورى وزى ما الإخوة قالوا: إن العملية تدخل فيها حاجات كتير؛ بدليل إن العلاج اللى إحنا بنعمله النهارده متناول ثلاث أربع حتت متناولش ناحية واحدة.

سرى للغاية

كثير من الناس اللى مشيوا فى المظاهرات، لما الواحد بيقعد معاهم وييتكلم معاهم بيجد إنه جملة أمور لابسه بذهنهم. لما الواحد بيحلل الموقف، طيب رأيكم إيه بالنسبة لموقف الفريق هل دا وقته؟ كلهم بينسحبوا ويقولوا مش وقته! زى الكلام اللى قاله الدكتور ثروت عكاشة فى الجماعة اللى هم قابلوه. يعنى قطعاً لازم يحصل بيان تفصيلى فى هذا، إن المظاهرات اللى اتجهت للحكم أدى إجراءات خاصة بالحكم.

بالنسبة للمواضيع الأخرى، الأوضاع فيها كذا وكذا وكذا بالنسبة مثلاً للحرية اللى هم بيتكلموا فيها، فى الواقع لما بنستطرد بذهننا للماضى هذا الموضوع يعنى تتاولناه باتساع خالص هنا فى مجلس الوزراء، واتخذ فيه خطوات، إنما أنا يعنى يؤسفنى إنى أقول: إن إخراج هذه الخطوات كان وحش يعنى مبانئتش هذه الخطوات للناس. يعنى تمت وتمت خطوات جريئة جداً فى هذا السبيل؛ أقربها مثلاً قانون الحريات اللى موجود فى مجلس الأمة وغيره، الطريقة اللى يدرس بيها.. بيدرس على استحياء ليه مش عارف؟! يعنى ده خلى الناس برضه متتابعش التطورات المختلفة أو المناقشات المختلفة اللى حصل فيها مستوى مجلس الوزراء أو اللى حصل على لجنة الاتحاد الاشتراكى واللى كانت بتتسم بالصراحة.

النهارده الإجراءات اللى احنا بناخذها، سواء بالنسبة لقفل الجامعة أو تعطيل مجلس الأمة، ولو إن أنا مش شايف إن تعطيل مجلس الأمة ده جايز لأن مجلس الأمة ممكن السيطرة عليه بطريق أو بآخر يعنى مش زى الطلبة، لابد إن ده يخرج الإخراج الحقيقى يعنى ميفهمشى إنه..

عبد الناصر: الخطوة الوحيدة اللى هنتخذ النهارده هى إيقاف الدراسة بس.

محي الدين: أيوه أنا بدى مع هذه الخطوة اللى تتخذ بيحصل بيان من مجلس الوزراء، إن ليه اتخذت هذه الخطوة؟ قرار طبعاً مدير الجامعات - زى الدكتور شقير ما بيقول وأنا معاه - إن ده قرار ماشى بالقانون كله إنما بيان من مجلس الوزراء.. ماهى الأسباب اللى دعت لتقدم مدير الجامعات بقفل الجامعة؟ إيه الأسباب اللى عندنا؟ الموقف الخارجى، هل الموقف الخارجى يسمح بإطلاق الحريات بصفة عامة؟

أصوات: (مقاطعة) لأ.. لأ.

سرى للغاية

محي الدين: يقولوا: أيوه فى الوقت الحاضر بلاش نربط الأحداث، هي مربوطة بأذهاننا يعنى مقدرش أنكر الحقيقة القائمة.

صوت: قفل الجامعات مربوط بأحداث الطلبة.

صوت: إحنا نفسر لهم ليه بنعمل كده.

محي الدين: أيوه ماهو ده اللي بدى أقوله.

عبد الناصر: مقلناش إحنا هنجبر على الحريات!

محي الدين: لا يافندم أنا مقصدش كده.

الشافعى: ياسيادة الرئيس.. الكلام اللي قاله الأخ فوزى هو الأساس اللي يجب إن احنا نستند عليه بالنسبة لكل التصرفات، على أساس يعنى ابتداء من البيان اللي قاله وزير الداخلية على أساس إن ده يكون آخر يوم، وعلى الرغم من هذا البيان حصلت أيضا. وبعدين الوضع بوجود القوات لا يمكن إن يكون فيه تأمين للوضع وفيه وجود مثل هذه اللي تركت فى هذه الأيام على أساس إنها تكون تعبير عن الرأى، ولكن ابتدت العملية يخش فيها عناصر كذا.. وكذا.. وكذا مما يهدد قاعدة الدولة اللي المفروض تستند إليها القوات المسلحة بالخطر؛ مما تستتبعه ضرورة اتخاذ الإجراءات، منها.. أولا: كذا.. وكذا.. وكذا وأى حاجة بتحصل هتؤخذ خاصة بالشدة اللي تتناسب مع تأمين البلد بالنسبة لهذا.

محي الدين: مع بيان نقطة ثانية - اسمح لى يافندم إضافة للكلام - النقطة الجوهرية إن اللي اتعور قد إيه وبعدين بييجى فى سياق البيان؛ لأن دلوقتى الإشاعات اللي ماشية يعنى أما أسمع الأخ شعرواى يقول: اللي اتعور بس واحد وعشرين، والحقيقة كمان يعنى الواحد لما بييجى يقول شهادة حق، كل الناس بيتكلموا.. كل الناس بيتكلموا بيقولوا: إن موقف البوليس كويس، حتى فى المظاهرات قالوا: إن موقف البوليس كويس. لازم.. لازم دى أيضا تبان إن اللي أتعور من الطلبة بس ٢١ ولم يحصل وفيات للطلبة.. يعنى تبان

سرى للغاية

الحاجات دى. وهل الموقف الخارجى يسمح لى؟ الموقف الخارجى لن يسمح لى بهذا، وأنا بنادى بكده ويقول كده.

الشافعى: لو إن ثبت إن فيه إصابات حدثت من غير البوليس، مما يؤكد إن فيه دخول عناصر بتريد إنها عايزة الكلام ده من..

عبد الناصر: بيان منا إحنا؟

معى الدين: من مجلس الوزراء أو بيان من حد يعنى يصح الدكتور شقير.

حسونة: السيد وزير التعليم، الإجراء اللى هيتخذ مش من المجلس؛ لأن طبعا يصح لسبب أو لآخر سياسى يعنى خلىنا درجة استئناف يعنى.

عبد الناصر: ممكن نزود على البيان المبررات إيه؟ ليه حصل كده؟

معى الدين: وفيه إذا سمحت لى كلمة واحدة، كلمة تحوير اللى بيقولها الأخ فوزى بس هو ده اللى أنا عايزه.

عبد الناصر: لا.. أنا قلت إعادة المحاكمة.. إلغاء المحاكمة وإعادتها.

ف. فوزى: هى تحوير يافندم، وصلت إجراءات محاكمة قضية الطيران المتهم فيها الفريق أول متقاعد محمد صدقى محمود وآخرين اليوم اللى بصفتى الأمر بالنتشكيل، وبعد الاطلاع عليها ودراستها لم يصدق عليها وأمر بتحويلها.. أى إلغاء المحاكمة وإعادتها.

جمعة: فى الحقيقة فى الفترة دى حاجتين.. يعنى أنا شايف المسرح لابد أن يلتزم.. يعنى الرواية بتاع تحية كاريوكا دى كفاية عليها الفترة دى، وتغير الرواية لرواية تانية، ثم لا نسمح بروايات أخرى فيها هذا النقد. وبرضه رجائى إن رؤساء مجالس تحرير الصحافة يجتمعوا مع السيد على صبرى، ويكون هناك التزام فى هذه الفترة بحاجتين.. مافى واحد

سرى للغاية

دخل مسرحية تحية كاريوكا إلا أما خرج وسأل كيف يسمح بهذه الرواية الحقيقية؟! والنقد لدرجة فى الآخر إن ابتدى الناس تفسرها تفسير أكثر من حقيقتها الحقيقية!
النقطة الثانية: اللى بيثير كثير من الناس دلوقتى برضه لابد إن احنا نقلل منها، الصور العريانة وأفلام الجنس؛ لأن الناس بتقول إحنا فى فترة نفسية تعبانين ولا بد إن احنا نعبئ نفسنا، وبعدين يقولوا: دى سياسة مرسومة لإبعاد الناس!
رجاء بس يافندم النقطين دول، والصحافة تلتزم وتقابل السيد على صبرى.

عكاشة: مسرح تحية كاريوكا دا قطاع خاص يعنى غير تابع للدولة، وإن المسرحية مش من المسرحيات اللى درست عشان تقدم فى خطة تصرف عليها الدولة. الرقيب أجازها بعد حذف عدد من المشاهد موجودة فيها، وبعدين عجبت للإطناب الشديد والثاء والتقريظ المتواصل اللى كان مفرد لهذه المسرحية فى كل صفحات الجرائد، لدرجة إن جريدة الأخبار كانت تفرد لها مقالين فى العدد الواحد!

جريدة أخبار اليوم كانت جلال البندارى يفرد لها تقريظ! وفى الصفحة الأخيرة يتعمل لها تقريظ، وجريدة الجمهورية على وجه التحديد كذلك وجريدة الأهرام فى الأخبار بتاعت الصفحة الأخيرة.

طبعاً لفتت نظرى، روحت شفتها.. شوفت مسرحية عبارة عن مقالات نقدية ليس لها أى نهج أو مضمون مسرحى أو درامى على وجه الإطلاق! ولكن بتستثير فى الناس الإضحاك عن طريق رسم الشخصية بطريقه كاريكاتيرية؛ بحيث تجعل المشاهد يضحك من نفسه، ودى طريقة معروفة اللى هى بتخلى الواحد يعرى نفسيته الى حد ما.

وكان فيه فترة كل الصحافة وكل أجهزة الإعلام متجهة الى عملية تمزيق نفسى ومتجهة الى عملية نقد. فكان أنا وجهة نظرى، إن أنا بعد ماشوفت المسرحية الواقع أنا قرفت منها جدا، وقلت الكلام ده لفايز حلاوة - اللى هو مشرف على المسرحية - ولكن قال لى: طب إحنا بنقول كلام أكثر من الكلام اللى بيكتب فى المجلات وفى الجرايد؟! ما هو الكلام موجود فى الصحافة وموجود بهذا الشكل، فأشمنى إنت هتيجى تحجز عشان احنا قطاع خاص.. إنت بتحارب القطاع الخاص؟! فكان فيه حساسية فسبنا العملية تمشى، وأنا متقزز فعلا من المسرحية دى ومبعتبرش إن هى بتقدم أى عمل فنى!

سرى للغاية

ولكن السادة اللي بيتكلموا على إن المسرح بتاعنا كله تحية كاريوكا، طب مايتفرجوا ويشوفوا.. آه يا ليل يا قمر بقالها ثلاث شهور وفيها نقد جميل هادف! ويروحوا يشوفوا الزير سالم، يروحوا يشوفوا ليالى الحصاد، المسامير، يشوفوا دائرة الطباشير القوقازية!

ولكن إحنا تملى نشوف ونتصيد السلبيات ولكن ايجابياتنا منجيش عليها إطلاقاً، وأنا أدعو السادة إن هم يروحوا يشوفوا هذه المسرحيات اللي الدولة بتصرف عليها! وإن الدولة درستها قبل ما تقدمها.

ده ياسيادة الرئيس فيما يختص بموضوع مسرحية البغل فى الإبريق، وأنا مستعد إن أنا أوقفها ولكن الوزارة تشرف عليها إشراف من ناحية الرقابة ومش إحنا اللي بنقدمها.

عبد الناصر: أنا أرجو الأخ لبيب يقوم علشان الصحافة، نؤجل المسرح دلوقتى! (ضحك)

أصوات: (ضحك)

عكاشة: ٣ دقائق يافندم.

يا فندم موضوع الجنس ده مش صحيح دى حملة مدبرة! القاهرة فيها ١١ سينما، الـ ١١ سينما فيها ١١ فيلم.. منها فيلم واحد هو فعلاً فيلم جنسى وبقية الأفلام فيها فيلمين.

فى مجلس الأمة، اللي هم تقدموا بـ ٨ أسئلة لمدة سبع ساعات ونص بيناقشونى.. ثبت أن هذين الفيلمين اختلاف فى وجهات النظر فيهم فى الفلمين. إذاً الموجة العارمة من الجنس ده شعار بيتقال بس! إنما فيه حقيقى صور عارية على الأفيشات اتمنعت.. صور عارية موجودة فى الإعلانات اتمنعت بالاتفاق مع السيد وزير الإرشاد.

أنا آسف يافندم بس رديت على السادة الوزراء.

أصوات: (ضحك)